

ମାର୍କ ଲିଖିତ ଜିସୁ କ୍ରିଷ୍ଟଙ୍କ ସୁସମାଚାର **ମାର୍କ ଲେକ୍ତାଦ୍ ଜିସୁ କ୍ରିଷ୍ଟନ୍** **ସୁସମାଚାର** **ମାର୍କ ବଇ ବିଷୟରେ ଅଣ୍ଟାୟ ପଦ୍**

ପ୍ରବୁ ଜିସୁ କ୍ରିଷ୍ଟନ୍ ଜିହ୍ୱା ବିଷୟରେ ସାରେ ଗର୍ ଲେକ୍ତାହୁ ପୁନେ ନିୟମରେ ନାଲୁ ବଇକିନ୍ ଲୋପେଙ୍କ ମାର୍କ ଲେକିମାନ୍ ସୁସମାଚାର ଆଦୁଡ୍ ଅଣ୍ଟାୟ । ଆହୁ ନାଲୁ ବଇକିଂଙ୍କ ଖେରଖେର ସୁସମାଚାର ଇଞ୍ଜ କେତିତଡ୍ । ଆଦିନ୍ ଅର୍ଥ ଆଦୁଡ୍, “ନେଲେତାଦ୍ କାରୁର୍ ।” ଆହୁ ସାରେ ଜିସୁନ୍ ତଲ୍ଲେତେ ପେକେ ମାତିଉ, ମାର୍କ, ଲୁକ, ମେଣ୍ଡେ ଯୋହନ୍ ତଡ୍ ଲେକା ଆଡ୍ତେ । ନାଲୁ ସୁସମାଚାର ଲୋପେଙ୍କ ମାର୍କ ଲେକ୍ତାଦ୍ ସୁସମାଚାର ଆଦୁଡ୍ ସାରେତିଙ୍କ ସୁଦୁରାଦ୍ । ଇଦିଙ୍କ ଇଲା ଗାଲା ବିଶ୍ୱାସ୍ ମାଡିତଡ୍, ଯେ, ଇଦ୍ ସୁସମାଚାର ଲୋପେଙ୍କ ସାରେତିଙ୍କ ମୁନେନ୍ କ୍ରିଷ୍ଟାୟ ୬୫-୭୦ ଲୋପେ ଲେକା ଆଡ୍ତେ । ବେସ୍‌କ୍‌ଡୁଡ୍ ବାଇବଲ୍ ପଣ୍ଡିତିଡ୍ ବିଶ୍ୱାସ୍ ମାଡିତଡ୍, ଯେ, ରୋମ୍ ଦେଶ୍ ମାନ୍ଦାନ୍ କ୍ରିଷ୍ଟିୟାନ୍ ନାରୁଡ୍‌କ୍ ସାର୍ଦେ ମାଡାନ୍ ସେଙ୍ଗେ ଇଦ୍ ରୋମ୍ ଦେଶ୍‌ତାଗ୍ ଲେକା ଆଡ୍ତେ । ମାର୍କ, ବେନଙ୍କ ଯୋହନ୍ ମାର୍କ ଇଞ୍ଜ ପୁଞ୍ଜମାଡ୍‌ତଡ୍ । ଅଣ୍ଟା ପାଉଲ୍ ନୁ ବର୍ଣ୍ଣବାନ୍ ସାଙ୍ଗ ମାଡ୍‌ତଣ୍ଟ, ମାତର୍ ବେସ୍‌କ୍ ଅଣ୍ଟା ଅଡ୍‌କିଂଙ୍କ ପ୍ରବୁନ୍ ସେବା ପାଡ୍‌ମିଦେ ସେଙ୍ଗେ ଆଦାନଙ୍କ ଖିଡ୍‌ସି ଖାଡ୍‌ତଣ୍ଟ, ଆସ୍‌କ୍ ଅଡାଦ୍ ପେଦେର୍ ପେସ୍ ଖାଦାନ୍ ଖେଲେ, ଦୁଃକାମ୍ ଦିନାମ୍ ଏହୁଡ୍‌ତେ । ପ୍ରେରିତ ୧୩:୧୩ ବେସ୍‌କ୍ ଦିନ୍ ଆଡ୍‌ତେ ପେକେ ମାର୍କ ମେଣ୍ଡେ ବର୍ଣ୍ଣବାନ୍ ତଡ୍ ଆଦାନଙ୍କ ଆରାମ୍ ମାଡ୍‌ତଣ୍ଟ ପ୍ରେରିତ ୧୫:୩୭-୩୯ । ମାର୍କ ଆନ୍‌ତେ ପିତର୍‌ତେ ଗାଟି ସାଙ୍ଗ ଇଞ୍ଜ ପୁଞ୍ଜମାଡ୍‌ତଡ୍, ୧ ପିତର୍ ୫:୧୩ । ମାର୍କ ଜିସୁନ୍ ଜିହ୍ୱାତାଗ୍ ଆସ୍‌ମାନ୍ଦାନ୍ ସାରେ ବିଷୟରେ ସାକ୍ଷି ଆୟକ୍ ଗାଲା, ପଣ୍ଡିତିଡ୍ ଅଂକିଙ୍କ ବିଶ୍ୱାସ୍ ମାଡିତଡ୍,

। ଅଣ୍ଟା ପିତର ସାକ୍ଷି ଇସ୍ରାୟାନ୍ ବିଷୟ ନିଜର ସୁସମାଚାରତା ଲେଖିଛନ୍ତି । ମାର୍କ ଶିଷ୍ୟ ଆଡ଼ତାକୁ ନୁ ମାଡ଼େଇଁ ଝେଲେଇ ଗଡ଼ ଜିସୁନ୍ ଶିକ୍ଷାତାଗ୍ କେଡ଼ତଣ୍ଟ । ଇଦ୍ ମାର୍କ ବଇତାଗ୍ ଜିସୁ କ୍ରିଷ୍ଟଙ୍କ ଝେରଣ୍ ଦାର୍ମାମ୍ ତାକର ମେଣ୍ଟେ ପରମେଶ୍ୱରତେ ଯୋଜନା ପୁରା ମାଡ଼ାନଙ୍କ, ସାର୍ବେଦିନେ ତିଆର ଆସ୍ରାୟାନ୍ ସାୟେଡ଼ ପେକାଲ୍ ଇଞ୍ଜ କେସ୍‌ମିନ୍ଦେଣ୍ଟ । ଅଦିନ୍ ସେଙ୍ଗେ ମାର୍କ ଜିସୁ ମାଡ଼ତାଞ୍ଜୁ ଆଶର୍ଯ୍ୟ ପାଡ଼ିୟି ବିଷୟତେ ଗାଟି ଲେଖିଛନ୍ତି । ଇଦ୍ ସୁସମାଚାରତାଗ୍ ଜିସୁ ଶିଷ୍ୟତ୍ ମାଡ଼ାନାଦ୍ ନୁ ମାଡ଼େଇଁ ଦିନାମ୍‌ତେ ଶିକ୍ଷା ବିଷୟତେ ମାନ୍ ଇଡ଼ତଡ଼ ।

ବଇଡ଼ ଲୋପେ ମାନ୍ଦାନ୍ ମୁକ୍ୟ ବିଷୟ

୧. ମାର୍କ ବଇ ବିଷୟତେ ପରିଚୟ ଇଦ୍‌ତେ । ୧:୧-୧୩
୨. ଗାଲିଲୀତାଗ୍ ଜିସୁନ୍ ସେବା କାମ୍ । ୧:୧୪-୯:୫୦
୩. ଜିସୁ ଜିରୁଶାଲେମ୍ ଆଦାନାଦ୍ କେଡ଼ିତେ । ୧୦:୧-୧୨:୪୪
୪. ଜିସୁକି ଜିରୁସାଲେମ୍‌ତାଗ୍ ସେବା କାମ୍ ନୁ ତଲାନାଦ୍, ପୁନୁର୍ତ୍ତାନ ବିଷୟତେ କେଡ଼ତଣ୍ଟ । ୧୧:୧-୧୨:୨୦

ବାପ୍ତିସ୍ମ ଇଦାନ୍ ଯୋହନ୍‌ତେ ପ୍ରଚାର

(ମାଡ଼ିଉ ୩:୧-୧୨; ଲୁକ ୩:୧-୧୮; ଯୋହନ୍ ୧:୧୯-୨୮)

^୧ ଇଶ୍ୱରତେ ମାର୍ ଜିସୁ କ୍ରିଷ୍ଟନ୍ ସୁସମାଚାର ଇଦ୍‌ଲେକାମ୍ ଆରାମ୍ ଆଡ଼ତେ ।

^୨ ଯିଶାୟାସ ବାବବାଦୀ ଶାସ୍ତ୍ରତାଗ୍ ବେଦ୍‌ଲେକାମ୍ ଲେକାମିନ୍ଦେ, ଉଡ଼େ, ମାମ୍‌ମେ ମା ଦୂତକିଙ୍କ୍ ମିଇ ମୁନେ ରହସ୍ ମିନ୍ଦେମ୍, ଅଣ୍ଟା ମିୟାଦ୍ ଆର୍ ତିଆର୍ ମାଡ଼ିତଣ୍ଟ ।

^୩ “ଭରକ ନେଏଲ୍‌ଦାଗ୍ ଯିଶାୟାସ ବେନ ଗାଟି ଲେଙ୍କ୍‌ଦେ କେସ୍‌ମିନ୍ଦେନ୍, ପ୍ରବୁନ୍ ସେଙ୍ଗେ ଆର୍ ତିଆର୍ ମାଡ଼ାଟ୍; ଅନାଦ୍ ଖାଦାନ୍ ସେଙ୍ଗେ ଆର୍ ତିଆର୍ ମାଡ଼ାଟ୍ ।”

^୪ ଆଦ୍ ଲେକାମ୍ ବାପ୍ତିଜକ ଯୋହନ୍ ଉୟ୍ ନେଲ୍‌ଦା ଖାସ୍ ପ୍ରଚାର ମାଡ଼ାତନ୍ ନୁ ବାପ୍ତିସ୍ମ ଇଦାନଙ୍କ୍ ପସ୍‌ପତନ୍ । ଅଣ୍ଟା ନାରୁଡ଼କିଙ୍କ୍ କେସ୍‌ମାଡ଼ତନ୍ “ନିଜେ ନିଜେଡ଼ ପାପ୍ ସେଙ୍ଗେ ଝିଡ଼୍‌ସାଟ୍ ନୁ ବାପ୍ତିସ୍ମ

ଗ୍ରହନ୍ ମାଡ଼ାଟ୍ । ଆଲାଇଡ଼କେ ଇଶ୍ବର ମିୟାଦ ପାପ୍ କ୍ଷମା ମାଡ଼ିତନ୍ ।”

୫ ଯିହୁଦା ପ୍ରଦେଶ୍ ନୁ ଯିରୁଶାଲେମ୍ ସହରତାଗାଙ୍କ ନାରଗେ ନାରୁଡ଼୍, ଯୋହନ୍‌ତେ ପ୍ରଚାର୍ କେଜ୍ଜାନ୍ ସେଙ୍ଗେ ଖାଡ଼ତଡ଼୍ । ଅଡ଼୍‌ନିଜେ ନିଜେ ପାପ୍ ସ୍ବାକାର୍ ମାଡ଼ତଡ଼୍ ନୁ ଯୋହନ୍ ଅଡ଼୍‌କିଂଙ୍କ୍ ଯର୍ଜନ୍ ବେଡ଼େମ୍‌ତାଗ୍ ବାପ୍ରିସ୍ଥ ଇଡ଼ତନ୍ ।

୬ ଯୋହନ୍‌ତାଦ୍ ଚକା ଉର୍ କେଲ୍‌କିନ୍ ତିଆର୍ ଆସ୍‌ମାଡ଼ତେ ନୁ ଅନ୍ ଚିକିଡ଼୍‌ତାଗ୍ ତଲ୍‌କେ ତହସ୍ ମାଡ଼ତନ୍ । କାରାପ୍ ମାଡ଼େଡ଼୍ କାୟା ନୁ ଗୁପ୍‌ତାଦ୍ ତେନେ ଅନାଦ୍ କାଦି ମାଡ଼ତେ, ଅଣ୍ ନାରୁଡ଼୍ ପାକେ କେସ୍ ମାଡ଼ତନ୍ ।

୭ “ବେନ୍ ନାରୁଡ଼୍ ନା ପେକେ ଖାଦ୍‌ତନ୍, ଅଣ୍ ନାୟାଗାଙ୍କ୍ ମହାନ୍ । ନାନେ ଆଦ୍‌ଲେକାମ୍ ଅନ୍ ଡେକାନ୍ ବନ୍ଦନ୍ କୁସ୍‌ପାନଙ୍କ୍ ମିକା ନାନେନେ ଅୟୋଗ୍ୟ ।

୮ ନାନେ ମିକିଂଙ୍କ୍ ଏରଦାଗ୍ ବାପ୍ରିସ୍ଥ ଇଦୁତାନ୍, ବାଡେଙ୍କ୍ ଇଡ଼କେ ଅଣ୍ ପବିତ୍ର ଆମ୍‌ତେ ବାପ୍ରିସ୍ଥ ଇଡ଼ତନ୍ ।”

ଜିସୁନାଦ୍ ବାପ୍ରିସ୍ଥ ଆଦାନାଦ୍ ନୁ ପରିକ୍ଷା ମାଡ଼ତଣ୍
(ମାଡ଼ିଉ ୩:୧୩-୪:୧୧; ଲୁକ ୩:୨୧-୨୨; ୪:୧-୧୩)

୯ ଆଦ୍ ସମୟ୍‌ତେ ଜିସୁ ଗାଲିଲୀ ପ୍ରଦେଶ୍‌ତେ ନାଜରିତ୍‌ୟ ତାଗାଙ୍କ୍ ଖାସ୍ ଯୋହନ୍ ତଡ଼୍ ଯର୍ଜନ୍ ବେଡ଼େମ୍‌ତାଗ୍ ବାପ୍ରିସ୍ଥ ଅଡ଼ତନ୍ ।

୧୦ ଜିସୁ ଏରଦାଗାଙ୍କ୍ ତେଦି ଖାଦାନ୍ ଖେଲେ ଉଡ଼ତନ୍, ସ୍ବର୍ଗ କୁଲାଆସ୍ ନୁ ପରମାଆମ୍ ପାଖି ରକମ୍ ଅନ୍ ପରୁ ଡିଗ୍‌ତେ ।

୧୧ ✧ମେଣ୍ଟେ ସ୍ବର୍ଗତାଗାଙ୍କ୍ ଇଦ୍ ଗଟ୍ ଖାଡ଼ତେ, “ନିମେ ମା ପ୍ରିୟ ମାର୍, ନିୟାଗେ ନାନେ ଗାଟି ସନ୍ତୁଷ୍ଟ ।”

୧୨ ଆସୁଙ୍କ୍ ପବିତ୍ର ଆମ୍‌ ଅଂକିଙ୍କ୍ ସିମ୍‌ସାମ୍ ପଡ଼ିୟେତାଗ୍ ଅଡ଼ତେ ।

୧୩ ଆଗେ ଅଣ୍ ଚାଲିଗ୍ ଦିନ୍ ମାଡ଼ତନ୍ । ଆଦ୍ ସମୟ୍‌ତେ ଶୟତାନ୍ ବେସ୍ ବେସ୍ ତାଉ ପରିକ୍ଷା ପ୍ରଲୋଭନ୍‌ତେ ଅଂକିଙ୍କ୍ ଖିଡ଼ସି ଆଡ଼ତେ । ଆଗେ ଅଣ୍ ମେଚେଡ଼୍ ଜିଝାକିନ୍ ତଡ଼୍ ମାଡ଼ତନ୍, ବାଡେଙ୍କ୍ ଇଡ଼କେ ଦୂତ ଖାସ୍ ଜିସୁନାଦ୍ ଯନ୍ ଅଡ଼ତା ।

✧ ୧:୧୧ ମାଡ଼ିଉ 3:୧୭; ୧୨:୧୮; ମାର୍କ ୯:୭; ଲୁକ 3:୨୨.

କିଙ୍କେ ପଇତାନ୍ ନାଲୁଝୁଡ଼କ୍ ଜିସୁ କାରୁକ୍ତନ୍
(ମାତିଉ ୪:୧୨-୨୨; ଲୁକ ୪:୧୪-୧୫; ୫:୧-୧୧)

୧୪ ଯୋହନ୍‌ତିଙ୍କୁ ବନ୍ଦି ଆଡ଼ତେ ପେରକେ ଜିସୁ ଗାଲିଲୀତାଗ୍ ଆଞ୍ଜ୍
ଇଶ୍ବରତେ ରାଜ୍ୟତେ ଲେକାମ୍ ଗର୍ ପ୍ରଚାର୍ ମାଡ଼ତଣ୍ ।

୧୫ ✠ଅଣ୍ କେଡ଼ତାନ୍, “ଲେକାମ୍ ଦିନାମ୍ ଖାସ୍‌ମିନ୍ଦେ, ଇଶ୍ବରତେ
ରାଜ୍ୟ ମି ଗାରରେ ଖାସ୍ ହେଞ୍ସ୍ ମିନ୍ଦେ ! ପାପ୍ ସେଙ୍ଗେ ମାଲ୍ଲୁଖାସ୍
ଇଦ୍ ଲେକେଡ଼ ଗର୍ ବିଶ୍ବାସ୍ ମାଡ଼ାର୍ ।”

୧୬ ଜିସୁ ଗାଲିଲୀ ସାଞ୍ଜଡ଼େଡ଼ ଆଞ୍ଜ୍‌ଇସ୍ ଆଦାନ୍ ଖେଲେ ଶିମୋନ୍
ନ୍ ଆନ୍ଦ୍ରିୟ୍, ଇଡ଼୍ ତାମୁଣ୍‌ଇରୁଝୁଡ଼୍ ଖାଲେ ଖାଟି ସାଞ୍ଜଡ଼େଡ଼ାଗ୍ କିଙ୍କେ
ପୟସ୍‌ମାଡ଼ତଡ଼ ।

୧୭ ଜିସୁ ଅଡ଼କିଂଙ୍କୁ କାରୁକ୍ କେଡ଼ତଣ୍, “ନା ତଡ଼୍ ଖାଡ଼ାର୍ । ନାନ୍
ମିକିଂଙ୍କୁ ନାରୁଡ଼କିଂଙ୍କୁ ପଇତାନାଦ୍ ନାଡ଼ସ୍ଥିତତାନ୍ ।”

୧୮ ଆସୁଙ୍କୁ ସାଙ୍ଗେ ସାଙ୍ଗେ ଅଡ଼ାଝୁ ଖାଲା ଝିଡ଼ସି ଅନ୍ ତଡ଼୍ ଆଡ଼ତଡ଼୍
।

୧୯ ଜିସୁ ମେଣ୍ଡେ ସୁଦୁର୍ ମୁନେ ଆଞ୍ଜ୍ ଜେବଦିନ୍ ଇରୁଝୁଡ଼୍ ମାରକିଡ଼୍
ଯାକୁବ୍ ନୁ ତାନ୍ ତାମୁଣ୍ ଯୋହନ୍ ଡିଙ୍କୁ ଉଡ଼୍‌ତନ୍ । ଅଡ଼୍‌ଜାରି ଖାଟାନଙ୍କୁ
ନିଜେଡ଼ ଓଡେଡ଼ାଗ୍ ତିଆର୍ ଆସ୍‌ମାଡ଼ତଡ଼୍ ।

୨୦ ଜିସୁ ଅଡ଼କିଂଙ୍କୁ ଉଡ଼ିମିକା ଗାରରେ କାରୁକ୍ତନ୍ । ଓଡେଡ଼ାଗ୍
ଚାକରନ୍‌ଡ଼୍ ତଡ଼୍ ଅଡ଼୍ ବାବାଲ୍ ଜେବଦୀଙ୍କୁ ଝିଡ଼ସି ଅଡ଼୍ ଜିସୁନ୍ ପାକେ
ଖାଡ଼ତଡ଼୍ ।

ବୁଡ଼ପଇତେ ନାରୁଙ୍କୁ ସାୟମାଡ଼ତଣ୍
(ଲୁକ ୪:୩୧-୩୭)

୨୧ ଜିସୁ ନୁ ତାନ୍ ଶିଷ୍ୟନ୍‌ଡ଼୍ କପର୍ନାହୁମ୍‌ତାଗ୍ ଆଡ଼ତଡ଼୍
ମେଣ୍ଡନ୍‌ଦିନେ ଜିସୁ ଯିହୁଦିଡ଼୍ ମିଟିଙ୍କୁ ଲୋନ୍ ଆଞ୍ଜ୍ ଶିକ୍ଷା ଇଡ଼୍‌ତନ୍
।

୨୨ ✠ଅନାଦ୍ ଶିକ୍ଷା କେଞ୍ଜି ନାରୁଡ଼୍ ବକୁଝା ଆଦ୍‌ତଡ଼୍; ବାଡେଙ୍କୁଇକ୍ତେ
ଅଡ଼୍ ଶାସ୍ତ୍ରିନ୍‌ଡ଼୍ ଲେକାମ୍ ଶିକ୍ଷା ଇଞ୍ଜକର୍ ଖେରନ୍ ଯମତାପନ୍ ନାରୁନ୍
ଲେକାମ୍ ଶିକ୍ଷା ଇସ୍‌ମାଡ଼ତନ୍ ।

୨୩ ଆସୁଙ୍କୁ ଖେରନ୍ ବୁଡ଼ପଇତେ ନାରୁଡ଼୍ ପ୍ରାର୍ତନା ଲୋନ୍ ନେହେଙ୍ଗି
ମିକା କିଡ଼କ୍‌ତନ୍ ।

୨୪ “ହୋ ନାଜରିତ୍ତିୟ ଜିସୁ, ମା ତତ୍ ନିୟାଦ୍ ବାତ୍ ସମ୍ପର୍କ ? ନିମେ ବାତେଏ ମାକିଂଙ୍କ ଦ୍ଵଂସ ମାଡାନଙ୍କ ଇଗେ ଖାଡ୍ତିନ୍; ନିମ୍ ଇଶ୍ଵରତାଗାଙ୍କ ଖାସମାନ୍ନ ଆ ପବିତ୍ର ନାରୁନୀ ।”

୨୫ ଜିସୁ ଆସୁଙ୍କ ଦମକ୍ ଇସ୍ କେଡ୍ତନ୍; “ଗାନ୍ତି ଆୟମ୍ ! ଇ ନାରୁନ୍ ଲୋପେଙ୍କ ପେଇସ୍ ଆନ୍ ।

୨୬ ଆ ବୁଡ୍, ଆ ନାରିଙ୍କ ଗାଟି ଖାଡ୍ସକି, ଗାଟି ଲେଙ୍ଗ୍ ମାଡ୍ତି ଅନ୍ ମେନ୍ଦୁଲତାଗାଙ୍କ ପେଇସ୍ ଆଡ୍ତେ ।

୨୭ ଇଗେ ସାରେତଡ୍ ବାକ୍ସା ଆସ୍ ନିଜେ ନିଜେ କେତାକେତି ଆଡ୍ତଡ୍, ଇଦ୍ ବେସଡ୍ ଗର୍ ? ଅଣ୍ ଅଦିକାର୍ ନୁ ଶକ୍ତି ତଡ୍ ଅଶୁଚି ଆମ୍ବାକିଂଙ୍କ ଗର୍ ହିଦ୍ତଣ୍, ମେଣ୍ଟେ ଆଖ୍ ପେୟିସ୍ ଆଦତା ।”

୨୮ ଆଗେ ଅନ୍ଧାଦ୍ ବିଷୟତେ ସୁସମାଚାର୍ ସାରେ ପାକା ସାରେ ପଡ୍ଡିୟେତାଗ୍ ପ୍ରଚାର୍ ଆଡ୍ତେ ।

ନାର୍ଗେ ନାରୁଡ୍ସକ୍ ସାୟ୍ ମାଡନ୍ ଶକ୍ତି ଇତଣ୍

(ମାତିଡ ୮:୧୪-୧୭; ଲୁକ ୪:୩୮-୪୧)

୨୯ ଯାକୁବ୍, ଯୋହନ୍ ନୁ ବାଗାଡ୍ ଶିଷ୍ୟନଡ୍ ତଡ୍ ଜିସୁ ପ୍ରାର୍ଥନା ଲୋନ୍ ଓଡ୍ସି ଶିମୋନ୍ ନୁ ଆନ୍ଦ୍ରିୟନ୍ ଲୋନ୍ ଆଡ୍ତଡ୍ ।

୩୦ ଆଗେ ହେଉଦାନ୍ ଖେଲେ ଅଣ୍ କେଞ୍ଜିତଣ୍ ଯେ ଶିମୋନ୍ତେ ପୋୟେ ଏଡ୍କିନେ ପାଟିମିୟେ ।

୩୧ ଅଣ୍ ତାନ୍ ଗାର୍ରେ ଆଞ୍ଜି ତାନାଦ୍ କାଇ ପଇସ୍ କେଡ୍ତାନ୍, ତାନାଦ୍ ଏଡ୍କି ଓଡ୍ସିଆଡ୍ତେ ନୁ ଆଦ୍ ଅଡ୍କିଂଙ୍କ ସେବା ମାଡାଙ୍କ ଦାନ୍ଦେଆଡ୍ତେ ।

୩୨ ପଡ୍ଡି ପେଇତାନ୍ ଖେଲେ ନାରୁଡ୍ ଜିସୁନ୍ପାକେ ରୋଗ୍ ନୁ ବୁଡ୍ପଇତେ ନାରୁଡ୍କିଂଙ୍କ ତାଡ୍ତଡ୍ ।

୩୩ ସାରେ ସହର୍ତେ ନାରୁଡ୍ ଖାସ୍ ଦ୍ଵାରମୁନେ ଗୁଡ୍ତଡ୍ ।

୩୪ ବାଡ୍ବାଡ୍ ରୋଗାଡ୍ ମାଡ୍ତଡ୍ ବା ନାର୍ଗେ ରୋଗିଡ୍ସକ୍ ଜିସୁ ସୁସ୍ତ ମାଡ୍ତଡ୍ ନୁ ନାର୍ଗେନାରୁଡ୍ଗାଙ୍କ ବୁଡ୍କ୍ ଓଡ୍ପତନ୍ ଆ ବୁଡ୍କିଂଙ୍କ ଗଟି କେତାନଙ୍କ ଇଖେ ମାଡ୍ତନ୍, ବାତେଙ୍କଇକ୍ ଆଞ୍ଜି ଅଂକିଙ୍କ ପୁଞ୍ଜିମାଡ୍ତା ।

ଗାଲିଲୀତାଗ୍ ଜିସୁନାଦ୍ ଗର୍

(ଲୁକ ୪:୪୨-୪୪)

୩୫ ତାନ୍ ମେଣ୍ଡନ୍ ଦିନ୍ ପତଦ୍ ପେଇଝେ ମୁନେଙ୍କ ଜିସୁ ତେଦି ଲୋଡ଼ତାଗାଙ୍କ ପେଇସଆଡ଼ତନ୍ । ଅଣ୍ଟ ନାର୍ ଝିଡ଼ସି ଝେରଡ଼, ସିମ୍‌ସାମ୍ ପଡ଼ିଝେତାଗ୍ ଆଞ୍ଜ ପ୍ରାର୍ତ୍ତନା ମାଡ଼ତଣ୍ ।

୩୬ ଶିମୋନ୍ ନୁ ତାନ୍ ସାଙ୍ଗନଡ଼୍ ଜିସୁଙ୍କ ମେହେକାନଙ୍କ ପସ୍‌ପ୍ ଡ଼ତଡ଼୍ ।

୩୭ ଅଂକିଙ୍କ ଦସ୍ କି ଅଡ଼୍ କେଡ଼ତଡ଼୍, ମାମ୍‌ମେ ସାରେତମ୍ ନିକିଂଙ୍କ ମେହେକୁତମ୍ ।

୩୮ ବାତେଙ୍କ ଇଡ଼କେ ଜିସୁ ଅଡ଼୍‌କିଂଙ୍କ କେଉନ୍, “ଗାର୍‌ରେମାନ୍‌ହାନ୍ ବେନା ବେନା ନାକିନାଗ୍ ମାନା ଆଦାଙ୍କ ଆଦ୍‌ତେ । ନାନ୍‌ନେ ଆଗେ ମିକା ପ୍ରଚାର୍ ମାଡ଼ିତାନ୍, ବାତେଙ୍କଇକ୍‌କେ ଆଦ୍ ଉଦେଶ୍ୟତେ ନାନ୍‌ନେ ଆଡ଼ୁତାନ୍ ।”

୩୯ ତାନ୍‌ପେକେ ଅଣ୍ଟ ଗାଲିଲୀତେ ସାରେ ନାକିନାଗ୍ ଉଡ଼ି ପ୍ରାର୍ତ୍ତନା ଲୋକିନାଗ୍ ପ୍ରଚାର୍ ମାଡ଼ତଣ୍ ନୁ ବୁଡ଼କ୍ ଝିରସ୍‌ତନ୍ ।

କୃଷ୍ଣରଗୀ ସୁସ୍ଥ ଆଡ଼ତନ୍

(ମାଡ଼ିଉ ୮:୧-୪; ଲୁକ ୫:୧୨-୧୬)

୪୦ ଝେରଣ୍ଟ କୃଷ୍ଣରୋଗି ଜିସୁନ୍ ପାକେ ଝାଡ଼ତନ୍ । ମର୍‌ମିଣ୍ଡା ଇସ୍ ବିନତି ମାଡ଼ି କେଡ଼ତାନ୍, “ପ୍ରବୁ, ନିମେ ଯଦି ଇଚ୍ଛା ମାଡ଼ିତି, ଆଲାକ୍‌କେ ନାକିଂଙ୍କ ସୁସ୍ଥ ମାଡ଼ତେ ପାର୍‌ଡ଼ିଡ଼୍ ।”

୪୧ ଜିସୁ ଦୟାତେ କାଇ ଆସ୍ ଅଂକିଙ୍କ ଇଡ଼ତନ୍ ନୁ କେଡ଼ତାନ୍, “ନାନ୍‌ନେ ଆଦେକେ ଇଚ୍ଛା ମାଡ଼ୁତାନ୍, ନିମ୍ ଶୁଚି ଆୟାମ୍ ।”

୪୨ ସାଙ୍ଗେ ସାଙ୍ଗେ ଆଦ୍ ରୋଗ୍ ଅନାଗାଙ୍କ ଦୁର୍ ଆଡ଼ତେ ନୁ ଅଣ୍ଟ ଶୁଚି ଆଡ଼ତନ୍ ।

୪୩ ତାନ୍‌ପେକେ ଜିସୁ ଅଙ୍କ୍ ସତର୍କ୍ ମାଡ଼ି କେଡ଼ତାନ୍,

୪୪ “କେଞ୍ଜା ଇଦ୍‌ଗୋଟ୍ ବେନଙ୍କ ବା କେଲ୍‌ମା ବାତେଙ୍କ ଇଡ଼କେ ଦର୍ମ୍ ଯାଜଗ୍‌ନଡ଼୍‌ପାକେ ଆନ୍ । ଅଣ୍ଟ ନିକିଂଙ୍କ ପରିକ୍ଷା ମାଡ଼ି ଉଡ଼ିତନ୍ । ତାନ୍‌ପେକେ ନିମ୍ ସାରେ ଶୁଚିଆଡ଼ତିନ୍ ଇଞ୍ଜ ବାଗାଡ଼ତ୍‌ପାକେ ପ୍ରମାନ୍ ମାଡ଼ାନ୍ ସେଙ୍ଗେ ମୋଶାନ୍ ନିର୍ଦ୍ଦେଶ୍ ଲେକାମ୍ ପାଲନ୍ ମାଡ଼େ ।” ଇଦ୍ କେସ୍ ଜିସୁ ଅଂକିଙ୍କ୍ ସାଙ୍ଗେ ସାଙ୍ଗେ ରହସିଡ଼ତନ୍ ।

☆ ୧:୩୯ ମାଡ଼ିଉ ୪:୨୩; ୯:୩୫.

୪୫ ବାତେଙ୍କ ଇଡ଼କେ ନାରୁଡ଼ ଆଗାଙ୍କ ଆଞ୍ଜ ଇଦଗୋଟ୍ ସାରେପାକ୍ କେଡ଼ତଡ଼ । ଆଦ୍ ଇ ବିଷୟତେ ଇସର୍ କେସ୍ ଉଡ଼ତଣ୍ଡ ଯେ, ଜିସୁ କେତାନଙ୍କ ବେନ୍ ସହର୍ ଲୋପେ ଆଦେ ପାର୍ଝନ୍ । ଆଦିଙ୍କ ଅଣ୍ଡ ସିମ୍ ସାମ୍ ପଡ଼ିୟେତାଗ୍ ମାଡ଼ତନ୍, ଆଗେକ୍ ବା ସାରେ ପାକେଡ଼ ନାରୁଡ଼, ଅନ୍‌ପାକେ ଖାଡ଼ତଡ଼ ।

୨

ପକ୍ଷାଗାଡ଼ ରୋଗି ସାୟ୍ ଆଡ଼ତନ୍
(ମାତିଉ ୯:୧-୮; ଲୁକ ୫:୧୭-୨୬)

୧ ବେସକ୍ ଦିନାଡ଼ ପେରକେ ଜିସୁ କପର୍ନାହୁମ୍ ମାଲ୍‌ସ୍ ଆଡ଼ତନ୍ । ଅଣ୍ଡ ଲୋନ୍ ମିନ୍ଦେନ୍ ଇଞ୍ଜ କବର୍ ସାରେ ପାକେ ଆଡ଼ତେ ।

୨ ଆଗେ ଇସର୍ ନାରୁଡ଼ ଖାସ୍ ଗୁଡ଼ତଡ଼ ଯେ ଦ୍ଵାରପାକ୍ ମିକା ସୁଦୁଟ୍ ବା ପଡ଼ିୟେ ଇଲ୍‌ଖେ ମାଡ଼ତେ । ମେଣ୍ଡେ ଅଣ୍ଡ ଅଡ଼ ପାକେ ବାକ୍ୟ ପ୍ରଚାର ମାଡ଼ାନଙ୍କ ପସ୍ତତନ୍ ।

୩ ଜିସୁ ଅଡ଼ପାକେ ସୁସମାଚାର ପ୍ରଚାର ମାଡ଼ାନ୍ ଖେଲେ, ନାଲ୍‌ଝୁଡ଼ ନାରୁଡ଼ ଖେରଙ୍କ ପକ୍ଷାଗାଡ଼ ରୋଗିଙ୍କ କାଞ୍ଜି ତାଡ଼ତଡ଼ ।

୪ ବାତେଙ୍କ ଇକ୍ଟେ ନାରୁଡ଼ ମାନ୍ଦେ ସେଙ୍ଗେ ଅଡ଼ ଅଂକିଙ୍କ ଜିସୁନ୍ ଗାରରେ ତାତାଙ୍କ ଆୟେଖେ ମାଡ଼ତେ । ଆଦିଙ୍କ ଜିସୁ ବେନ୍ ପଡ଼ିୟେତାଗ୍ ମାଡ଼ତନ୍, ଟିକ୍ ଆଦେ ପଡ଼ିୟେତାଗ୍ ମୁର୍ସତିଙ୍କ ଟେଣ୍ଡତଡ଼, ନୁ ଆଦ୍ ଆଲାନ ରୋଗିଙ୍କ କେତିତାଗ୍ ପାଡ଼ସ୍ତି ମଦଲ୍ ଡିପିଡ଼ତଡ଼ ।

୫ ଆ ନାରୁଡ଼ ବିଶ୍ଵାସ୍ ଉଡ଼ି ଜିସୁ ପକ୍ଷାଗାଡ଼ ରୋଗିଙ୍କ କେଡ଼ତନ୍, “ପେକା ! ନିୟାଦ୍ ପାପ୍ ସାରେକ୍ଷମା ଆଡ଼ତେ ।”

୬ ଆଗେ କୁଦିମାନ୍ଦାନ୍ ବେସ୍‌ଡୁଡ଼ ଶାସ୍ତ୍ରାନାରୁଡ଼ ଆଦ୍ କେଞ୍ଜି ମାନ୍‌ଦାଗ୍ ଆଲ୍‌ସତଡ଼,

୭ “ଅଣ୍ଡ ଇଦଗୋଟ୍ କେତାନଙ୍କ ସାହାସ୍ ମାଡ଼ତଣ୍ଡ ବେଲାନ ? ଇଦ୍ ଇଶ୍ଵରତେ ନିୟ୍ । ଇଶ୍ଵରତିଙ୍କ ଓଡ଼ସି ବେନ ପାପ୍‌କ୍ଷମା ମାଡ଼ତେ ପାର୍‌ଝଣ୍ଡ ?”

୮ ଅଡ଼ ମାନ୍‌ଦେ ହେର୍କା ପୁଞ୍ଜ ଜିସୁ ପଚାର ମାଡ଼ତଣ୍ଡ, “ବାଡ଼ତିଙ୍କ ଇଦ୍‌ଲେକାମ୍ କାରାପ୍ ଗଟି ସାରେ ଆଲ୍‌ସୁଡ଼ିଡ଼ ?

୯ ଆ ପକ୍ଷାଗାତ ରୋଗିଙ୍କୁ ‘ନିୟାଦ ପାପ କ୍ଷମା ଆଡ଼ତେ,’ ଇଞ୍ଜ କେତାନାଦ ସହଜ ନା ‘ତେଦା, କେଡ଼ ପଇସ୍ ଅନ୍’ ଇଞ୍ଜ କେତାନାଦ ସହଜ ?”

୧୦ “ପୃତିବିତାଗ୍ ପାପ୍ କ୍ଷମା ମାଡ଼ାନ୍ ସେଙ୍ଗେ ନାରୁନ୍‌ପିଲେତିଙ୍କୁ ଅଦିକାର୍ ମିନ୍ଦେ, ଇଦ୍ ମିଡ଼୍ ଇଞ୍ଜେ ପୁନ୍ଦେପାରୁଡ଼ି ।”

୧୧ ଇଦିନ୍‌ପେକେ ଜିସୁ ଆ ରୋଗିଙ୍କୁ କେଡ଼ତନ୍, “ନାନ୍‌ନେ ନିକିଙ୍କୁ କେଡ଼ତାନ୍, ତେଦ୍‌ଦେ, ନିୟାଦ କେଡ଼ ପଇସ୍ ଲୋନ୍‌ଆନ୍ ।”

୧୨ ସାରେତଡ଼୍ ଉଡ଼ି ମାନ୍ଦାନ୍ ଖେଲେ, ରୋଗି ତେଦିମିକା କେଡ଼ ପଇସ୍ ଆଡ଼ତନ୍ । ଆଗାଙ୍କୁ ସାରେତଡ଼୍ ବାକୁଝା ଆସ୍ ଇଶ୍‌ବରତିଙ୍କୁ ଦନ୍‌ସବାଦ୍ ଇସ୍ କେଡ଼ତଡ଼୍, “ମାମ୍‌ମେ ଇଦ୍‌ଲେକାଡ଼୍ କାମ୍ ବେସୁଙ୍କୁ ଉଡ଼ିଝେ ମାଡ଼ତମ୍ ।”

ଲେବୀୟଙ୍କ କାରଙ୍ଗାନାଦ୍

(ମାଡ଼ିଉ ୯:୯-୧୩; ଲୁକ ୫:୨୭-୩୨)

୧୩ ଜିସୁ ମେଣ୍ଡୁନ୍‌ଦାମ୍ ଇଲ୍‌କେ ଗୁନ୍‌ଦେ ଆଞ୍ଜିନା ଆଡ଼ତନ୍ । ଆଗେ ନାରୁଡ଼୍ ଗୁଡ଼ନାଙ୍କୁ ଜିସୁ ଅଡ଼କିଙ୍କୁ ଶିକ୍ଷା ଇଡ଼ତନ୍ ।

୧୪ ଅଣ୍ଡ ଆଗାଙ୍କୁ ଆଦ୍‌ଦାନ୍ ଆର୍‌ଦାଗ୍ ଆଲପିନ୍ ମାର୍ ସିସୁ ଆଦାୟ୍ ମାଡ଼ାନଣ୍ଡ ଲେବୀଙ୍କୁ ତାନ୍ କାମ୍‌ମାଡ଼ାନଙ୍କୁ ଲୋଡ଼ତାଗ୍ କୁଦିମାନ୍ଦାନାଦ୍ ଉଡ଼ତନ୍ । ଜିସୁ ଅଂକିଙ୍କୁ କେଡ଼ତାନ୍, “ନା ପେର୍‌କେ ପେର୍‌କେ ଖାଡ଼ା ।” ଲେବିୟତେଦି ଅନ୍ ପେର୍‌କେ ଆଡ଼ତନ୍ ।

୧୫ ତାନ୍‌ପେକେ ଜିସୁ ଲେବିନ୍ ଲୋନ୍ ତିନ୍ଦାନାଗ୍ କୁଦତନ୍ । ଜିସୁନ୍ ପେର୍‌କେ ଆଞ୍ଜି ମାନ୍ଦାନ୍ ନାର୍‌ଗେନାରୁଡ଼୍ ସିସୁ ଆଦାୟ୍ ମାଡ଼ାନଣ୍ଡ ନୁ ସମାଜ ଲୋଡ଼ତେ ନାରୁଡ଼୍ ଜିସୁ ନୁ ତାନ୍ ଶିଷ୍ୟନଡ଼୍ ତଡ଼୍ ଅଣ୍ଡୟାଗେ ତିନ୍ଦାନାଗ୍ କୁଦତଡ଼୍ ।

୧୬ ଆଦ୍ ଉଡ଼ି ପାରୁଶୀଡ଼୍ ମାନ୍ଦେତାଗ୍ ବେସଡ଼ୁଡ଼୍ ଶାସ୍ତ୍ରୀଡ଼୍ ଜିସୁନ୍ ଶିଷ୍ୟଡ଼୍‌କ୍ ପଚାର୍‌ମାଡ଼ତନ୍, “ଇଦ୍‌ଲେକାମ୍ ନାରୁଡ଼୍‌ତଡ଼୍ ଅଣ୍ଡ ବାଡ଼ତିଙ୍କୁ ତିଞ୍ଜିମିନ୍ଦେନ୍ ?”

୧୭ ଆଦ୍‌ଗର୍ କେଞ୍ଜି ଜିସୁ ଉଉର୍ ଇଡ଼ତନ୍, “ସୁସ୍ଥନାରୁଣ୍ଡ୍ ସେଙ୍ଗେ ଚିକିସ୍ତା ମାଡ଼ାନାଦ୍ ଦର୍‌କାଡ଼୍ ଇଲ୍‌ଲେ । ଦର୍‌କାର୍ ମିନ୍ଦେ ମାଡ଼ତ୍ ଅସୁସ୍ଥ ନାରୁଡ଼୍ ସେଙ୍ଗେ । ନାନ୍ ଦାମ୍‌କି ନଡ଼୍ ସେଙ୍ଗେ ଖାଡ଼ନ୍, ଖାଡ଼ିତାନ୍ ପାପୀନଡ଼୍ ସେଙ୍ଗେ ।”

ଉପବାସ ସମ୍ପର୍କରେ

(ମାତିଉ ୯:୧୪-୧୭; ଲୁକ ୫:୩୩-୩୯)

^{୧୮} ଅଣ୍ଟ ଦାମ୍ ବାପ୍ତିସ୍ମଜ୍ଞାନ ଯୋହନଙ୍କେ ଶିଷ୍ୟମତ୍ ନୁ ପାରୁଣୀତ୍, ଉପବାସ ମାଡ଼ାନୁଞ୍ଜେଲେ, ବେସକ୍ ତତ୍ ଜିସୁନ୍‌ପାକେ ଝାସ୍ ପଚାରମାଡ଼ତତ୍, “ଯୋହନ୍ ନୁ ଫାରୁଣୀନତ୍ ଶିଷ୍ୟମତ୍, ଉପବାସ ମାଡ଼ିତତ୍ ବାତେଙ୍କ୍ ଇଡ଼କେ ନି ଶିଷ୍ୟମତ୍ ବାଡ଼ତିଙ୍କ୍ ଉପବାସ ମାଡ଼ତ୍ ?”

^{୧୯} ଜିସୁ ଉତ୍ତର ଇଡ଼ତନ୍, “ସାଙ୍ଗେତେ ମାନ୍ଦାନ୍ ଯାକ ପେଣ୍ଡୁଲୁ ପେକାନ୍‌ତତ୍ ମାନ୍ଦାନ୍ ନାରୁଡ଼ ବାତେଏ ଉପବାସ ମାନ୍ଦେ ପାରୁଞ୍ଜିତ୍ ? ବେସୁଙ୍କ୍ ଆୟ୍‌ୟ । ଅଡ଼ତତ୍ ବର ମାନ୍ଦନ୍ ଯାକ ଅଡ଼ଆଦ୍ ମାଡ଼ତ୍ ।

^{୨୦} ବାତେଙ୍କ୍ ଇଡ଼କେ ଦିନାମ୍ ଝାଡ଼ତେ, ବେସୁଙ୍କ୍ ବର ଆ ନାରୁଡ଼ତାଗାଙ୍କ୍ ଯେକା ଆଦତତ୍ । ଆସୁଙ୍କ୍ ଅଡ଼ ଉପବାସ ମାଡ଼ିତତ୍ ।”

^{୨୧} “ବେନ ପାଃନ୍ତେ ତକାନେ ପୁନେ କନାତେ ତାଲି ଝାଟନ୍ । ବାତେଙ୍କ୍‌ଇକେ ପୁନେ କନାତେ ତାଲି କୁଙ୍କ୍‌ସି ମିକା ସିଲେ ଅଦିକ୍ ଇକି ତିଡ଼ ।

^{୨୨} ମେଣ୍ଟେ, ବେନ ପାଃନ୍ତେ ତଲ୍‌କେଡ଼ କୁଣ୍ଡେତାଗ୍ ପୁନାଦ୍ ଦ୍ରାକ୍ଷାରସ୍ ଝାଟନ୍; ଇକେ ପୁନାଲାଦ୍ ଦ୍ରାକ୍ଷାରସ୍ ଝାଟକେ ଆଦ୍ କୁଣ୍ଡେ ପାରକ୍ ମାଡ଼ିଦତେ, ନୁ ମେଣ୍ଟେ ଦ୍ରାକ୍ଷାରସ୍ ନୁ କୁଣ୍ଡେ ରେଣ୍ଡୁଆସ ନଷ୍ଟ ଆଦତେ । ଆସୁଙ୍କ୍ ପୁଃନେ ଦ୍ରାକ୍ଷାରସ୍ ପୁଃନେ ତଲ୍‌କେ କୁଣ୍ଡେତାଗ୍ ଝାଟାନଙ୍କ୍ ଆଦତେ ।”

ରମାନୁ ଦିନାମ୍‌ରେ କାମ୍

(ମାତିଉ ୧୨:୧-୮; ଲୁକ ୬:୧-୫)

^{୨୩} ଅନ୍‌ଦିନ୍ ବିଶ୍ୱାମ୍‌ଦିନେତେ ଜିସୁ ଝେରଡ଼ କେଡ଼ ଝାନ୍ଦେତାଲାନ ନାଡ଼ମେଙ୍କ୍ ଆଞ୍ଜମାଡ଼ତଣ୍ଟ । ଅନ୍‌ତଡ଼ ଶିଷ୍ୟମତ୍ ଆଦ୍‌ଆର୍ ଆଦାନୁଞ୍ଜେଲେ ଶସ୍ୟକେଡ଼ ଦେହେତାନଙ୍କ୍ ପସ୍ତୁଡ଼ତଡ଼ ।

^{୨୪} ଫାରୁଣୀନତ୍ ଜିସୁଙ୍କ୍ କେଡ଼ତଡ଼, “ଉଡ଼ାଟ୍, ବିଶ୍ୱାମ୍‌ଦିନେତେ ମିଇ ଶିଷ୍ୟମତ୍ ମା ଶାସ୍ତ୍ରବିରୁଦ୍ଧତେ ପାଡ଼୍‌ୟି ମାଡ଼ତୁଡ଼ ।”

^{୨୫} ଜିସୁ ଅଡ଼କିଙ୍କ୍ ଉତ୍ତର ଇଡ଼ତନ୍, “ବେସୁଙ୍କ୍ ଦାଉଦ୍‌ତେ ତିନ୍ଦାନାଦ୍ ନାରଗେ ଆଡ଼ତେ, ଅଣ୍ଟ ବାଡ଼ତେ ମାଡ଼ିତନ୍, ଆଦ୍ ଗୋଟ୍‌ମିଡ଼ ବେସୁଙ୍କ୍ କାରୁଞ୍ଜିତ୍ ?”

୨୭ “ଅଣ୍ଟ ନୁ ତାନ୍ ସାଙ୍ଗନଡ଼୍ କାର୍ତ୍ତିକ୍ ଆଇନାଙ୍କ ଇଶ୍ବରତେ ମନ୍ଦିରତାର୍ ଲୋପେ ଆଞ୍ଜ ଇଶ୍ବରତେ ଉଦେଶ୍ୟତେ ଉତ୍ସର୍ଗିତ ରୁଟି ତିଞ୍ଜ ମାଡ଼ତଡ଼ । ଆବିଆଆତେ ବେଡ଼ିଇ ପୁରହିତ ମାନ୍ଦାନଖେଲେ ଇଦ୍ ଗଟନା ଗଟେମ୍ ଆସ୍ମାଡ଼ତେ । ମାୟାଦ୍ ଶାସ୍ତ୍ରଲେକାମ୍ ମାଡ଼ର୍ ପୁରହୀତନଡ଼୍ ଇଦ୍ ରୁଟି ତିନ୍ଦାନ୍ ଦରକାର୍ । ବାତେଙ୍କ ଇଡ଼କେ ଦାଉଦ୍ ନିଜେ ଇଦ୍ତିଞ୍ଜ ତାନ୍ ସାଙ୍ଗନଡ଼୍ ମିକା ଇସ୍ମାଡ଼ତନ୍ ।”

୨୮ ତାନ୍ପେକେ ଜିସୁ କେଡ଼ତନ୍, “ନାରୁଡ଼୍ ସେଙ୍ଗେ ବିଶ୍ବାମ୍ଦିନେ ଆସ୍ମିମେ, ନାରୁଡ଼୍ ବିଶ୍ବାମ୍ଦିନେ ସେଙ୍ଗେ ଆୟ୍ମୟ୍ ।

୨୯ ଆଦିଙ୍କ ନାରୁନ୍ ପିଲେ ବିଶ୍ବାମ୍ଦିନେତେ ମିକା ପ୍ରବୁ ।”

୩

କଲିକାଲ ସାୟେଆଡ଼ତେ

(ମାଡ଼ିତ ୧୨:୯-୧୪; ଲୁକ ୬:୬-୧୧)

୧ ଜିସୁ ପ୍ରାର୍ଥନା ଲୋନ୍ ମାଲ୍ସ ଆଡ଼ତନ୍ । ଆଗେ ଝେରଣ୍ଟ ନାରୁଡ଼୍ ମାଡ଼ତନ୍ । ଅନାଦ୍ କାଲ୍ ଝାସି ମାଡ଼ତେ ।

୨ ଜିସୁ ବିଶ୍ବାମ୍ ଦିନେତେ ଆ ନାରୁଙ୍କ ସୁସ୍ଥ ମାଡ଼ିଡ଼ତନ୍ କି ଇଲ୍ଲେ, ଇଦ୍ ବିଷୟତେ ଅନାଦ୍ ଦଷ୍ଟ ପଇସ୍ କାରାପ୍ ଗଟି ତତାନ୍ସେଙ୍ଗେ ବେସ୍ତୁଡ଼୍ ନାରୁଡ଼୍ ଅନ୍ପରୁ ଲେକେଡ଼ କଣ୍ଟେ ଝାଡ଼ତଡ଼ ।

୩ ଜିସୁ ଆ ନାରୁଙ୍କ କେଡ଼ତନ୍, “ନା ମୁନେ ତେଦିଝାଡ଼ା ।”

୪ ଅଣ୍ଟ ନାରୁଡ଼୍କିଂଙ୍କ ପଚାର୍ମାଡ଼ତନ୍, “ବିଶ୍ବାମ୍ଦିନେତେ ବାଆତେ ମାଡ଼ାନାଦ୍ ଟିକ୍ ନିୟମ୍ ? ବେନ୍ ଦିନ୍ ଝେରନାଦ୍ ଲେକେଡ଼ ମାଡ଼ିକାଡ଼୍ ନା କାରାପ୍ ମାଡ଼ିକା ? ଝେରନାଦ୍ ତ ଜିଞ୍ଜୁନ୍ତିଙ୍କ ରକ୍ଷା ମାଡ଼ାନାଦ୍ ନା ବିନାସ ମାଡ଼ାନାଦ୍ ? ବାତେଙ୍କ ଇଡ଼କେ ଅଡ଼୍ କଟମାଡ଼ତଡ଼୍ ।”

୫ ଜିସୁ ଅଡ଼୍ପାକେଙ୍କ କପାମ୍ ଆସ୍ ଉଡ଼ତନ୍ ନୁ ଅଡ଼ାଦ୍ ତିପାଲ୍ ହୁଦୟତିଙ୍କ ଉଡ଼ି ଦୁଃକାମ୍ ଆଡ଼ତନ୍ । ତାନ୍ପେକେ ଆ ନାରୁଙ୍କ କେଡ଼ତନ୍, “କାଲ୍ ଆମ୍ ।” ଅଣ୍ଟ କାଲ୍ ଆତାନ୍ ଝେଲେ ସୁସ୍ଥ ଆଡ଼ତେ ।

୬ ଆସୁଙ୍କ ଫାରଶୀଡ଼୍ ପ୍ରାର୍ଥନା ଲୋଡ଼ତାଗାଙ୍କ ପେଇସ୍ ଆଞ୍ଜ ଜିସୁଙ୍କ ଆଞ୍ଜକାନ୍ ସେଙ୍ଗେ “ହେରଦୀନ୍” ମାନ୍ଦେଡ଼ ନାରୁଡ଼୍ତଡ଼୍ ତିରୟତନ୍ ।

ଇଲ୍ଲେକେ ଗୁଲ୍ଲମେ ଆଞ୍ଜିନା ନାରୁଡ଼୍ ମାନ୍ଦେ

୭ ଜିସୁ ନୁ ତାନ୍ ଶିଷ୍ୟନତ୍ ଗାଲିଲୀ ଇଲକେତ୍ ଆସ୍ତ୍ରୀନାଗ୍ ଆଦତତ୍, ନୁ ନାରୁତ୍ ନାର୍ଗେମାନ୍ଦେ ଅନ୍ପେକେ ତାକ୍ତତ୍ ମେଣ୍ଡେ, ଯିହୁଦା ପ୍ରଦେଶି ।

୮ ଅତ୍ ଗାଲିଲୀ, ଯିହୁଦା, ଯିରୁଶାଲେମ୍, ଏଦୋମ୍, ଯର୍ଦ୍ଦନ ବେତମ୍ତେ ମୁନେମାନ୍ଦାନ୍ ସହର ନୁ ସୋର୍ ନୁ ସିଦୋନ୍ ସହରତେ ଗାର୍ରେମାନ୍ଦାନ୍ ନାରଦାଗାଙ୍କ୍ ଖାସ୍ ମାଡତତ୍ ।

୯ ଆଗେ ଇସର ନାରୁଡ଼ଗହଲି ଆଦତତ୍, ଯେ, ମାନ୍ଦେତାଗାଙ୍କ୍ ରକ୍ଷା ଆଦାନ୍ ସେଙ୍ଗେ ଜିସୁ ଝେରତ୍ ଓତେ ଯୋଗାଡ଼୍ ମାଡାନଙ୍କ୍ ଶିଷ୍ୟନତ୍ କେତତନ୍ ।

୧୦ ଅଣ୍ଟ ନାରଗେ ନାରୁଡ଼କିଙ୍କ୍ ସୁସ୍ଥ ମାଡତଣ୍ଟ । ନପିନ୍ନେ ମାନ୍ଦାନ୍ ନାରୁଡ଼ ଅଙ୍କ୍ ଇଟାନ୍ ସେଙ୍ଗେ ମୁନେ ଆଞ୍ଜମାଡତତ୍ ।

୧୧ ମେଣ୍ଡେ ବୁଡ଼ପଇତେ ନାରୁଡ଼ ଅଙ୍କିଙ୍କ୍ ଉଡାନ୍ ସାଙ୍ଗେ ସାଙ୍ଗେ ଅନ୍ମୁନେ ନେଲରାଲି ଗାଟିଲେଙ୍କ୍ଦେ କେସମାଡତତ୍, “ନିମେକେ ଇଶ୍ବରତେ ମାର୍ ।”

୧୨ ଅଣ୍ଟ ବେନ, ଇଦଗର୍ ବେନଙ୍କ୍ ବା କେଲମାର୍ ଇଞ୍ଜି ଜିସୁ ବୁଡ଼କିଙ୍କ୍ ଦମକ୍ ଇସ୍ କେସମାଡତତନ୍ ।

ଜିସୁନ୍ ବାରଜାନ୍ ଶିଷ୍ୟତ୍ ହେଞ୍ଜତନ୍ (ମାତିଉ ୧୦:୧-୪; ଲୁକ ୬:୧୨-୧୬)

୧୩ ତାନ୍ପେକେ ଜିସୁ ମେଟେଡ଼ପରୁ ଆଞ୍ଜି ବେନତ୍ ଇଚ୍ଛା ମାଡତୁଣ୍ଟ, ଅଡ଼କିଙ୍କ୍ ଗାର୍ରେ କାର୍ଜତନ୍ ।

୧୪ ଅଣ୍ଟ ବାରଜାନ୍ତିଙ୍କ୍ ହେଞ୍ଜିମିକା ପ୍ରେରିଡ଼ ଶିଷ୍ୟତ୍ ପେଦେର୍ ଇଡତନ୍ । ଅଡ଼କିଙ୍କ୍ ଅଣ୍ଟ କେଡତାନ୍, “ନା ତୋଡ଼୍ ମାନ୍ଦାନ୍ ନାନ୍ନେ ମିକିଙ୍କ୍ ହେଞ୍ଜି ମିନ୍ଦେନ୍ ନୁ ପ୍ରଚାର୍ ମାଡାନ୍ ସେଙ୍ଗେ ନାନ୍ନେ ମିକିଙ୍କ୍ ରତିତାନ୍ ।

୧୫ ମିଡ଼ ବୁଡ଼ଝିରସ୍ଥାନଙ୍କ୍ ଆନ୍ତେ ଅଦିକାର୍ ପାହେମ୍ ଆଦତିଡ଼ ।”

୧୬ ଅତ୍ ବାରଜାନ୍ତିଙ୍କ୍ ହେଞ୍ଜତନ୍ ଶିମୋନ୍ ଜିସୁ ଅଙ୍କିଙ୍କ୍ ପିତର୍ ଇଞ୍ଜି ପେଦେର୍ ଇଡତନ୍;

☆ ୩:୯ ମାର୍କ ୪:୧; ଲୁକ ୫:୧-୩.

୧୭ ଜେବଦୀଙ୍କ ଇରାଧୁତ୍ ମାରକ୍ ଯାକୁବ୍ ନୁ ତାନ ତାମୁଣ୍ ଯୋହନ୍ ଜିସୁ ଅଡ଼କିଂଙ୍କ ବିନେରିଗୋଷ ଇଡ଼କେ “ମାର୍ତାଗାଙ୍କ ଖାଡ଼ତେ ମାରକ୍,” ପେଦେର ଇଡ଼ତନ୍ ।

୧୮ ଆନ୍ଦ୍ରିୟ, ଫିଲିପ୍, ବର୍ତ୍ତଲମି, ମାତିଉ, ତୋମା, ଆଲ୍ଫିନ୍ ଇରାଧୁତ୍ ମାରକ୍ ଯାକୁବ୍ ନୁ ତଦିୟ, ଦେଶ୍ତିଙ୍କ ପ୍ରେମ୍ ମାଡ଼ାନ୍ ଶିମୋନ୍ ନୁ

୧୯ ଇଷକାରିୟତେ ଯିହୁଦାଲ୍ ପେରକେ ଯେ ଜିସୁନ୍ ତଡ଼୍, ବିଶ୍ୱାସଗାତକତା ମାଡ଼ତଣ୍ ।

ଜିସୁ ନୁ ବାଆଲ୍‌ଜିବୁଲ୍

(ମାତିଉ ୧୨:୨୨-୩୨; ଲୁକ ୧୧:୧୪-୨୩; ୧୨:୧୦)

୨୦ ତାନପେକେ ଜିସୁ ବେସୁଙ୍କ ଲୋନ୍ ମାଲ୍‌ତନ୍, ଆଗେମିକା ଇସର୍ ନାରୁଡ଼୍, ଗୁଡ଼ତଡ଼୍, ଯେ ଜିସୁ ନୁ ତାନଶିଷ୍ୟନଡ଼୍, ଡିନ୍‌ଆମିକା ପାର୍‌ଡ଼ଡ଼୍ ।

୨୧ ଜିସୁ ବାୟ୍ ଆଡ଼ତନ୍ ଇଞ୍ଜ ନାରୁଡ଼୍ କେତାନାଦ୍ କେଞ୍ଜି, ଜିସୁନ୍ ଆମ୍‌ନିୟନଡ଼୍ ଅଙ୍କପଇସ୍ ଆଦାନଙ୍କ ଖାଡ଼ତଡ଼୍ ।

୨୨ ✧ ଯିରୁଶାଲେମ୍ ତାଗାଙ୍କ ଖାୟ୍‌ମାନ୍ ବେସ୍‌ତୁଡ଼୍, ଦର୍ମଗୁରୁଡ଼୍, କେଡ଼ତଡ଼୍, “ବାଆଲ୍‌ଜିବୁଲ୍ ଅଂକିଙ୍କ ଅଦିକାର ମାଡ଼ତେ । ମେଣ୍ଡେ ବୁଡ଼କିନ୍ ଅଦିପତି ବୁଡ଼କ୍ ଡିରସ୍ତାନଙ୍କ ଅଂକିଙ୍କ ଶକ୍ତି ଇଡ଼ତେ ।”

୨୩ ଜିସୁ ଅଡ଼କିଂଙ୍କ କାରଜିଂ ଖେଷଡ଼ଲେକାମ୍ ବୁଜାମାଡ଼ି କେଡ଼ତାନ୍, “ଶୟତାନ୍ ବେଲାନ୍ ଶୟତାନ୍‌ଡ଼ିଙ୍କ ତୋଲାନଙ୍କ ପାରତେ ?

୨୪ ରାଜ୍ୟତେ ନାରୁଡ଼୍, ଯଦି ମାନ୍ଦା ମାନ୍ଦାଆସ୍ ନିଜେଡ଼୍ ବିରୁଦ୍‌ତେ ଯୁଦ୍ ମାଡ଼ିତଡ଼୍, ଆଦ୍ ରାଜ୍ୟ ଦୁଡ଼ା ଦୁଡ଼ା ଆଦ୍‌ତେ ।

୨୫ ଖେରଡ଼୍ ପରିବାରତେ ନାରୁଡ଼୍, ଯଦି ବେନ୍‌ବେନ୍ ମାନ୍ଦେତାଗାଙ୍କ ଡିରିମିକା ନିଜେ ନିଜେ ବିରୁଦ୍ ମାଡ଼ିତଡ଼୍, ଆଦ୍ ପରିବାର୍ ଉରଜି ଆଦ୍‌ତେ ।

୨୬ ଆଲେକେ ଯଦି ଶୟତାନ୍‌ତେ ରାଜ୍ୟ ଖେରେ ଆଦ୍‌ତେ, ଆଲେକେ ଆଦ୍ ରାଜ୍ୟ ମାନ୍ଦେପାର୍‌ଜି, ଦୁଡ଼ା ଦୁଡ଼ା ଆସ୍ ଦ୍ଵଂସ ଆଦ୍‌ତେ ।”

୨୭ ଶକ୍ତିନାରୁନ୍ ଲୋନ୍ ବେନଆୟି ନେଙ୍କି ମୁନେ ଅଂକିଙ୍କ ତଖେମାଡ଼କେ, ଅନାଦ୍ ଜିନିଷ୍ ଡ଼ଜି ଅଦେ ପାରେଡ଼ଡ଼୍ ।

୨୮ “ନାନୁନେ ମିକିଂଙ୍କ ନିଜାମ୍‌ତେ କେତୁତାନ୍ ଯେ, ସାରେ ପାପ୍ ନୁ ଇଶ୍‌ବର ଲିୟ୍ ସେଙ୍ଗେ ନାରୁଡ଼କିଂଙ୍କ ଶିମା ଇଦ୍‌ପାର୍‌ତନ୍ ।

୨୯ ☆ବାତେଙ୍କ ଇଡ଼କେ ବେନାୟି ପବିତ୍ରଆମାତିଙ୍କ ଲିୟ୍ ମାଡ଼କେ, ଅନାଦ୍ ବେସୁଙ୍କବା ଶିମାଇଲେ । ବାତେଙ୍କିକ୍‌କେ ଅନାଦ୍ ପାପ୍ ସାରେ ଦିନାମ୍ ମାନତେ ।

୩୦ ଜିସୁଙ୍କୁ ବୁଡ଼ପଇତେ ଇଞ୍ଜି ବେସକ୍‌ତୁଡ଼, କେଲ୍‌ନାଙ୍କ ଜିସୁ ଇଦ୍‌ଗର୍ କେଡ଼ତନ୍ ।”

ଜିସୁନ୍ ଯାୟ୍ ନୁ ଦାଦାଲଡ଼,

(ମାଡ଼ିଉ ୧୨:୪୭-୫୦; ଲୁକ ୮:୧୯-୨୧)

୩୧ ଆସୁଙ୍କ ଜିସୁନ୍ ଯାୟ୍ ନୁ ଦାଦାଲଡ଼, ଖାସ୍ ଖେଉଡ଼ତଡ଼ । ଅଡ଼, ବାଇଦେ ନିସ୍ ଜିସୁଙ୍କକାଗ୍ ତାତାନ୍‌ସେଙ୍ଗେ କବର୍ ରଡ଼ତଡ଼ ।

୩୨ ଜିସୁଙ୍କ ନାଗେ ନାରୁଡ଼, ତିଡ଼ିଇ କୁଦିମାଡ଼ତଡ଼ । ଅଡ଼, ଅଙ୍କ କେଡ଼ତଡ଼, “ନି ଯାୟ୍ ନୁ ଦାଦାଲଡ଼, ନୁ ଏଲାୟ୍, ନିୟ୍ ସେଙ୍ଗେ ବାଇଦେ କେପ୍‌ତଡ଼ ।” *

୩୩ ଜିସୁ ଉତ୍ତର ଇଡ଼ତନ୍, “ବେନ ନା ଯାୟ୍, ବେନ୍ ନା ଦାଦାଲଡ଼, ବେନ ନା ହେଲାଡ଼?”

୩୪ ତାନ୍ ସାରେପାକ୍ କୁଦିମାୟାନ୍ ନାରୁଡ଼କିଂଙ୍କ ଉଡ଼ି ଅଣ୍ କେଡ଼ତାନ୍, “ଉଡ଼େ ଇଡ଼, ନା ଯାୟ୍, ନୁ ଇଡ଼, ନା ଦାଦାଲଡ଼ !

୩୫ ବେନଆଇ ଇଶ୍‌ବରତେ ଇଞ୍ଜା ପାଲନ୍ ମାଡ଼ିତଡ଼, ଅନ୍ ନା ଦାଦାଲ୍, ଏଲାୟ୍, ନୁ ଯାୟ୍ ।”

୪

ଝିଜ୍ ଝିତାନ୍ ଖେଷଡ଼,

(ମାଡ଼ିଉ ୧୩:୧-୯; ଲୁକ ୮:୪-୮)

୧ ☆ସମୁଦ୍ର ଆଞ୍ଚିନା ଜିସୁ ମେଣ୍ଡନ୍ ଦାମ୍ ଶିକ୍ଷାଇଦାନଙ୍କ ଆରାମ୍ ମାଡ଼ତଣ୍ । ଜିସୁନ୍ ସାରେପାକା ଇସର୍ ନାରୁଡ଼, ଯେ ଅଣ୍ ଖେରଡ଼, ଓଡ଼େତାଗ୍ ଆଞ୍ଜ୍ କୁଦତନ୍ । ଓଡ଼େତାଗ୍ ଏରଦେ ଲୋପେ ସୁଦୁର୍ ଯେକା ମାଡ଼ତେ ନୁ ନାରୁଡ଼, ଆଞ୍ଚିନ୍ ବୁମ୍‌ତାଗ୍ ନିସ୍ ମାଡ଼ତଡ଼ ।

☆ ୩:୨୯ ଲୁକ ୧୨:୧୦. * ୩:୩୨ ଦାଦାଲଡ଼, ନୁ ହେଲାଡ଼କିଂଙ୍କ ପାସ୍ କେଡ଼ତନ୍ ☆ ୪:୧ ଲୁକ ୫:୧-୩.

୨ ଜିସୁ ଖେଷଡ଼ ଇନା ଅଡ଼କିଂଙ୍କ ନାରଗେ ଶିକ୍ଷା ଇଡ଼ତନ୍, ମେଣ୍ଡେ କେଡ଼ତଣ୍ଡ ।

୩ ଅନ୍ କେଡ଼ତନ୍, “କେଞ୍ଜାର ! ଅନ୍ଦାମ୍ ଖେରଣ୍ଡ ନାରୁଡ଼, ଖାୟେତାର୍ ଓଡ଼ାନଙ୍କ ପେଇଡ଼ତନ୍ ।

୪ ଅନ୍ ଓଡ଼ ଓଡ଼ାନଖେଲେ ଆରଦେ ପରୁ ବେସକ୍ ରାଲ୍ତା ନୁ ପିଟେ ଆଓିଙ୍କ ତିଡ଼ତା ।

୫ ମେଣ୍ଡେ ବେସକ୍ ଓଡ଼ କାଲ୍‌କିନ୍ ଖାୟେତାର୍ ରାଲ୍ତା, ଆଗେ ଅଦିକ୍ ଇଶ୍ବର ମାଣ୍ଡଲୁମାଡ଼ତେ । ଆଗେ ମାଣ୍ଡଲୁତେ ଲୋପେ ଇଲ୍‌ଖାଙ୍କ ଜାପେ ଓଡ଼ ଗାଜ୍ ଆଡ଼ତେ, ବାତେଙ୍କ ଇଡ଼କେ ମାଡ଼ା ଲୋପେ ଆଡ଼ଦେ ପାର୍‌ଖ ।

୬ ପେରକେ ପଡ଼ଦତେ ଗାଟିକାମ୍‌କେତେ ଆସ୍ତୁ ଗାଜେ ସାରେ ଖାସିଆଡ଼ତା ।

୭ ମେଣ୍ଡେ ବେସକ୍ ଓଡ଼ କୟେ ଦୀବାନାର୍ ରାଲ୍ତା । ଆସ୍ତୁ କୟେମାଡ଼ାକ୍ ପେରସି ଇସୁ ଇସୁ ଗାଜେନ୍ ପରୁ ମାନ୍‌ନାଙ୍କ ଆଗେମେଣ୍ଡେ ପେଡ଼େକ୍ ଆୟ ।

୮ ମେଣ୍ଡେ ବେସକ୍ ଓଡ଼ ଲେକେଡ଼ ଖାୟେତାର୍ ରାଲ୍ତା, ହାଉସାରେ ଗାୟେଆସ୍ ପେରସ୍ତା ନୁ ସାୟେ ଆଡ଼ତା; ବେସକ୍ ତିରିଶି ଗୁଣ, ବେସକ୍ ଷାଟିଏ ଗୁଣ ନୁ ବେସକ୍ ଶହେ ଗୁଣ ଆଡ଼ତା ।”

୯ ଜିସୁଆଦ୍ ଖେଷଡ଼ ତେରପ୍ତି କେଡ଼ତନ୍, “ବେନନାସ୍ତୁ କେଞ୍ଜାନଙ୍କ କେସ୍ତୁକ୍ ମିୟେ, ଅଣ୍ ମନ୍‌ଇସ୍ କେଞ୍ଜିନ୍ ।”

ଖେଷଡ଼ତେ ଲେକାମ୍

(ମାଡ଼ିଉ ୧୩:୧୦-୧୭; ଲୁକ ୮:୯-୧୦)

୧୦ ଜିସୁ ଖେରଣ୍ଡ ମାୟାନ୍‌ଖେଲେ କେଞ୍ଜାନଡ଼ ଆଗାଙ୍କ ବେସକ୍‌ଡ଼ତ୍, ବାର ଶିଷ୍ୟନଡ଼ ନୁ ଅନ୍ ପାକେ ବେସ୍‌ଡ଼ତ୍ ମାଡ଼ତେନଡ଼ ଅଣ୍ କେସ୍‌ମାୟାନ୍ ଖେଷଡ଼ତେ ଇଡ଼କେ ବୁଜାମାଡ଼ାଙ୍କ ଅନୁରଦ୍ ମାଡ଼ତଡ଼ ।

୧୧ ଜିସୁ ଉତ୍ତର ଇଡ଼ତନ୍, “ଇଶ୍ବରତେ ରାଜ୍ୟ ବିଶ୍ବାସତେ ମିଲପାକେ କେସ୍‌ମିୟେନ୍ । ବାତେଙ୍କ ଇଡ଼କେ ବାଗାତଡ଼କିଙ୍କ ଇସ୍ତୁ ସୁଦୁଟ୍ ଖେଷଡ଼ତେ ଲେକାମ୍ କେଡ଼ତଡ଼ ।

୧୨ ଆଦିନ୍ ସେଜେ, ଅଡ଼ ଉଡ଼ଡ଼ ମାନ୍‌ଡ଼ତ୍ ଇଡ଼କେ ବାତେଏ ଉଡ଼େ ପାର୍‌ଖଡ଼ । ସାରେ ଗଟି କେଞ୍ଜିମାନ୍ତଡ଼, ବାତେଙ୍କ ଇଡ଼କେ ବାତେଏ ବୁଜେମ୍ ଆୟୟଡ଼; ଅଡ଼ ଯଦି ପ୍ରକୃତେ ଉଡ଼େଡ଼ ନୁ

ବୁଜେମ୍ ଆୟେଡ଼, ଅଡ଼ ଇଶ୍ବରତେ ପାକେ ମାଲ୍‌ସ୍ ଖାତେଡ଼, ନୁ ଇଶ୍ବର
ଅଡ଼କିଙ୍କ୍ କ୍ଷମା ଇଞ୍ଜେଣ୍ଡ ।”

ଝିଜ୍ ଝିତାନ ଝେଷଡ଼ତେ ଲେକାମ୍

(ମାଡ଼ିଉ ୧୩:୧୮-୨୩; ଲୁକ ୮:୧୧-୧୫)

୧୩ ଜିସୁ ଅଡ଼କିଙ୍କ୍ ପଚାରମାଡ଼ତନ୍, “ଇଦ୍ ଝେଷଡ଼ତେ ଇଡ଼କେ
ବାତେଏ ବୁଜେମ୍ ଆୟ୍‌ଝିଡ଼ ? ଆଲେକେ ମେଣ୍ଡନ୍ ଝେଷଡ଼,
ସାରେଡ଼ିଙ୍କ୍ ବୁଜେମ୍ ଆଦତିଡ଼ ବେଲାନ ?

୧୪ ଇଶ୍ବରତେ ଗର୍ ପଚାରମାଡ଼ାନଡ଼, ଝିଜ୍ ଝିତାନନ୍ ଲେକାମ୍ ।

୧୫ ଆରଦାଗ୍ ରାଲିମାନ୍ଦାନ୍ ଝିଜେଲେକାମ୍ ଆଦ୍ ଗର୍ଡ଼ିଙ୍କ୍
ବେସ୍‌କଡ଼ୁଡ଼, ନାରୁଡ଼, ଗ୍ରହନ୍ ମାଡ଼ିତଡ଼ । ବାତେଙ୍କ୍ ଇଡ଼କେ ଅଡ଼,
କେଞ୍ଜାନ୍ ସାଙ୍ଗେ ସାଙ୍ଗେ ଶୟତାନ ଅନାଦ୍ ଡ଼ଙ୍ଗିଆଦତେ ।

୧୬ କାଲକିନ୍ ଖାୟେତାଗ୍ ରାଲିମାନ୍ଦାନ୍ ଝିଜେଲେକାମ୍ ଆଦ୍
ଗର୍ଡ଼ିଙ୍କ୍ ବେସ୍‌କଡ଼ୁଡ଼, ନାରୁଡ଼, କେଞ୍ଜିତେ ଝେଲେ ଝେଡ଼କେତେ ଗର୍
ଗ୍ରହନ୍ ମାଡ଼ିତଡ଼,

୧୭ ବାତେଙ୍କ୍ ଇଡ଼କେ ବିଶ୍ବାସତେ ଆଦ୍ ହୃଦୟଙ୍ଗମ ମାଡ଼ୁଞ୍ଜାଙ୍କ୍ ଅଡ଼,
ଆଗାଙ୍କ୍ ତିଆରତେ ମାନନ୍ଦେ ପାରୁଡ଼, ନୁ ଆଦ୍ ଗର୍ ସେଙ୍ଗେ ବେସୁଙ୍କ୍
ଦୁଃକାମ୍ କଷ୍ଟ ନୁ ଉଡ଼ପିଡ଼ିତ ଖାସ୍‌ହେଉତେ, ଅଡ଼ାଦ୍ ଦଂସ ଆଦତେ
।

୧୮ କୟେ ଦିବାନାଗ୍ ରାଲିମାନ୍ଦାନାଞ୍ଜୁ ଝିଜେଲେକାମ୍ ଆଦ୍ ଗର୍ଡ଼ିଙ୍କ୍
ମେଣ୍ଡେ ବେସ୍‌କଡ଼ୁଡ଼, ନାରୁଡ଼, କେଞ୍ଜିତଡ଼,

୧୯ ବାତେଙ୍କ୍ ଇଡ଼କେ ସଂସାରତେ ଚିନ୍ତେ, ଡାବକିନ୍ ଆସେ
ନୁ ଲେକେଡ଼ାଞ୍ଜୁ ବେଶିତାଞ୍ଜୁ ଲାଲିସା ତାମ୍ ମାନତାଗ୍ ମାନନାଙ୍କ୍
ମାଡ଼ାନଙ୍କ୍ ଆଦ୍ ଗର୍ ବେସୁଙ୍କ୍‌ବା କାୟେ ଆଦ ।

୨୦ ଲେକେଡ଼ ଖାୟେତାଗ୍ ରାଲିମାନ୍ଦାନ୍ ଝିଜେଲେକାମ୍, ଆଦ୍
ଗର୍ଡ଼ିଙ୍କ୍ ମେଣ୍ଡେ ବେସ୍‌କଡ଼ୁଡ଼, କେଞ୍ଜି ଗ୍ରହନ୍ ମାଡ଼ିତଡ଼, ନୁ ଜିଝେଡ଼ାଗ୍
ବେନ ତିରିଶ୍ ଗୁଣ୍, ବେନ ଷାଟିଏ ଗୁଣ୍ ନୁ ବେନ ଶହେ ଗୁଣ୍ କାୟା
ଆଦଡ଼ିତା ।”

ବଡ଼ତେ ମଦଲ୍ ଝେସ୍

(ଲୁକ ୮:୧୬-୧୮)

୨୧ ଝିଜୁ ମେଣ୍ଡେ କେଡ଼ତଣ୍ଡ, ବେନ ବାଡ଼ତେ କୁପିଡ଼ିଙ୍କ୍ ନିଡ଼ସ୍‌ପି

ବଡ଼ ମଦଲ ମୁସସି ଖାଟିତନ୍ ବା କାରୁଲ ମଦଲ ଖାଟିତନ୍ ? ଆଦ ବାଡ଼ତେ ଖେସ୍‌ଖାଟାନ୍ ପରୁ ଖାଟାନଙ୍କ ଆୟ୍‌ୟ ?

୨୨ ☆ବାତେଏ ମିଞ୍ଜି ମିନ୍ଦେ, ଆଦ ପ୍ରକାଶ୍ ଆଦତେ; ବାତେଏ ତନ୍‌ମିନ୍ଦେ, ଆଦ ବେସୁଙ୍କ ବା ତନ୍ ।

୨୩ ବେନଙ୍କ କେଞ୍ଜାନଙ୍କ କେଝୁ ମିନ୍ଦେ, ଅନ୍ କେଞ୍ଜିନ୍ ।

୨୪ ☆ଜିସୁ ଅଡ଼କିଂଙ୍କ କେଡ଼ତାନ୍, “ବାଡ଼ତେ କେଞ୍ଜିଡ଼ିଡ଼ି, ଆଦିନ୍ ସେଙ୍ଗେ ମାନ୍‌ଇସ୍ କେଞ୍ଜାନଙ୍କ ମାନ୍‌ରୁ । ବେନ୍‌ବାଡ଼ତେ ମିଡ଼୍‌ବାଗାତଡ଼୍, ବିଚାର୍ ମାଡ଼ାର୍, ଆଦ ବାଡ଼ତେ ବାତେଙ୍କ ଇଡ଼କେ ଅଦିକ୍ କଷ୍ଟତେ ଇଶ୍‌ର ମିୟାଦ୍ ବିଚାର୍ ମାଡ଼ିତନ୍ ।

୨୫ ☆ବେନନାଉ ମିନ୍ଦେ, ଅଂକିଙ୍କ ଅଦିକ୍ ଇଦ୍‌ତନ୍ । ବେନନାଉ ଇଲା, ଅନାହୁ ବାତେସାରେ ମିନ୍ଦେ, ଆଦ ମିକା ଟେଣ୍ଡିଆଦ୍‌ତନ୍ ।”

ଅଙ୍ଗୁର୍ ନାଗେଆଦାନ୍ ଖେଷଡ଼୍

୨୬ ଜିସୁ କେତାନଙ୍କ ପସ୍ତତନ୍; ଇଶ୍‌ରତେ ରାଜ୍ୟତେ ଆସର୍ ଇଦ୍‌ଲେକାମ୍ । ଖେରନ୍ ନାରୁନ୍ ଖାୟେତାଗ୍ ଖିତିତନ୍ ।

୨୭ ନାର୍‌କେଡ଼ ଉଞ୍ଜାଙ୍କ ଆଦ୍‌ତନ୍ ନୁ ପାୟାଲ୍ କେପିତନ୍, ବାତେଙ୍କ ଇଡ଼କେ ଖିଜ୍ ଗାଜେଆସ୍ ବେଲାନ୍ ନାର୍‌ଗେ ଆଦ୍‌ତେ, ଆଦ୍ ଅଣ୍ ପୁନଶ୍ଚ ।

୨୮ ମାଡ଼େ ପେର୍‌ସି କାୟାଆଦାନ୍ ସେଙ୍ଗେ ମାଣ୍ଡଲୁଏକେ ସାରେ ମାଡ଼ିତେ, ମୁନେଙ୍କ ମାଡ଼େତେ ଚିଟି, ତାନ୍‌ପେକେ କଡ଼ସିଡ଼ ନୁ ପେରକେ କେଡ଼ତାଗ୍ ପେଡ଼େକ୍ ଆଦ୍‌ଦିଡ଼ତା ।

୨୯ ପେଡ଼େକ୍ ପାଣ୍ଡି କଇଦାନ୍ ଦିନାମ୍ ହେଉକେ; ଅଣ୍ ଏଟାକେସେର୍ ପଇସ୍ କଇଦ୍‌ତନ୍ ।

ସୋରିଷ ପେଡେମ୍‌ତେ ଖେଷଡ଼୍

(ମାଡ଼ିଉ ୧୩:୩୧-୩୨, ୩୪; ଲୁକ ୧୩:୧୮-୧୯)

୩୦ ଜିସୁ କେଡ଼ତଣ୍ଡ ; ଇଶ୍‌ରତେ ରାଜ୍ୟତଡ଼୍ ବେନଙ୍କ ସାମାନ୍ ମାଡ଼ାନଙ୍କ ଆଦ୍‌ତେ ? ଅଂକିଙ୍କ ବୁଜାମାଡ଼ାନ୍ ସେଙ୍ଗେ ବାତେଏ ଖେଷଡ଼୍, କେଡିତାନ୍ ?

☆ ୪:୨୨ ମାଡ଼ିଉ ୧୦:୨୭; ଲୁକ ୧୨:୨. ☆ ୪:୨୪ ମାଡ଼ିଉ ୭:୨; ଲୁକ ୭:୩୮. ☆ ୪:୨୫ ମାଡ଼ିଉ ୧୩:୧୨; ୨୫:୨୯; ଲୁକ ୧୯:୨୭.

୩୧ ଇଦ୍ ଶେଷତଃ ଗର୍ବ ପେଡ଼େମ୍ ଲେକାମ୍ । ଗର୍ବ ପେଡ଼େମ୍ ଗାଟି ସୁଦୁରାଦ୍ ଆକେ ମିକା,

୩୨ ମାଣ୍ଡୁଲୁତାଗ୍ ରାଲ୍‌କେ ଆଦ୍ ବେଡ଼ିୟାଦ୍ ମାଡେ ଆସ୍ କମା ଆଦ୍‌ତେ ନୁ ବେଡ଼ିୟାଦ୍ ମାଡେ ଲେକାମ୍ ତିଆରାଆଦ୍‌ତେ ନୁ ପିଟେ ତାନ୍ ତୁଉକାନାଗ୍ ବାସେ ମାନ୍‌ତା ।

୩୩ ଇଦ୍‌ଲେକାମ୍ ନାରଗେ ଶେଷତଃ ଗଟି କେସ୍ ଜିସୁ ଅନାସୁ ଗଟି ପ୍ରଚାର ମାଡ଼ତଣ୍ଡ; ଅଡ୍ ବେସର୍ ବୁଜେମ୍ ଆଡ଼ତଡ଼, ଅଣ୍ଡ ଆସର୍ କେସ୍‌ମାଡ଼ତନ୍ ।

୩୪ ଶେଷତଃ ଜିଡ଼ସି ଅନ୍ ଅଡ଼କିଂଙ୍କ କେତାନାଦ୍ ଇଞ୍ଜେମାଡ଼ତନ୍ । ବାଡେଙ୍କ ଇଡ଼କେ ମାତର୍ ଶିଷ୍ୟନଡ଼ତଡ଼ ମାୟାନ୍ ଶେଲେ ଅନ୍ ଅଡ଼କିଂଙ୍କ ସାରେ ଗଟି କେସ୍ ମାଡ଼ତଣ୍ଡ ।

ଜିସୁ ଗାଲ୍, ଖାନାତିଙ୍କ ଶାନ୍ତି ମାଡ଼ତଣ୍ଡ
(ମାତିଡ ୮:୨୩-୨୭; ଲୁକ ୮:୨୨-୨୫)

୩୫ ଆଦ୍ ଦିନ୍ ମୁଲ୍‌ପୁର୍ ଜିସୁ ଶିଷ୍ୟନଡ଼କ୍ କେଡ଼ତନ୍, “ଦାଟିର୍, ମାନାଡ଼ ବେଡ଼େମ୍ ଆପାକ୍‌କେ ଆଦିକାଡ଼ ।”

୩୬ ଅନ୍‌ଦିନେ ଅଡ଼ ନାରୁଡ଼କ୍ ଜିଡ଼ସି ଓଡେତାଗ୍ ଆଞ୍ଜ କୁଦତଡ଼ । ଆଗାଙ୍କ ଜିସୁ ମୁନେକେ କୁଦିମାଡ଼ତଣ୍ଡ । ଅଡ଼ ଓଡେତିଙ୍କ କଅତାନଙ୍କ ପସ୍‌ପଡ଼ ତଡ଼ । ବେଡ଼େମ୍‌ତାଗ୍ ମେଣ୍ଡେ ନାରଗେ ଓଡା ମାଡ଼ତା ।

୩୭ ହଟାଡ଼ ଗାଟି ଗାଲ୍ ଖାଡ଼ତେ ନୁ ଓଡେଡ଼ ଲୋପେ ତଲ୍‌କଡ଼ତେ ଏର୍ ଓଡେତାଗ୍ ନିଣ୍ଡାନଙ୍କ ପସ୍ପଡ଼ତେ ।

୩୮ ଜିସୁ ଓଡେଡ଼ ପେର୍‌କେଡ଼ ପାକେ ବାଲିସ୍‌ତେ ପରୁ ତାଲେଖାଟି ଉଞ୍ଜିମାଡ଼ତନ୍ । ଶିଷ୍ୟନଡ଼ ଅଙ୍କ ତେସ୍ କେଡ଼ତଡ଼, “ଗୁରୁ, ମାମ୍‌ମେ ମୁଡ଼ହି ତଲିତମ୍, ନିୟାଦ୍ ବାଡେଏ ଚିନ୍ତାଲଲେ ?”

୩୯ ଜିସୁ ନିସ୍‌ମିକା ଗାଲ୍‌ଦିଙ୍କ ଦମକ୍‌ଇସ୍ କେଡ଼ତନ୍, “ଶାନ୍ତି ଆୟିମ୍,” ନୁ ତଲ୍‌କଡ଼ତିଙ୍କ କେଡ଼ତନ୍, “ସୁସ୍ଥିର ଆୟିମ୍ ।” ହଟାଡ଼ ଗାଲ୍ ମାଦ୍‌ତେ ନୁ ସାରେ ଶାନ୍ତି ଆଡ଼ତେ ।

୪୦ ତାନ୍‌ପେର୍‌କେ ଜିସୁ ଶିଷ୍ୟନଡ଼କ୍ ପଚାର୍‌ମାଡ଼ତନ୍, “ବାଡ଼ତିଙ୍କ ଆସର୍ ଶେର୍‌ଦୁଡ଼ିଡ଼ ? ଇଞ୍ଜେକ୍ ଆଇନା ବାଡେଏ ମିୟାଦ୍ ବିଶ୍ୱାସ୍ ଲଲେ ?”

୪୧ କିନ୍ତୁ ଅଡ଼, ଗାଟି ଝେରସ୍ ମିକା ତାମେ ତାମେ କେତେତଡ଼, ଇ ନାରୁଣ୍ ବେନ ? ଏର ନୁ ଗାଲ୍ ଅନ୍ ଗଟି ମାନେମ୍ ଆଦତା ।



ବାହିନୀ ବୁଡ଼ପଇତେ ନାରୁଙ୍କ ଜିସୁ ସାୟେ ମାଡ଼ତନ୍
(ମାତିଉ ୮:୨୮-୩୪; ଲୁକ ୮:୨୬-୩୯)

୧ ଜିସୁ ନୁ ତାନ୍ ଶିଷ୍ୟନଡ଼, ଗାଲିଲୀ ବେଡେମ୍ ମେଣ୍ଡୁନ୍ ପାକେ ଗରାଶୀୟନଡ଼ ନାନ୍ଦାଗ୍ ହେଉଡ଼ତଡ଼ ।

୨ ଜିସୁ ଓଡେତାଗାଙ୍କ ଡିଗାନ୍ ସାଙ୍ଗେ ସାଙ୍ଗେ ଆଗେ ମାନ୍ଦାନ୍ କବର୍ ବା ପାଡ଼କିନ୍ ଲୋପେଙ୍କ ଝେରନ୍ ବୁଡ଼ପଇତେ ନାରୁନ୍ ଝାସ୍ ଅଙ୍କ କାଈଲ୍ତନ୍ ।

୩ ଅଣ୍ଡ ଝିସ୍କିନାଗ୍ ମାନ୍ନୁନ୍ । ବେନ ଅଙ୍କ ଇକ୍ଲେମ୍ତ ମିକା ତଅଡ଼ତେ ପାର୍ଡ଼େ ମାନ୍ମାନ ।

୪ ଅଣ୍ଡ କାଈକିନାଉ ଇକ୍ଲେମ୍ ଦେହେସ୍ ମାଡ଼ତନ୍ ନୁ ତେକାନ୍ ବେଡି ଉଝୁସ୍ ମାନ୍ନୁନ୍ । ଅନାହୁ କାଈକ୍ ତେକା ଇକ୍ଲେକ୍ ତହସ୍ ମାଡ଼ତଡ଼ । କିନ୍ତୁ ଅଙ୍କ ପଇତାନ୍ ସେଙ୍ଗେ ବେନନାଦ୍ ଶକ୍ତି ଇଲ୍ଲେ ।

୫ ଅଣ୍ଡ ନାର୍କା ପାୟାଲ୍ ମେଟାନାଗ୍ ନୁ ଝିସ୍କିନାଗ୍ ଉତମାନ୍ନୁନ୍, କିଡ଼କି ମିକା କାଈକିନାଗ୍ ନିଜେଡ଼ ମେନ୍ଦୁଲ୍ତିଙ୍କ୍ ଚିହ୍ନା ମାଡ଼ମାଡ଼ତଣ୍ଡ ।

୬ ସୁଦୁର୍ ଯେକା ଜିସୁଙ୍କ ଉଡି ଅଣ୍ଡ ମିରିଝାସ୍ ଅନ୍ ମୁନେ ମର୍ମିଣ୍ଡା ଇସ୍,

୭ ଗାଟିଲେଙ୍ଗ୍ଦେ କେଡ଼ତାନ୍, “ହୋ ସର୍ବୋପରିଷ୍ଟ ଇଶ୍ବରତେ ମାର୍ ଜିସୁ ! ନା ପାକେ ନିୟାଦ୍ ବାତେ ପାଡ଼ୟି ? ଇଶ୍ବରତେ ପେଦେରତେ କେଡ଼ତାନ୍, ନାକିଙ୍କ୍ ଯନ୍ତ୍ରଣା ଇମା ।”

୮ ଅଣ୍ଡ ଇଦ୍ଗର୍ କେଡ଼ତନ୍, ବାତେଙ୍କ୍ ଇଡ଼କେ ଆସୁଙ୍କ୍ ଅନାଗେ ମାନ୍ଦାନ୍ ବୁଡ଼କିଙ୍କ୍ ପେଇସ୍ ଆଦାନ୍ ସେଙ୍ଗେ କେସମାଡ଼ତନ୍ ।

୯ ଜିସୁଅଙ୍କ୍ କେଡ଼ତନ୍, “ନି ପେଦେର୍ ବାଡ଼ତେ ?” ଅଣ୍ଡ ଉଉର୍ ହିଡ଼ତନ୍, “ନା ପେଦେର୍ ବାହିନୀ ।”

୧୦ “ମାମେ ନାଗେ ।” ଆଞ୍ଜିକିଙ୍କ୍ ଆଦ୍ ନାରଦାଗାଙ୍କ୍ ଯେକା ତଲ୍ମାର୍ ଇଞ୍ଜ ଅଣ୍ଡ ଜିସୁଙ୍କ୍ କେତାନଙ୍କ୍ ପସ୍ତତନ୍ ।

୧୧ ଗାରରେ ମାନ୍ଦାନ୍ ମେଟେତାଗ୍ ମାନ୍ଦେ ପାଦି ମେୟ ମାଡ଼ତା ।

୧୨ ବୁଡ଼କ ଜିସୁଙ୍କ ଅନୁରଦ୍ ମାଡ଼ି କେଡ଼ତା, “ଆସୁ ପାଦି ମାନ୍ଦେ ଲୋପେ ନେଙ୍ଗାନ୍ ସେଙ୍ଗେ ମାକିଙ୍କ ଇମ୍ ।”

୧୩ ଜିସୁ କେସ୍ ଇଡ଼ତନ୍ ନୁ ବୁଡ଼କ ଆ ନାରୁନାଗାଙ୍କ ପେଇସ୍ ଝାସ୍ ପାଦି ମାନ୍ଦେ ଲୋପେ ନେଙ୍ଗାନ୍ ନୁ ସାରେ ରେଣ୍ଡୁହଜାର୍ ପାଦି ଗାଟି ଉରଗିଙ୍କ ମିରି ମେଟେଡ଼ ଜୁଟିନାଗାଙ୍କ ରାଲୁଲି ମୁଡ଼ି ତଲ୍ଲତା ।

୧୪ ପାଦିଙ୍କ କେପାନଡ଼୍ ମିରିଆଞ୍ଜ ଇଦ୍ କବର୍ ସହର୍ ନୁ ଗାରେମାନ୍ଦାନ୍ ନାକିନାଗ୍ କେସ୍ସିଡ଼ତଡ଼୍ । ବାତେ ଗଟେମ୍ ଆଡ଼ତେ, ଉଡ଼ାନଙ୍କ ନାଗେ ନାରୁଡ଼୍ ଆଡ଼ତଡ଼୍ ।

୧୫ ଅଡ଼୍ ଉଡ଼ତଡ଼୍ ଯେ ବୁଡ଼ପଇତେ ନାରୁନ୍ ତକା କେର୍ସ୍ ଲେକେଡ଼ ତିଆର୍ ଆସ୍ ଜିସୁନ୍ ଗାରେ କୁଦ୍ତନ୍ । ଆଦ୍ ଉଡ଼ି ଅଡ଼୍ ବାକ୍ଝା ଆଡ଼ତଡ଼୍ ।

୧୬ ବୁଡ଼ପଇତେ ନାରୁନ୍ ବେଲାନ୍ ସୁସ୍ଥ ଆଡ଼ତନ୍ ନୁ ପାଦି ବେଲାନ୍ ନଷ୍ଟ ଆସ୍ ମାଡ଼ତା, ଇଞ୍ଜୁସାରେ ଗଟ୍ନା ଉଡ଼ିମାନ୍ଦାନ୍ ନାରୁଡ଼୍ ଅଡ଼କିଂଙ୍କ କେଡ଼ତଡ଼୍ ।

୧୭ ଆଦ୍ କେଞ୍ଜି ଅଡ଼୍ ଜିସୁଙ୍କ ଆଦ୍ ନାର୍ ଝିଡ଼ସି ଆଦାଙ୍କ କେଡ଼ତଡ଼୍ ।

୧୮ ଜିସୁ ଓଡେତାଗ୍ ତାରେନଙ୍କ ଆଦାନ୍ ଝେଲେ ବୁଡ଼ତାଗାଙ୍କ ରକ୍ଷା ଆସ୍ମାନ୍ଦାନ୍ ନାରୁଣ୍ଡ୍ ଅନ୍ତଡ଼୍ ଆଦାନ୍ ସେଙ୍ଗେ କେଡ଼ତନ୍ ।

୧୯ ଜିସୁ ଅଙ୍କ ତାନ୍ତଡ଼୍ ଆଦାଙ୍କ ଇଞ୍ଜକର୍ କେଡ଼ତନ୍, “ଲେକେଡ଼ ମିଇ ଲୋନ୍ ମୀଇ ନାରୁଡ଼୍ ପାକେ ମାଲ୍ସ୍ ଆନ୍ । ପ୍ରବୁ ନିଇ ସେଙ୍ଗେ ବାଡ଼ତେ ସାରେ ମାଡ଼ତନ୍ ନୁ ନିଇ ମାଲ୍ଦିଙ୍କ ବେନ୍ ଦୟା ତଡ଼ତନ୍, ଇଦ୍ ଗର୍ ଅଡ଼କିଂଙ୍କ କେଲ୍ମ୍ ।”

୨୦ ନାରୁଣ୍ଡ୍ ଦେକାପଲ୍ ଅଞ୍ଚଲ୍ତା ଆଞ୍ଜ୍ ଜିସୁ ଅନ୍ସେଙ୍ଗେ ବାତେ ମାଡ଼ିମାଡ଼ତନ୍, ସାରେପାକେ କେଡ଼ତନ୍ । ବେନଡ଼୍ ଅନ୍ ଗଟି କେଞ୍ଜିତଡ଼୍ ସାରେତଡ଼୍ ବାକ୍ଝା ଆଡ଼ତଡ଼୍ ।

ନାଗାଡ଼୍ ସୁସ୍ଥ ଆଡ଼ତେ ଯାଇରସ୍ତେ ମାୟାଡ଼୍ ଗେଲ୍ସ୍ତେ

(ମାଡ଼ିଉ ୯:୧୮-୨୬; ଲୁକ ୮:୪୦-୫୬)

୨୧ ଜିସୁ ବେଡେମ୍ତେ ମେଣ୍ଡନ୍ ପାକେ ମାଲ୍ସ୍ ଆଡ଼ତନ୍ । ଆ ସମୁଦ୍ର ଆଞ୍ଚିନାଗ୍ ନାଗେ ନାରୁଡ଼୍ ଅଙ୍କ ତିଡ଼ିୟି ନିସ୍ ଗୁଡ଼ତଡ଼୍ ।

୨୨ ଆଗେମାନ୍ଦାନ୍ ଲୋଡ଼ତେ ଯାଇରସ୍ ପେଦେଡ଼ତନ୍ ଝେରଣ୍ଡ୍ ନାରୁଣ୍ଡ୍ ଆଗେ ହେଉଡ଼ତନ୍,

୨୩ ନୁ ଜିସୁଙ୍କ ଉଡ଼ି ଅନ୍ ତେକାନ୍ ମଦଲ୍ ରାଲି ହୁଦୟତେ ନିବେଦନ୍ ମାଡ଼ତନ୍, “ନା ମାୟାଡ଼୍ ନାର୍ଗେ ରୋଗ୍‌ତେ ମିନ୍ଦେ । ନିମେ ଖାସ୍ ତାନ୍ ପରୁ କାଜ ଖାଟ୍‌କେ, ଆଦ୍ ସାୟେ ଆସ୍ ଗେଲ୍‌ସିଡ଼ ।”

୨୪ ଜିସୁ ଅନ୍‌ତୋଡ଼୍ ଆଦାନଙ୍କ୍ ପେଇଡ଼ତନ୍ । ନାର୍ଗେ ମୁଲ୍ ନାରୁଡ଼୍, ଅନ୍‌ତଡ଼୍ ଆଞ୍ଜମାଡ଼ତଡ଼୍ ଯେ ଅନ୍ ପରୁ ଅଡ଼୍ ସାରେପାକେଙ୍କ୍ ତାଲ୍‌ଗି ରାୟମାଡ଼ତଡ଼୍ ।

୨୫ ଝେରଡ଼୍ ମୁଡ଼ତେ ପ୍ରାୟ ବାର ହେଣ୍ଡେକ୍ ପୟିସ୍ ନେତୁର୍ ପେଇତାନ୍ ରୋଗ୍‌ତେ ଗାଟି ତିପାଲ୍ ଆସମାଡ଼ତେ ।

୨୬ ନାର୍ଗେଦାମ୍ ସାୟେ ମାଡ଼କେ ମିକା ସାୟେ ଆଞ୍ଜେ ମାଡ଼ତେ, ତାନାଉ ସାରେ ଡାବ୍‌କ୍ ତେରମାଡ଼ତେ ମିକା, ରୋଗ୍ ଲେକେଡ଼୍ ଆୟ୍‌ଞ୍ଜେ ମାଡ଼ତେ ନୁ ନାର୍ଗେ ଆସମାଡ଼ତେ ।

୨୭ ଆଦ୍ ଜିସୁନ୍ ବିଷୟତେ କେଞ୍ଜିମାଡ଼ତେ ନୁ ନାରୁଡ଼୍ ଗହଲି ଲୋପେଙ୍କ୍ ଜିସୁନ୍, ସିଲେତିଙ୍କ୍ ହିଟ୍‌ତେ,

୨୮ ପେକେଙ୍କ୍ ଖାସ୍ ଆଲ୍‌ସମାଡ଼ତେ, “ନାନେ ଯଦି ଅନାଦ୍ ସିଲେତିଙ୍କ୍, ହିଟ୍‌କେ ନାନେ ସାୟେ ଆଦ୍‌ତାନ୍ ।”

୨୯ ଆଦ୍ ଜିସୁନ୍ ସିଲେତିଙ୍କ୍ ଇଟ୍‌ତେ ସାଙ୍ଗେ ସାଙ୍ଗେ ତାନାଦ୍ ନେତୁର୍ ପେଇଡ଼ାନାଦ୍ ବନ୍ଦ ଆଡ଼ତେ ନୁ ଆଦ୍ ରୋଗ୍‌ତାଗାଙ୍କ୍ ସାୟେ ଆଡ଼ତେ ଇଞ୍ଜ ଏକେ ମାଡ଼ତେ ।

୩୦ ଆସୁଙ୍ଗେ ଜିସୁ ଅନାଗାଙ୍କ୍ ଶକ୍ତି ପେୟିସ୍ ଆଦାନାଦ୍ ପୁଡ଼ତନ୍ ନାରୁଡ଼୍ ପାକେ ମିଡ଼୍‌ନ୍ ମିକା କେଡ଼ତନ୍, “ବେନ ନା ସିଲେତିଙ୍କ୍ ଇଟ୍‌ତନ୍ ?”

୩୧ ତାନ୍ ଶିଷ୍ୟନଡ଼୍ ଉତ୍ତର ହିଡ଼ତଡ଼୍, “ନିମେ ତ ଉଡ଼ମିନ୍ଦେନି, ବେଲାନ ନି ସାରେ ପାକା ନାରୁଡ଼୍‌ମାୟେ ଆସ୍‌ମିନ୍ଦେଡ଼୍ । ନିକିଙ୍କ୍ ବେନ ଇଟ୍‌ତନ୍ ଇଞ୍ଜ କେସମିନ୍ଦେନି ବାଡ଼ତିଙ୍କ୍ ?”

୩୨ କିନ୍ତୁ ବେନ ଅଙ୍କ୍ ଇଟ୍‌ତନ୍, ପୁନ୍ଦାନ୍ ମାଇଦିଙ୍କ୍ ଜିସୁ ସାରେ ପାକ୍‌କେ ଉଡ଼ତନ୍ ।

୩୩ ସାରେ ଗଟି ପୁନ୍ଦେପାର୍‌ସ୍ ଆ ନାଟାଡ଼୍ ଝେରଗିଙ୍କ୍ ଜିସୁନ୍ ତେକାନ୍ ମଦଲ୍ ମର୍‌ମିଣ୍ଡା ଇସ୍ ସାରେ ସଡ଼ ଗଟି କେଡ଼ତେ ।

୩୪ ଜିସୁ ଆଦିଙ୍କ୍ କେଡ଼ତନ୍, “ପିକି ! ନିୟାଦ୍ ବିଶ୍ୱାସ୍ ନିକିଙ୍କ୍ ସୁସ୍ଥ ମାଡ଼ତେ । ସାରେତାଗାଙ୍କ୍ ସାୟେ ଆସ୍ ଶାନ୍ତିତେ ମାଲ୍‌ସ୍ ଅନ୍ ।”

୩୫ ଜିସୁ ଇଦଗର୍ କେତାନ୍ ଖେଲେ, ଯାଇରସ୍ତେ ଲୋଡ଼ତେ କଞ୍ଜି କବର୍ ତାସ୍ ମାନ୍ଦାନ୍ ନାରୁଡ଼୍ ଅଙ୍କ କେଡ଼ତଡ଼୍, “ନି ମାୟାଡ଼୍, ଡଲିଆଡ଼ତେ, ମେଣ୍ଡେ ବାଡ଼ତିଙ୍କ୍ ଗୁରୁଙ୍କ୍ ତିପାଲ୍ ମାଡ଼ଡୁନ୍ ।”

୩୬ ଜିସୁ ଅଡ଼ାସ୍ତୁ ଗଟିଙ୍କ୍ କେଞ୍ଜିମିକା ଯାଇରସ୍ତିଙ୍କ୍ କେଡ଼ତନ୍, “ଝେର୍ମା; ମାତର୍ ବିଶ୍ବାସ୍ ମାଡ଼େ ।”

୩୭ ତାନ୍ ପେକେ ଯାକୁବ୍, ତାନ୍ ତାମୁଣ୍ ଯୋହନ୍ ନୁ ପିତର୍ତିଙ୍କ୍ ଝିଡ଼ସି ସାଙ୍ଗେତେ ମେଣ୍ଡେ ବେନଙ୍କ୍ ଆୟକର୍ ଜିସୁ ଯାଇରସ୍ତେ ଲୋନ୍ ଆଡ଼ତଣ୍ ।

୩୮ ଆଗେ ହେଉସ୍ ଅଣ୍ ଉଡ଼ତନ୍, ନାଟା ଗାଟିଲେଙ୍ଗ୍ଦେ କେୟ ମାଡ଼ତା,

୩୯ ଆଦ୍ ମାନ୍ଦେତିଙ୍କ୍ ଆଞ୍ଜି ଆଞ୍ଜିଙ୍କ୍ କେଡ଼ତନ୍, “ବାଡ଼ତିଙ୍କ୍ ମର୍ ଆଡୁତିଡ଼୍? ବାଡ଼ତିଙ୍କ୍ କେୟୁତିଡ଼୍? ପିକିଡ଼୍ ତଲ୍ଲ, ଉଞ୍ଜେତେ ।”

୪୦ ଅଡ଼୍ ଅଙ୍କ୍ ବାକ୍‌ଝାଲ୍ ଆଲ୍‌ସି କାସ୍ତୁଡ଼ତଡ଼୍ । ଜିସୁ ସାରେତଡ଼କ୍ ପେସ୍ପିଡ଼ତନ୍ ନୁ ମାତର୍ ନିଜେଡ଼ ମୁଝୁଡ଼୍ ଶିଷ୍ୟ ନୁ ପିଲେଡ଼ ଯାୟ ବାବାଙ୍କ୍ ଆସ୍ ଆଦ୍ ଉଞ୍ଜିମାନ୍ଦାନ୍ ବାକ୍‌ଡ଼େତାଗ୍ ଆଡ଼ତଡ଼୍ ।

୪୧ ପିଲେଡ଼ କାଇଦିଙ୍କ୍ ପଇସ୍ ଜିସୁ କେଡ଼ତନ୍, “ତାଲିତା କୁମ୍,” ଇଡ଼କେ “ପିକି, ନାନ୍ କେଡୁତାନ୍ ତେଦା ।”

୪୨ ପିକିଡ଼୍ ଆସୁଙ୍ଗେ ତେଦ୍‌ଦି ତାଆକ ଉଡ଼ାଙ୍କ୍ ପସ୍ପତେ । ଆସୁଙ୍ଗ୍ ତାନ୍ ବୟସ୍ ମାତର୍ ବାର ହେଣ୍ଡେକ୍ । ଇଦ୍ ଗର୍ନାତାଗ୍ ସାରେତଡ଼୍ ବାକ୍‌ଝା ଆଡ଼ତଡ଼୍ ।

୪୩ କିନ୍ତୁ ଇଦ୍ ବିଷୟତେ ବେନଙ୍କ୍ ବାଡ଼ତେ କେତାନ୍‌ଙ୍କ୍ ଅଣ୍ ଅଡ଼କିଙ୍କ୍ କେଲ୍‌ମାଟ୍ ଇଞ୍ଜି କେଡ଼ତନ୍ । ତାନ୍‌ପେକେ ପିକିତିଙ୍କ୍ ବାଡ଼ତେ ତିୟାଙ୍କ୍ ଇଦାନ୍ ସେଙ୍ଗେ ଜିସୁ ଅଡ଼କିଙ୍କ୍ କେଡ଼ତନ୍ ।



ନାଜରିତତାଗ୍ ଜିସୁ କେତାନାଦ୍

(ମାତିଉ ୧୩:୫୩-୫୮; ଲୁକ ୪:୧୭-୩୦)

୧ ଜିସୁ ଆଦ୍ ସହର୍ ଝିଡ଼ସି ଶିଷ୍ୟନଡ଼ତଡ଼୍, ନିଜେଡ଼ ନାର୍ ନାଜରିତତା ମାଲ୍‌ସ୍ ଆଡ଼ତଣ୍ ।

୨ ଆଗେ ରମାନ୍ ଦିନେ ପ୍ରାର୍ଥନା ଲୋଡ଼ତାଆଗ୍ ଅଣ୍ ଉପଦେଶ ହିଦାନ୍ ଖେଲେ ନାଗେ ନାରୁଡ଼୍ ମାଡ଼ତଡ଼୍ । ଜିସୁନ୍ ଗଟି କେଞ୍ଜି ଅଡ଼୍,

ବାକୁଝାଆସ୍ କେତେତଡ଼, “ଇସର ଗଟି ଅଣ୍ଟ ବେଗାଙ୍କ ପୁତ୍ରତନ୍ ?
ଇସର ଜ୍ଞାନ ଅଣ୍ଟ ବେଗାଙ୍କ ପୁତ୍ରତନ୍ ? ଇସ୍ରାୟାରେ ଆଶୟ୍ୟ ପାଡ଼ି
ଅଣ୍ଟ ବେଲାନ ମାଡ଼ୁତନ୍ ?

୩ ଇଣ୍ଟ ବାଡ଼ତେ ମରାୟମ୍ ତେ ମାର୍, ଅଣ୍ଟ କୁମାଲ୍ ଆୟନ୍ ?
ଇଣ୍ଟ ବାଡ଼ତେ ଯାକୁବ୍, ଯୋସେପ୍, ଯିହୁଦାଲ୍ ନୁ ଶିମୋନ୍‌ତେ ଦାଦାଲ୍
ଆୟଣ୍ଟ ? ତାନ୍ ଏଲୀୟା, ବାଡ଼ତେ ମାନ୍‌ତଡ଼ ଇଗେ ମାନ୍‌ନ ?” ଇଦ୍
କେସ୍ ଅଡ଼ ଜିସୁଙ୍କ ଉଡ଼ି କାଝୁତଡ଼ ।

୪ ☆ଜିସୁ ଅଡ଼କିଂଙ୍କ କେତେତଣ୍ଟ, “ବାବବାଦୀ ନିଜେତ୍ ନାର୍,
ପରିବାର୍ ନୁ ଆମ୍‌ତେ ସାରେତଡ଼କ୍ ଝିଡ଼ିସି ବାଗାଡ଼ ସାରେତଡ଼ ତ
ସମ୍ମାନିତ ଆୟଣ୍ଟ ।”

୫ ଆଦିଙ୍କ ବେସକ୍‌ତୁଡ଼ ରୋଗତେ ନାରୁଡ଼ ପରୁ କାଲ ଝାଟି ଅଡ଼କିଂଙ୍କ
ସୁସ୍ଥ ମାଡାନାଦ୍ ଝିଡ଼ିସି ଜିସୁ ଆଗେ ମେଣ୍ଟନ୍ ବାଡ଼ତେ ବାକ୍‌ଝା କାମ୍
ମାଡ଼ତେ ପାର୍‌ଝଣ୍ଟ ।

୬ ଅଡାଦ୍ ଅବିଶ୍ୱାସୀ ଉଡ଼ି ଜିସୁ କାବା ଆଡ଼ତଣ୍ଟ । ତାନ୍‌ପେକେ ଜିସୁ
ଗାରରେ ମାନ୍‌ନ ନାରକିନାର୍ ଆଞ୍ଜ ନାରୁଡ଼କ୍ ଶିକ୍ଷା ଇଡ଼ତନ୍ ।

ବାର ଶିଷ୍ୟନଡ଼କ୍ ରତାନାଦ୍

(ମାତିଉ ୧୦:୫-୧୫; ଲୁକ ୯:୧-୬)

୭ ଅଣ୍ଟ ବାର ଜାନ୍ ଶିଷ୍ୟଡ଼କ୍ କାରଜିଂ ଇର୍‌ଝୁ ଇର୍‌ଝୁଡ଼ ମାଡ଼ି
ରଡ଼ତନ୍ । ଅଣ୍ଟି ଆମ୍‌ଙ୍କ ତଲାନ୍ ସେଙ୍ଗେ ଅଡ଼କିଂଙ୍କ ଅଦିକାର୍ ଇସ୍
କେତେତଣ୍ଟ,

୮ “ମିୟାଦ୍ ଆଦାନ୍ ସେଙ୍ଗେ ସୁଦୁର୍ ତୁଡ଼ ଅଦେପାର୍‌ତିଡ଼ ନୁ

୯ ରୁଟି ମାନ୍‌ନ ମୁନା କି ପାନ୍‌ଡ଼ତାଗ୍ ତାବକ୍ ଅୟମାର୍ ଇଞ୍ଜ
କେତେତଡ଼ । ଇଡ଼କେ ଅଡ଼କିଂଙ୍କ ଏର୍‌ପୁକ୍ କେର୍‌ଦାନଙ୍କ କେତେତଣ୍ଟ ।
ମେଣ୍ଟେ ରେଣ୍ଟ ତକା କେର୍‌ଦାନଙ୍କ ମନା ମାଡ଼ତଣ୍ଟ ।”

୧୦ ମେଣ୍ଟେ ଅଣ୍ଟ କେତେତଣ୍ଟ, “ବେନ୍ ଲୋଡ଼ତାଗ୍ ମିକିଂଙ୍କ
କାରଜିଂତଡ଼, ଆଦ୍ ପଡ଼ିୟେତାଗାଙ୍କ ପେଇସ୍ ଆନ୍‌ଝେ ଯାକ ଆଗେ
ମାନ୍‌ଡ଼ ।

୧୧ ✠ଯଦି ବାବୁତେବା ପଡ଼ିଯେତାର ନାରୁଙ୍କ ମିକିଙ୍କ କାରଙ୍କଗଡ଼, ବା ମିଇ ଗଟି କେଞ୍ଜଡ଼, ମୀଇ ଡେକେଡ଼ ଦୁମ୍ କାଇସ୍ ଆଦ୍ ପଡ଼ିଯେ ଝିଡ଼ସି ଆନୁର୍ । ଇଦ୍ ମିୟାଦ୍ ବିରୁଦ୍ଧତେ ସାକ୍ଷି ଲେକାମ୍ ଆଦ୍ତେ ।”

୧୨ ତାନପେକେ ଶିଷ୍ୟନଡ଼, ଆଞ୍ଜ ପାପ୍ ଆବଦାଗାଙ୍କ ମାଲ୍ଲନ୍ଦାନ ସେକେ ନାରୁଡ଼କିଙ୍କ ଉପଦେଶ୍ ଇଡ଼ତଡ଼ ।

୧୩ ✠ଅଡ଼ ନାଗେ ବୁଡ଼କ୍ ଝିରସ୍ତଡ଼, ନୁ ରୋଗତେ ନାରୁଡ଼କ୍ ନିୟ୍ ତମି ସୁସ୍ଥ ମାଡ଼ତଡ଼ ।

ବାପ୍ତିସ୍ମଇଦାନ୍ ଯୋହନ୍ନତେ ଡଲ୍ଡାଦ୍
(ମାତିଉ ୧୪:୧-୧୨; ଲୁକ ୯:୭-୯)

୧୪ ✠ଇଦ୍ ସାରେ ବିଷୟତେ ରାଜାଲ୍ ହେରଦ୍ କେଞ୍ଜଡ଼ଣ୍, ବାତେଙ୍କଇକ୍ ଜିସୁନାଦ୍ ସୁକାମ୍ ଦୁଃକାମ୍ ସାରେପାକ୍ ଆଡ଼ତେ । ବେସ୍ତୁଡ଼ କେସମାଡ଼ତଡ଼, “ବାପ୍ତିସ୍ମ ଯୋହନ୍ ମେଣ୍ଡେଜିଝେ ଆଡ଼ତନ୍ । ଆଦିନସେକେ ଇଦ୍ ସାରେ ବାକ୍ଝାକାମ୍ ମାଡ଼ାନଙ୍କ ଅଣ୍ ଶକ୍ତି ଦରସ୍ତଣ୍ ।”

୧୫ ବାଗାତଡ଼ କେସମାଡ଼ତଡ଼, “ଅଣ୍ ଏଲିୟ୍, ମେଣ୍ଡେ ବେସ୍ତୁଡ଼, କେଡ଼ତଡ଼, ମୁନେଡ଼ କାଲ୍ଲାମ୍ତେ ବାବଦାଦୀ ନଡ଼ ଲେକାମ୍ ଅଣ୍ ମିକା ଝେରଣ୍ ବାବଦାଦୀ ।”

୧୬ ହେରୋଦ୍ ଜିସୁନ୍ ବିଷୟତେ କେଞ୍ଜି କେଡ଼ତଣ୍, “ଅଣ୍ ନିଜାମ୍ ବାପ୍ତିସ୍ମ ଯୋହନ୍ । ନାନେ ଅନାଦ୍ ତାଲେତିଙ୍କ କଇସ୍ ମାଡ଼ତାନ, କିନ୍ତୁ ଅଣ୍ ମେଣ୍ଡେ ଗେଲ୍ସି ତେଦ୍ତଣ୍ ।”

୧୭ ✠ହେରଦ୍ ନିଜେ ଯୋହନ୍ତିଙ୍କ ଗିରପ୍ ମାଡ଼ାନଙ୍କ ଆଦେଶ୍ ଇସମାଡ଼ତନ୍ ନୁ ଯୋହନ୍ ବନ୍ଦି ଆସ୍ ଜଇଲ୍ତାର୍ ମାଡ଼ତଣ୍ । ହେରଦ୍ ନିଜେଡ଼ ଦାଦାନ୍ ମୁତେଙ୍କ ହେରଡ଼ତିଙ୍କ ପେଣ୍ଡୁଲୁ ମାଡ଼ି ମାନ୍ନାଙ୍କ ଯୋହନ୍

୧୮ ଅଙ୍କ ମେଣ୍ଡେ ପ୍ରମାନ୍ ମାଡ଼ି କେସମାଡ଼ତଣ୍, “ତାମୁଣ୍ ମୁତେଙ୍କ ପେଣ୍ଡୁଲୁ ମାଡ଼ି ନିମେସାୟେଡ଼ କାମ୍ ମାଡ଼ଝିନ୍ ।”

✠ ୭:୧୧ ପ୍ରେରିତ ୧୩:୫୧. ✠ ୭:୧୧ ଲୁକ ୧୦:୪-୧୧. ✠ ୭:୧୩ ଯାକୁବ ୫:୧୪.

✠ ୭:୧୪ ମାତିଉ ୧୭:୧୪; ମାର୍କ ୮:୨୮; ଲୁକ ୯:୧୯. ✠ ୭:୧୭ ଲୁକ ୩:୧୯, ୨୦.

୧୯ ଆଦିନ୍ ସେଙ୍ଗେ ହେରଦିଆ ଯୋହନ୍‌ତେ ସେଙ୍ଗେ କପାମ୍ ନେହେସ୍ ଅଙ୍କ ଆସୁକାଙ୍କ ଇଚ୍ଛା ମାଡ଼ମାଡ଼ତନ୍, କିନ୍ତୁ ହେରଦ୍‌ତେ ସେଙ୍ଗେ ଇଦ୍ ମାଡ଼ତେ ପାର୍‌ସେ ମାଡ଼ତଣ୍ ।

୨୦ ବାତେଙ୍କକେ ଯୋହନ୍ ଖେରନ୍ ଦାମ୍ କିନ୍ତୁ ପବିତ୍ର ନାରୁନ୍ ଇଞ୍ଜି ପୁଞ୍ଜି ହେରଦ୍ ଅଙ୍କ ଖେରସ୍ ମାଡ଼ତଣ୍ ଅଂକିଙ୍କ ଲେକେଡ୍ ପଡ଼ିଲେ ତାଗ୍ ଖାଟିମାଡ଼ତଣ୍ । ଯୋହନ୍‌ତେ ଶିକ୍ଷା କେଞ୍ଜି ସାରେଦିନା ଅଣ୍ କପାମ୍ ଆସ ମାଡ଼କେ ମିକା ଅନ୍ ଗୋଟି କେଞ୍ଜାନଙ୍କ ଅଣ୍ ଇଚ୍ଛା ମାଡ଼ମାଡ଼ତଣ୍ ।

୨୧ ଅଣ୍‌ଦାମ୍ ହେରୋଦିଆଙ୍କ ଖେରଡ୍ ସୁଯୋଗ୍ ଦରକ୍‌ତେ । ହେରୋଦ୍‌ତେ ଜନମ୍‌ଦିନେ ଖାଡ଼ତେ, ତିଆର୍‌ଆଡ଼ତେ ବୋଜିତିଙ୍କ ବେଡ଼ିଲେ କର୍ମଚାରିଡ୍, ସେନାଦ୍ୟକ୍ଷ ନୁ ଗାଲିଲୀତେ ମାନ୍ଦାନ୍ ନାରୁଡ୍, କାର୍‌କାତାଙ୍କ ଖାସ୍‌ମାଡ଼ତଡ୍ ।

୨୨ ହେରୋଦ୍‌ତେ ପିକିଡ୍ ଇଦ୍ ଉତ୍ସବତାଗ୍ ହେଦି ମିକା ହେରୋଦ୍‌ତେ କୁର୍‌ମାମ୍ ତିଙ୍କ ଖେଡ଼କେ ମାଡ଼ିମାଡ଼ତେ । ଆଦିଙ୍କ ହେରୋଦ୍ ପିକିଡିଙ୍କ କେଡ଼ତଣ୍, “ନିମେ ବାଡ଼ତେ ଇଚ୍ଛା ମାଡ଼ତୁନ୍, ବାଡ଼ତେ ତାଲ୍‌କିତିନ୍ ଆଦ୍ ନାନେ ଇଦ୍‌ତାନ୍ ।”

୨୩ ରାଜାଲ୍ ଗର୍‌ଇସ୍ କେଡ଼ତଣ୍, “ନାନେ ପ୍ରାମାନ୍ ମାଡ଼ି କେଡ଼ତାନ୍, ନିମେ ବାଡ଼ତେ ତାଲ୍‌କିତିନ୍, ଇଦ୍‌ତାନ୍ ଇଦ୍‌ଲେକାମ୍ ରାଜ୍ୟତାଗାଙ୍କ ଦୁଡ଼େ ତାଲ୍‌କେ ମିକା ଇଦ୍‌ତାନ୍ ।”

୨୪ ପିକିଡ୍‌ୟାୟନ୍ ପାକେ ଆଞ୍ଜି କେଡ଼ତେ, “ବାଡ଼ତେ ତାଲ୍‌କିତାନ୍ ?” ସାଙ୍ଗେ ସାଙ୍ଗେ ହେରୋଦ୍‌ତେ ମୁତେ କେଡ଼ତେ, “ବାପ୍ତିସ୍ମ ଯୋହନ୍‌ତେ ତାଲେ ।”

୨୫ ପିକିଡ୍ ମିରିଖାସ୍ ରାଜାଙ୍କ କେଡ଼ତେ, “ଇଞ୍ଜେକେ ବାପ୍ତିସ୍ମ ଯୋହନ୍‌ତେ ତାଲ୍ ତାଲିତାଗ୍ ଖାଟି ନାକ୍ ଇମ୍ବୁର୍ ।”

୨୬ ଇଦ୍ କେଞ୍ଜି ରାଜାଙ୍କ ଗାଟି ଦୁଃକାମ୍ ଆଡ଼ତେ, କିନ୍ତୁ କୁର୍‌ମାମ୍‌ତେ ମୁନେ ପ୍ରାମାନ୍ ମାଡ଼ିମାନ୍‌ନାଙ୍କ ଇଲ୍‌ଲେ ଇଞ୍ଜି କେଡ଼ତେ ପାର୍‌ସେ ମାଡ଼ତଣ୍ ।

୨୭ ଆଦିଙ୍କ ଯୋହନ୍‌ତେ ତାଲେ କୟିସ୍ ତାତାନଙ୍କ ରାଜାଲ୍ ସାଙ୍ଗେ ସାଙ୍ଗେ ଚାକରନ୍‌ଡ଼କ୍ ରହଡ଼ତଣ୍ ।

୨୮ ଚାକରନ୍‌ଡ଼ ଜଇଲ୍‌ତାଗ୍ ଆଞ୍ଜି ଯୋହନ୍‌ତେ ତାଲ୍‌ଲେ କୟିଡ଼ତଡ୍ ନୁ ତାଲ୍‌ଲେ ତିଙ୍କ ତାଲିତାଗ୍ ଖାଟି ଆ ପିକିଡିଙ୍କ ଇଡ଼ତଡ୍,

। ଆଦି ଅସ୍ ଯାୟାଙ୍କ ଇଡ଼ତେ ।

୨୯ ଯୋହନ୍‌ତେ ଶିଷ୍ୟନଡ଼୍ କବର୍ କେଞ୍ଜି ଅନାଦ୍ ଡଲ୍‌ତେ ମେନ୍‌ଲୁଡ଼ିଙ୍କ୍ ଅସ୍ ସମାଦି ଇସ୍‌ମାଡ଼ତଡ଼୍ ।

ଏଇଙ୍କ୍ ରୁଟି ରେଣ୍ଟ୍ କିକେ

(ମାତିଉ ୧୪:୧୩-୨୧; ଲୁକ ୯:୧୦-୧୭; ଯୋହନ୍ ୬:୧-୧୪)

୩୦ ପ୍ରେରିଡ଼ ଶିଷ୍ୟଡ଼୍ ମାଲ୍‌ସ୍ ଖାସ୍ ବାଡ଼ ବାଡ଼ ଅଡ଼୍ ମାଡ଼ିମାଡ଼ତଡ଼୍ ନୁ ଶିକ୍ଷା ଇସ୍‌ମାଡ଼ତଡ଼୍ ଜିସୁଙ୍କ୍ କେଡ଼ତଡ଼୍ ।

୩୧ ଇସର୍ ନାରୁଡ଼୍ ମାନ୍‌େଡ଼ ଲୋପେ ଜିସୁ ନୁ ତାନ୍ ଶିଷ୍ୟନଡ଼୍ ତିନ୍‌ାନଙ୍କ୍ ଦିନାମ୍ ଦରକ୍‌େ ମାଡ଼ତେ । ଜିସୁ ଅଡ଼୍‌କିଂଙ୍କ୍ କେଡ଼ତନ୍, “ଦାଟିଡ଼୍, ମାନାଡ଼୍ ଝେରଡ଼୍ ବେନ ଇଲ୍‌େ ଜାଗେତାଗ୍ ଆଦିକାଡ଼୍ । ଆଗେ ମିଡ଼୍ ସୁଦୁର୍ ଜେଲ୍ ରମେ ପାରଡ଼ିଡ଼୍ ।”

୩୨ ତାନ୍‌ପେକେ ଜିସୁ ନୁ ତାନ୍ ଶିଷ୍ୟନଡ଼୍ ଓଡ଼ା ତାରି ଝେରଡ଼୍ ଚିମ୍ ତାମ୍ ଜାଗେତାଗ୍ ଆଦାନଙ୍କ୍ ପେଇଡ଼ତଡ଼୍ ।

୩୩ ଅଡ଼୍ ଆଦାନ୍‌େଲେ ନାଗେ ନାରୁଡ଼୍ ଅଡ଼୍‌କିଂଙ୍କ୍ ଉଡ଼େ ପାର୍‌େଡ଼୍ ଆଡ଼ତଡ଼୍ । ଆଦିଙ୍କ୍ ଅଡ଼୍ ବେନ୍ ବେନା ପଡ଼ିୟାନାଗାଙ୍କ୍ ପେଇସ୍ ଜିସୁ ନୁ ତାନ୍ ଶିଷ୍ୟନଡ଼୍ ବେନ୍ ଜାଗେତାଗ୍ ଆଞ୍ଜିମାଡ଼ତଡ଼୍, ମିରି ମିରି ଆଗେ ମୁନେ ଆଞ୍ଜି ହେଉଡ଼ତଡ଼୍ ।

୩୪ ☆ଜିସୁ ଓଡେ ତାଗାଙ୍କ୍ ଡିଗି ଆଦ୍ ବେଡ଼ୟାଦ୍ ନାରୁଡ଼୍ ମାନ୍‌େ ଉଡ଼ି ଅନାଦ୍ ହୁଦୟ ଦୟାତେ ନଡ଼ତେ । ବାଡେଙ୍କ୍‌ଇକେ ଅଡ଼୍ ମେୟତାନେ ଇଲ୍‌େ ମେଣ୍ ମାନ୍‌େ ଲେକାମ୍ ମାଡ଼ତଡ଼୍ । ଆଗେ ଜିସୁ ଅଡ଼୍‌କିଂଙ୍କ୍ ନାଗେ ବିଷୟତେ ଶିକ୍ଷା ଇଦାଙ୍କ୍ ପସ୍ତଡ଼ତଡ଼୍ ।

୩୫ ପଡ଼ଦ୍ ଆଦାନାଦ୍ ଉଡ଼ି, ଶିଷ୍ୟନଡ଼୍ ଜିସୁଙ୍କ୍ ଖାସ୍ କେଡ଼ତଡ଼୍, “ନାଗେ ଗମାଡ଼୍ ଆସମିନ୍‌େ ନୁ ଇଦ୍ ପଡ଼ିୟେ ଗାଟି ଚିମ୍‌ାମ୍ ।

୩୬ ନାରୁଡ଼୍ ବେଲାନ୍ ଚାରେପାକା ଗୁଡ଼୍‌ଏକ୍ ବା ନାକିନାଗ୍ ଆଞ୍ଜି ନିଜେ ନିଜେଡ଼ ସେଙ୍ଗେ ତିନ୍‌ାନଙ୍କ୍ ବାଡ଼ତେ ଆସିଡ଼ଡ଼୍, ଆଦିନ୍ ସେଙ୍ଗେ ଅଡ଼୍‌କିଂଙ୍କ୍ ରହସିମୁର୍ ।”

୩୭ ଜିସୁ ଅଡ଼୍‌କିଂଙ୍କ୍ କେଡ଼ତଡ଼୍, “ମିଡ଼୍ ନିଜେ ଅଡ଼୍‌କିଂଙ୍କ୍ ବାଡ଼ତେ ତିନ୍‌ାନଙ୍କ୍ ଇମୁର୍ ।” ଅଡ଼୍‌କେଡ଼ତଡ଼୍, “ନିମେ ବାଡ଼ତେ ଇଞ୍ଜା ମାଡ଼ୁନିନ୍,

☆ ୭:୩୪ ମାତିଉ ୯:୩୭.

ମାମେ ରେଣୁଝାନ୍ଦା ରୂପା* ଡାଉକ୍‌ଜିନ୍ ତଡ଼ ରୋଟି ଆସି ତାସ୍
ଇଡ଼କିଙ୍କ ଇଦିକାଡ଼?”

୩୮ ଜିସୁ ପଚାରମାଡ଼ତଣ୍ଡ, “ମିଇପାକେ ବେସ୍‌କ୍ ରୋଟି ମିନ୍ଦେ, ଉଡ଼ି
ଝାଡ଼ାଟ୍ ।” ଅଡ଼ ଉଡ଼ି ଝାସ୍ ମାତର୍ ଏଇଙ୍କ ରୋଟି ନୁ ରେଣ୍ଡ କିକେ
ମିନ୍ଦେ ଇଞ୍ଜ କେଡ଼ତଡ଼ ।

୩୯ ନାରୁଡ଼କିଙ୍କ ମାନ୍ଦା ମାନ୍ଦା ମାଡ଼ି ଗାଡ଼ତେ ପରୁ କୁସ୍ତାନଙ୍କ ଜିସୁ
ଶିଷ୍ୟନଡ଼କ୍ କେଡ଼ତଡ଼ ।

୪୦ ଅନ୍ ଗଟ୍‌ତେ ଲେକାମ୍ ନାରୁଡ଼କିଙ୍କ ଲାଇନ୍‌ତେ ଶହେ ବା
ପଚାଶ ଲାକା କୁସ୍ତଡ଼ ।

୪୧ ତାନ୍‌ପେକେ ଜିସୁ ଆସ୍ତ୍ତ୍ ଏଇଙ୍କ ରୋଟି ନୁ ରେଣ୍ଡ କିକେ ଅସ୍
ସ୍ବର୍ଗପାକେ ପରୁଉଡ଼ି ମିକା ଇଶ୍ବରତିଙ୍କ ଦନ୍ୟବାଦ୍ ଇଡ଼ତଣ୍ଡ । ମେଣ୍ଡେ
ଆସ୍ତ୍ତ୍ ରୋଟିକିଙ୍କ ଉସ୍ ନାରୁଡ଼ ପାକେ ସାରେତଡ଼କ୍ ତୁଉସିଦ୍‌ନଙ୍କ
ଶିଷ୍ୟନଡ଼କ୍ ଇଡ଼ତଣ୍ଡ ।

୪୨ ସାରେତଡ଼ ତିଞ୍ଜ୍ ତଙ୍କ୍ ନିହିଡ଼ତଡ଼ ।

୪୩ ତାନ୍‌ପେକେ ଶିଷ୍ୟନଡ଼ ମିଶ୍ଲିମାନ୍ଦାନ୍ ରୋଟି ନୁ କିକେ ଦୁଡ଼ାକି
ପେହେକି ବାରଟାନ୍ ଜୁଡ଼ିନାଗ୍ ନିହିଡ଼ତଡ଼ ।

୪୪ ବେନଡ଼ ଆଦ୍ କାଦ୍ୟ ତିଞ୍ଜ୍‌ମାଡ଼ତଡ଼, ଅଡ଼ ଆଗାଙ୍କ ଆସାମ୍
ମାନେଇତେ ମାନ୍ଦେ ମାଡ଼ତେ ଏଇଙ୍କ୍ ହଜାର୍ ।

ଜିସୁ ଏରଦେ ପରୁ ତାକ୍‌ତନ୍

(ମାଡ଼ିଉ ୧୪:୨୨-୩୩; ଯୋହନ୍ ୬:୧୫-୨୧)

୪୫ ତାନ୍‌ପେକେ ଜିସୁ ଶିଷ୍ୟନଡ଼କିଙ୍କ୍ ସମୁଦ୍ର ମେଣ୍ଡନ୍ ପାକେ
ବେଡ଼ସାଇଦାତା ଆଦାନ୍ ସେଙ୍ଗେ ମୁନେଙ୍ଗେ ଓଡେତାଗ୍ ରହସିଡ଼ତଣ୍ଡ
।

୪୬ ନାରୁଡ଼କିଙ୍କ୍ ରଅସିସ୍ ମିକା ଅଣ୍ ନିଜେ ପ୍ରାଟିନା ମାଡ଼ାନ୍ ସେଙ୍ଗେ
ଝେରଡ଼ ମେଟେଡ଼ ପରୁ ଆଡ଼ତଣ୍ଡ ।

୪୭ ମୁଲ୍‌ପୁଟ୍ ଆସ ମାନ୍ଦାନ୍ ଝେଲେ ଜିସୁ ଝେରଣ୍ଡେ ଆଞ୍ଜିନା
ବୁମ୍‌ତାଗ୍ ମାଡ଼ତଣ୍ଡ ନୁ ଓଡେ ସାଉଡ଼େ ନାଡ଼ମେ ମାଡ଼ତେ ।

* ୭:୩୭ ରୂପା ଇଡ଼କେ ଅଣ୍ଡୟ ଦିନାଡ଼ କୁଲ୍‌ଦେ ପାଇସା ଅଣ୍ଡୟ ରୂପା ଡାଉକ୍

୪୮ ଅତଃ ମୁନେଙ୍କ ଗାଲ୍ ଝାସମାନନାଙ୍କ ଶିଷ୍ୟନତଃ ଗାଟି ତିପାଲ୍ତେ ଓତେ କହସ ମାୟାନାଦ୍ ଅଣ୍ଟ ଉଡ଼ତଣ୍ଟ । ଆଙ୍କାଡ଼ତେ ନାର୍କା ୩ ଟା ତାଗାଙ୍କ ୭ ଟା ଆଇନା ।

୪୯ ଜିସୁ ଏରଦେ ପରୁ ତାକିତାକି ଅଡ଼ପାକେ ଗାରେ ହେଉଡ଼ତଣ୍ଟ । ଅଡ଼କିଙ୍କ ହେରି ମିକା ଅଣ୍ଟ ଆନେନ୍ । କିନ୍ତୁ ଅଙ୍କ ଏରଦେ ପରୁ ତାକାନାଦ୍ ଉଡ଼ି ଶିଷ୍ୟନତଃ ବୁଡ଼ ଆଲ୍‌ସି ମରପଇଡ଼ତଡ଼ ।

୫୦ ଅଙ୍କ ଉଡ଼ି ଅଡ଼ ଝେରସ୍ ମାଡ଼ତଡ଼ । ତାନ୍ ପେକେ ଜିସୁ ଅଡ଼କିଙ୍କ କେଡ଼ତଣ୍ଟ, “ସାହାସ୍ ପୟିମ୍ ଇଣ୍ଟ ନାନେ, ଝେରମାର୍ ।”

୫୧ ଆଦ୍ କେସ୍ ଓତେତାଗ୍ ତାରତନ୍ ନୁ ଆସୁଙ୍ଗେ ଗାଲ୍ ମାଦ୍ତେ । ଶିଷ୍ୟନତଃ ଆଦ୍‌ଉଡ଼ି ବାକ୍‌ଝା ଆଡ଼ତଡ଼ ।

୫୨ ବେଦିନ୍ ଏଇଙ୍କ ରୋଟି ଗଟ୍‌ଣାତେ କାମ୍ ଅଡ଼ ପୁନ୍‌ଝେ ମାଡ଼ତଡ଼, ବାତେଙ୍କଇକେ ଅଡ଼ାଦ୍ ଜ୍ଞାନ ଶକ୍ତି ଇଲ୍‌ଝେ ମାଡ଼ତେ ।

ଜିସୁ ଗିନେସର୍ତେ ରୋଗିନଡ଼କ୍ ସାୟେ ମାଡ଼ତନ୍

(ମାତିଉ ୧୪:୩୪-୩୬)

୫୩ ସମୁଦ୍ରତିଙ୍କ ହେରି ମିକା ଅଡ଼ ଗିନେସର୍ତାଗ୍ ହେଝୁସ୍ ଆଞ୍ଜିନ୍ ବୁମ୍‌ତାଗ୍ ଓତେତିଙ୍କ ତହସିଡ଼ତଡ଼ ।

୫୪ ଅଡ଼ ଓତେତାଗାଙ୍କ ତିଗାନ୍ ସାଙ୍ଗେ ସାଙ୍ଗେ ନାରୁଡ଼ ଜିସୁଙ୍କ ହେଞ୍ଚତଡ଼ ।

୫୫ ଆଦିଙ୍କ ମିରିଆଞ୍ଜ୍ ଆଦ୍ ଗାରେ ନାର୍କିନାଗ୍ ମାୟାନ୍ ନାଗେ ହେଣ୍ଟକିନ୍ ରୋଗିନଡ଼କ୍ ଅନ୍ ପାକେ କାଞ୍ଜି ତାଡ଼ତଡ଼ ।

୫୬ ଜିସୁ ବେନ୍ ନାର୍, ସହର ନୁ ସୁଦୁଗୁଡ଼ିୟେ ନାକିନାଗ୍ ହେଉଡ଼ତନ୍, ଆଗେ ଆର୍ ବାଜାର୍‌ତାଗ୍ ମାୟାନ୍ ନାରୁଡ଼ ଲେକାମ୍ ରୋଗ୍‌ତେ ନଡ଼କିଙ୍କ ଝାଟ୍‌ତଡ଼ ଅନ୍ ଚକାତିଙ୍କ ଇଟାନଙ୍କ ଅକିଙ୍କ ଗଟ୍ ତାଲ୍‌କତଡ଼ ନୁ ଅନ୍ ସିଲେଡ଼ କଜିଙ୍କ ଇଟାନ୍ ସାଙ୍ଗେ ସାଙ୍ଗେ ରୋଗିନଡ଼ ସୁସ୍ଥ ଆଡ଼ତଡ଼ ।



ମୁନେଡ଼ ନାରୁଡ଼ାଦ୍ ନିତିନିୟ

(ମାତିଉ ୧୫:୧-୯)

୧ ଯିରୁଶାଲମ୍ ତାଗାଙ୍କୁ ଝାସ୍‌ମାନ୍ଦାନ ବେସକ୍‌ତୁଡ଼, ପାରୁଣୀଡ଼, ନୁ ଶାସ୍ତିଡ଼, ଜିସୁନ୍ ଗାରରେ ଗୁଡ଼ତଡ଼ ।

୨ ଅଡ଼, ଉଡ଼ତଡ଼, ଯେ, ଜିସୁନ୍ ବେସକ୍‌ତଡ଼, ଶିଷ୍ୟଡ଼, ନିୟମ୍ ଲେକାମ୍ କାଇକ୍ ନର୍ସ୍ ତିନଡ଼ । ଫାରୁଶିଡ଼, ତିୟାନ୍ ମୁନେ କାଇ ନରଦାନ୍ ମାଇଦିଙ୍କୁ ବେନ୍ ନିୟମ୍ ସାରେ ମାଡ଼ିମାଡ଼ତଡ଼, ଶିଷ୍ୟଡ଼, ଆଦିଙ୍କୁ ପାଲନ୍ ମାଡ଼କଟି ମାଡ଼ତଡ଼ ।

୩ ଫାରୁଶିଡ଼, ନୁ ବାଗାଡ଼ ଯିହୁଦିଡ଼, ଅଡ଼, ମୁନେଙ୍କୁ ତେ ଆନିଦାଦିଡ଼, ନିତିନିୟମ୍ ପାଲନ୍ ମାଡ଼ାନଡ଼, ନିୟମ୍ ତେ କାଇ ନରଝକଟି ଅଡ଼, ତିନନଡ଼ ।

୪ ଆଟି ନାଗାଙ୍କୁ ମାଲ୍‌ତେ ଝେୟେ ମୁନେଙ୍କେତେ ନିୟମ୍ ଲେକାମ୍ ତେକା କାଇକ୍ ନରଝକଟି ବାଡ଼ ବା ତିନଅଡ଼ । ଝେଡ଼ତଡ଼େ, ଗିନେ, କୁଣ୍ଡା ନୁ ତାରାନାଝ ଆକି ନରଦାନ୍ ମାଇଦିଙ୍କୁ ବେସ୍ ବେସଡ଼ ତିଆର୍ ଆଡ଼ତେ ନିୟମ୍ ଅଡ଼, ପାଲନ୍ ମାଡ଼ିତଡ଼ ।

୫ ପାରୁଣୀଡ଼, ନୁ ଶାସ୍ତିଡ଼, ଜିସୁଙ୍କୁ ପାଚାରା ମାଡ଼ତଡ଼, “ମାନ୍ ମୁନେଙ୍କେତେ ଆନିଦାଦିଡ଼, ବେନ୍‌ସାରେ ନିତିନିୟମ୍ ତିଆର୍ ମାଡ଼ିସ୍ ଆଞ୍ଜିମିନ୍ଦେଡ଼, ନି ଶିଷ୍ୟଡ଼, ଆଦିଙ୍କୁ ପାଲନ୍ ମାଡ଼ତଡ଼, ବାତେଙ୍କୁ ? ନିୟମ୍ ଲେକାମ୍ ତିୟାନ୍ ମୁନେଙ୍କୁ କାଇକ୍ ନରଝଡ଼, ବାତେଙ୍କୁ ?”

୬ ଜିସୁ ଉତ୍ତର ଇଡ଼ତଣ୍ଡ, “ମି ବିଷୟତେ ବାବବାଦି ଯିଶାଇୟ ବାତେ କେସ୍‌ମାଡ଼ତଣ୍ଡ, ଆଦ୍ ନିଜାମ୍ । ଅନ୍ ଲେକ୍‌ତେ ଲେକାମ୍ ମିଡ଼, ସାରେ ବୁଚା ମାଡ଼ାନ୍ ଦାମ୍ କିନଡ଼ି ।

ଇଗ୍‌ର କେଡ଼ତଣ୍ଡ, ‘ଇ ନାରୁଡ଼, ମାତର୍ ମକମ୍‌ତାଗ୍ ନାକିଙ୍କୁ ସମ୍ମାନ୍ ଇଡ଼ତଡ଼,

କିନ୍ତୁ ହୁଦୟ୍ ତାୟାଗାଙ୍କୁ ନାଗେ ଦୁରାମ୍ ।’

୭ ନାକିଙ୍କୁ ଆରାଦନା ମାଡ଼ାନାଦ୍ ଅଡ଼ାଦ୍ ଇଲେ ।

ବାତେଙ୍କୁଇକ୍ ଅଡ଼, ନାରୁଡ଼, ମାଡ଼ିମାନ୍ଦାନ୍ ନିୟମ୍‌ତିଙ୍କୁ ।

୮ ମିଡ଼, ଇଗ୍‌ରତେ ନିୟମ୍‌ତିଙ୍କୁ ଝିଡ଼ସି, ନାରୁଡ଼ାଦ୍ ନିୟମ୍‌ତିଙ୍କୁ ପାଲନ୍ ମାଡ଼ିତିଡ଼ ।”

୯ ଜିସୁ ମେଣ୍ଡିନ୍‌ଦାମ୍ କେଡ଼ତଣ୍ଡ, ଇଗ୍‌ରତେ ନିୟମ୍‌ତିଙ୍କୁ କେପି ନିଜର୍ ଶିକ୍ଷାତିଙ୍କୁ ପୟସ୍ ନେହ୍‌ତାନ୍ ମାଇଦିଙ୍କୁ ମିଡ଼, ଲେକେଡ଼ ଉପାୟ୍ ମାଡ଼ିମିନ୍ଦେଡ଼ି ।

୧୦ ମୋଶାଲ୍ ଆଜ୍ଞା ଇସ୍ରାଏଲ୍‌ରେ, ଯାହାବାବାଙ୍କ ସମାଦର ମାଡ଼ାଟ୍; ମେଣ୍ଡେ ବେନ ନିଜର ଯାହାବାବାଙ୍କ ଅବିସାୟ ଇଡ଼ତ୍‌ରେ, ଅଙ୍କ ଡଲାନ ଦଣ୍ଡ ଦରକିଡ଼ ।

୧୧ ମି ପାକେ ବାଡ଼ତେ ମିନ୍ଦେ ଆଦ୍ ଯାହାବାବାଙ୍କ ସାହାଯ୍ୟ ମାଡ଼ାନାଦ୍, ଇଦରକମ୍ ଶିକ୍ଷା ଇଦତ୍‌ରେ, କିନ୍ତୁ ମିଡ଼୍ ବାଡ଼ କେଡୁଡିଡ଼୍, ଆଦ୍ ଇଶ୍ବରତିଙ୍କ “କୁର୍ବାନ୍,” ମାଡ଼ାଟ୍, ଇଦିନ୍ ଅର୍ତ୍ତ ଇଶ୍ବରତିଙ୍କ ଇମୁଟ୍,

୧୨ ଯାହାବାବାଙ୍କ ସାହାଯ୍ୟ ମାଡ଼ାନ୍ ଦାୟିତ୍ୟତାଗାଙ୍କ ମୁକ୍ତ ଆଦ୍‌ତିଡ଼୍,

୧୩ ଇଦଲେକାମ୍ ଖେର୍ ଅର୍ତୁଙ୍କ ଇଦାନାଦ୍ ମିୟାଦ୍ ଶିକ୍ଷା ଇଶ୍ବରତେ ଆଜ୍ଞାତିଙ୍କ ଫାଲନ୍ ମାଡ଼ତୁ । ହିଦଲେକାମ୍ ମେଣ୍ଡେ ନାଗେ ପାଡ଼ିୟି ମିଡ଼୍ ମାଡ଼ତୁଡ଼୍ ।

ନାରୁଙ୍କ ବାଡେ ଅପବିତ୍ର ମାଡ଼ତୁଡ଼୍

(ମାଡ଼ିଡ଼ ୧୫:୧୦-୨୦)

୧୪ ଜିସୁ ମେଣ୍ଡନ୍‌ଦାମ୍ ନାରୁଡ଼ିଙ୍କ କାଙ୍ଗ୍ କେଡ଼ତ୍‌ରେ, “ନା ଗର୍ ମନ୍‌ଇସ୍ କେଜ୍ଜାଟ୍ ନୁ ବୁଜେମ୍ ଆଦାଙ୍କ୍ ଚେଷ୍ଟା ମାଡ଼ାଟ୍ ।

୧୫ ବାୟ୍‌ଦେଡ଼ ବାଡ଼ ବିଷୟ ନେଙ୍ଗି ଅଂକିଙ୍କ୍ ଅପବିତ୍ର ମାଡ଼ପାର୍‌ଖି । ବରଂ ବେନ୍ ବିଷୟ ନାରୁତେ ଲୋପେଙ୍କ୍ ବାୟ୍‌ଦେ ପେୟିଡ଼ିଡ଼୍, ଆଦେ କେ ଅଂକିଙ୍କ୍ ଅପବିତ୍ର ମାଡ଼ିଡ଼ ।”

୧୬ ଯଦି ବେନନାଦ୍ କେଜ୍ଜାନଙ୍କ୍ କେଡ଼ ମିନ୍ଦେ ଅଣ୍ଡ୍ କେଜ୍ଜିଣ୍ଡ୍ । *

୧୭ ଜିସୁ ମୁଲ୍‌ଦେ ଲୋପେଙ୍କ୍ ଖାସ୍ ଲୋନ୍ ନେଙ୍ଗିତେ ପେକେ, ଅନାଦ୍ ଇ ଶିକ୍ଷାତିଙ୍କ୍ ବୁଜାମାଡ଼ାନ୍ ମାଲଦିଙ୍କ୍ ଶିଷ୍ୟଡ଼୍ ଜିସୁଙ୍କ୍ ଅନୁରଦ୍ ମାଡ଼ତୁଡ଼୍ ।

୧୮ ଜିସୁ ଅଡ଼ିଙ୍କିଙ୍କ୍ କେଡ଼ତ୍‌ରେ, ଖେରତଡ଼୍ ଲେକାମ୍ ମିଡ଼୍ ଆନ୍‌ତେ ବୁଜେମ୍ ଆଦାନ୍ ଶକ୍ତି ବାଡେ ଇରୁର୍ ? ଇସ୍ବରତିଙ୍କ୍ ବୁଜେମ୍ ଆଦାଙ୍କ୍ ପାର୍‌ଝିଡ଼୍ ? ବାତା ସାରେ ନାରୁନ୍ ମେୟୁଲ୍‌ତେ ବାୟ୍‌ଦେକଞ୍ଚ ଲୋପ୍ ନେଙ୍ଗିତା, ଆଖି ଅଂକିଙ୍କ୍ ଅପବିତ୍ର ମାଡ଼ପାର୍‌ଖି

* ୭:୧୭ ବେସ୍‌କ୍ ବିଷୟକିନାଗ୍ ଇଦ୍ ଶବ୍ଦ ମିନ୍ଦେ ମେଣ୍ଡେ ବେସ୍‌କ୍ ଶବ୍ଦନାଗ୍ ଇଲା

୧୯ ବାତେଙ୍କୁ ଲୋକେ ଆଦି ହୃଦୟତାର୍ଥ ନେଙ୍ଗକଟ ଲୋପେ ଆଦତେ ନୁ ତାନପେକେ ମେନ୍ଦୁଲ୍ ତାଗାଙ୍କ ପେଇସ୍ ଆଦତେ । ଇଦ୍ କେତାନ୍ ଲେକାମ୍ ସାରେ କାଦି ସୁଛି ଇଞ୍ଜ ଜିସୁ କେସିସ୍ ମାଡ଼ତଣ୍ଡ ।

୨୦ ଅଣ୍ଡ ମେଣ୍ଡ କେଡ଼ତଣ୍ଡ, ବାତା ସାରେ ନାରୁନ୍ ଲୋପେତାଗାଙ୍କ ପେୟତିତା, ଆଦେ କେ ଅଂକିଙ୍କ ଅପବିତ୍ର ମାଡ଼ିତେ,

୨୧ ବାତେଙ୍କୁ ଲୋକେ ଅନାଦି ହୃଦୟତାଗାଙ୍କ ପେୟତିତ୍ କାରାପ୍ ଚିନ୍ତେଡ଼ ତଡ଼, ଅଣ୍ଡ ବେସ୍ ବେସଡ଼ ନିୟମ୍ତାର୍ ଇଲ୍‌ଖେ ଲେକେଡ଼ ପାଡ଼୍‌ୟି ମାଡ଼ିତେ,

୨୨ ଇକେ ତଙ୍ଗାନାଦ୍, ନାରିଙ୍କ ଆଞ୍ଜକାନାଦ୍, ଆରୁଲା ମାଡ଼ାନାଦ୍, ଆଗେ ନୁ ବେସ୍ ବେସଡ଼ କାରାପ୍ କାମ୍, କାରାପ୍ ବ୍ୟବହାର୍, କପାମ୍, ଆଙ୍ଗାରୁ ନୁ ମୁକ୍ ।

୨୩ ଇଞ୍ଜୁ ସାରେ କାରାପ୍ ବିଷୟ ନାରୁନ୍‌ତେ ହୃଦୟତାଗାଙ୍କ ଜନମ୍ ଆସ୍ ଅଂକିଙ୍କ କାରାପ୍ ମାଡ଼ିତେ ।

ଅଣ୍ଡୟ ନାଟାଡ଼ତେ ବିଶ୍ୱାସ୍

(ମାଡ଼ିତ ୧୫:୨୧-୨୮)

୨୪ ତାନପେକେ ଜିସୁ ଆଦ ପଡ଼୍‌ୟି ଝିଡ଼୍‌ସି ଶହର୍ ଗାରେମାନ୍‌ଦାନ୍ ଅଞ୍ଚଲତାର୍ ଆଡ଼ତଣ୍ଡ । ଆଗେ ଅଣ୍ଡ ଝେରଡ଼, ଲୋନ୍ ନେଙ୍ଗି ପୁନ୍‌ଝେକଟ ମାନ୍‌ଦାନ୍ ମାଇଦିଙ୍କ ଇଚ୍ଛା ମାଡ଼ତଣ୍ଡ, କିନ୍ତୁ ଅଣ୍ଡ ଲୋପେ ମାନ୍‌ପାର୍‌ଝଣ୍ଡ ।

୨୫ ଝେରଡ଼ ନାଟାଡ଼ତେ ମାୟାଡ଼ତିଙ୍କ ବୁଡ଼ ପୟିସ୍ ମାଡ଼ତେ । ଜିସୁନ୍ ଝାଦାନ୍ ଗଟ୍ କେଞ୍ଜି ଆଦ ଅନ୍‌ଗାରେ ଝାସ୍ ଅନ୍ ତେକେଡ଼ ମଦଲ୍ ରାଲତେ ।

୨୬ ଆଦ ମାଡ଼ତେ ସୁରପେନିକି ଅଞ୍ଚଲ୍‌ତେ ଗ୍ରୀକ୍ ଅଣଇହୁଦିଲ୍ । ତାନ୍ ମାୟାଡ଼ ତାଗାଙ୍କ ବୁଡ଼ ଝିଡ଼୍‌ସ୍‌ପାନ୍ ମାଇଦିଙ୍କ ଆଦ ଜିସୁଙ୍କ କେଡ଼ତେ ।

୨୭ କିନ୍ତୁ ଜିସୁ ଉତ୍ତର ହିଡ଼ତଣ୍ଡ, ନିଜର୍ ପିଲାଙ୍କ ମୁନେଙ୍କ ତିହିଡ଼ ଝେୟତିଡ଼ । ପିଲାନ୍ କାଦି ଅସ୍ ନେୟକିନ୍ ମୁନେ ଝାଟିଦାନାଦ୍ ସାୟେ ଆୟ ।

୨୮ ନାଟାଡ଼ କେଡ଼ତେ, ଆଞ୍ଜା, ନେୟକ୍ ଟେବୁଲ୍‌ତେ ମଦଲ୍ ମାଞ୍ଜ ପିଲାନ୍ ଏଲ୍‌ଲୁତିଙ୍କ ତିନ୍ତା ।

୨୯ ଜିସୁ ତାଙ୍କକିଙ୍କ କେତେତଣ୍ଡ, ନିଜାମ୍ ଗର୍, ଇଞ୍ଜେକେ ଲୋନ୍ ମାଲ୍‌ସ୍ ଆଞ୍ଜ ଉଡେ, ନି ମାୟାଡ୍‌ତାଗାଙ୍କ ବୁଡ୍ ଓଡ଼ିସି ଆଞ୍ଜମିନ୍ଦେ ।

୩୦ ନାଗାଡ୍, ଲୋନ୍ ମାଲ୍‌ସ୍ ଆଞ୍ଜ ଉଡେତେ ଯେ, ତାନ୍ ମାୟାଡ୍ କେତିତାଗ୍ ପାଟିମିନ୍ଦେ ନୁ ନିଜାମ୍ ବୁଡ୍ ତାଙ୍କକିଙ୍କ ଓଡ଼ିସି ମିନ୍ଦେ ।

ଜିସୁ କନ୍ଦାଙ୍କ ନୁ କେଞ୍ଜାନଙ୍କ ପାର୍ବେନଙ୍କ ସାୟେ ମାଡ୍‌ତଣ୍ଡ

୩୧ ତାନ୍ ପେକେ ଜିସୁ ସୋର ଅଞ୍ଜଲତାଗାଙ୍କ ସିଦନ୍‌ତାଗ୍ ଆଞ୍ଜ ଆଗାକଞ୍ଚ ଦେକାପଲୀ ପ୍ରଦେଶ ଲୋପେଙ୍କ ଇସ୍ ଗାଲିଲୀ ଆଞ୍ଜିନାଗ୍ ଝାସ୍ ହେଓଡ଼ଣ୍ଡ ।

୩୨ ଆଗାକଞ୍ଚ ବେସ୍‌କତଡ୍ ନାରୁଡ୍ ଝେରଙ୍କ ବୟରାଙ୍କ ଜିସୁନ୍ ଗାରେ ତାଡ୍‌ତଡ୍ । ଅଣ୍ଡ ଲେକେଡ୍ ଗଟି ତିର୍‌ୟେ ପାର୍ବେନଟ ମାଡ୍‌ତଣ୍ଡ । ଅନ୍ ପର କାଲ୍ ଝାଟାନ୍ ମାଲ୍‌ଦିଙ୍କ ଅଡ୍ ଜିସୁ ଅନୁରଦ୍ ମାଡ୍‌ତଡ୍ ।

୩୩ ଜିସୁ ଅକିଙ୍କ ଝେରଙ୍କେ ନାରୁଡ୍, ଲୋପେଙ୍କ ସୁଦୁର୍ ଦୁରାମ୍ ଆଡ୍‌ତଣ୍ଡ । ଅଣ୍ଡ କେଓଦାଗ୍ ଝାଡ୍‌ଞ୍ଜ ଆଦପି, ଉଟି ଅନ୍ ଝାଞ୍ଜେରତିଙ୍କ ହିଟ୍‌ତଣ୍ଡ ।

୩୪ ତାନ୍‌ପେକେ ସ୍ୱର୍ଗତ୍‌ପାକେ ପର୍‌ଉଡ଼ି, ଗାଟିନେସ୍‌କି କେଡ୍‌ତଣ୍ଡ “ଇପ୍‌ପତଃ !” ଅର୍ତ୍ତ ଲେଙ୍ଗା ।

୩୫ ସାଙ୍ଗେ ସାଙ୍ଗେ ନାରୁଡ୍ କେଞ୍ଜାନ୍ ଶକ୍ତି ପାଏମ୍ ଆଡ୍‌ତଣ୍ଡ, ଅନାଦ୍ କନ୍ଦାଲ୍ ବନ୍ଦନ୍ ଦୁର୍ ଆଡ୍‌ତେ ନୁ ଅଣ୍ଡ ଇଞ୍ଜ ଲେକେଡ୍ ଗଟି ତିର୍‌ୟେ ପାର୍‌ଦୁତଣ୍ଡ ।

୩୬ ଇ ଗଟନା ବିଷୟତେ ଝେରଡ୍‌ଡ଼କିଙ୍କ ବାତେ ବା କେଲ୍‌ମାଟ୍ ଇଞ୍ଜ ଜିସୁ ନାରୁଡ୍‌କ୍ ଆଦେଶ୍ ହିଟ୍‌ତଣ୍ଡ । କିନ୍ତୁ ଜିସୁ ବେସର୍ ମନା ମାଡ୍‌ତଣ୍ଡ, ନାରୁଡ୍ ଆସର୍ କେସ ଉଡ୍‌ତଡ୍ ।

୩୭ ବେନଡ୍ ଇ ସାରେ ଗଟି କେଞ୍ଜତଡ୍, ଅଡ୍ କାବା ଆସ୍ କେଡ୍‌ତଡ୍, ଅଣ୍ଡ ବେସର୍ ଚମକାରତେ ପାଡ୍‌ୟି ମାଡ୍‌ତୁଣ୍ଡ, ବୟରାଙ୍କ କେଞ୍ଜାନ୍ ଶକ୍ତି, କନ୍ଦାଙ୍କ୍ ତିର୍‌ୟାନ୍ ଶକ୍ତି ଇସ୍ ମିନ୍ଦେଣ୍ଡ ।

┌

ଜିସୁ ନାଲୁ ହଜାର ନାରୁଡ୍‌କ୍ ତିଡ୍‌ତଣ୍ଡ
(ମାଡିଉ ୧୫:୩୭-୩୯)

^୧ ଆ ବେସକ୍ ଦିନାତେ ପେକେ ଅଣ୍ଟଦାମ୍ ନାଗେ ନାରୁଡ୍ ଜିସୁନ୍ ଗାରେ ଗୁଡ଼ିମାଡ଼ତଡ଼ । ବେସୁଙ୍କ ଅଡ଼ାଦ୍ କାଦି ତେରତେ, ଜିସୁ ଶିଷ୍ୟଡ଼କିଙ୍କ କାରକି କେଡ଼ତଣ୍ଟ,

^୨ ଇ ନାରୁଡ୍ ମୁଣ୍ଟଦିନା ଆଡ଼ତେ ନା ଗାରେ ମିନ୍ଦେଡ଼ ଇଞ୍ଜେ । ଅଡ଼ କାୟ୍‌ଦେ ତିନ୍ଦାନ୍ ମାଇଦିଙ୍କ ବାତା ଇଲ୍‌ଝାଙ୍କ ନାକିଙ୍କ ଦୁଃକାମ୍ ଖେସୁଡ଼ ।

^୩ ଅଡ଼କିଙ୍କ ତିଝକଟ ଝିଡ଼ସିଡ଼କେ, ମାଲ୍‌ସ୍ ଆଦାନ୍ ଖେଲେ ଅଡ଼ ଆଇଦତଡ଼ । ଅଡ଼ ଲୋପେଙ୍କ ବେସକ୍‌ତଡ଼ ନାଗେ ଦୁରାକଞ୍ଚ ଝାସ୍‌ମିନ୍ଦେଡ଼ ।

^୪ ଶିଷ୍ୟଡ଼ ପାତ୍ରାରା ମାଡ଼ତଡ଼, ଇଗ୍ ବାଡ଼ଇଲ୍‌ଝେ ଜାଗାତାଗ୍ ଇସର୍ ନାରୁଡ଼କିଙ୍କ ତିନ୍ଦାନ୍ ମାଇଦିଙ୍କ ମାମ୍ ବେଗାକଞ୍ଚ କାଦି ଯୋଗାଡ଼, ମାଡ଼ପାରଦ୍ ତମ୍ ?

^୫ ଜିସୁ ପାତ୍ରାରା ମାଡ଼ତଣ୍ଟ, ମି ଗାରେ ବେସକ୍ ରୁଟି ମିନ୍ଦେ ?

^୬ ମାଡ଼ର୍ ସାଡ଼ଟାନ୍ ଇଞ୍ଜ ଅଡ଼ ଉଡ଼ର୍ ଇଡ଼ତଣ୍ଟ । ଜିସୁ ନାରୁଡ଼କିଙ୍କ ନେଲ୍ କୁଦାନ୍ ମାଇଦିଙ୍କ କେଡ଼ତଣ୍ଟ । ତାନ୍‌ପେକେ ଆ ସାଡ଼ଟାନ୍ ରୁଟିଙ୍କ ଅସ୍ ଜିସୁ ଇଶ୍‌ବରତିଙ୍କ ଦନ୍‌ସବାଦ୍ ଇଡ଼ତଣ୍ଟ ନୁ ଆଞ୍ଜିଙ୍କ ଉଝୁସ୍ ନାରୁଡ଼ ଲୋପେ ତୁସାନ୍ ମାଇଦିଙ୍କ ଶିଷ୍ୟଡ଼ କାଇଦେ ଇଡ଼ତଣ୍ଟ । ଶିଷ୍ୟଡ଼ ଆଞ୍ଜିଙ୍କ ତୁସଡ଼ ।

^୭ ଅଡ଼ ଗାରେ ବେସକ୍ ସୁଦୁରାଝ୍ କିକେ ଆନ୍‌ତେ ମାଡ଼ତା । ଆଦିନ୍ ମାଇଦିଙ୍କ ଅଣ୍ଟ ଇଶ୍‌ବରତିଙ୍କ ଅଣ୍ଟ ମେଣ୍ଟନ୍ ଦାମ୍ ଦନ୍‌ସବାଦ୍ ଇସ୍ ଆଞ୍ଜିଙ୍କ ତୁଡ଼ସାନ୍ ମାଇଦିଙ୍କ ଶିଷ୍ୟଡ଼କ୍ କେଡ଼ତଣ୍ଟ ।

^୮ ସାରେ ତଡ଼ ନାଗେ ତିଞ୍ଜ ପାଞ୍ଚତଡ଼ । ମିଗିଲ୍‌ତାଝୁ ରୁଟି ସାଡ଼ଟାନ୍ ଜୁଡ଼ିନାଗ୍ ପେଏକି ନେଏଡ଼ତଡ଼ ।

^୯ ନାଲ୍ ହଜାର୍ ନାରୁଡ଼ ଇ କାଦି ତିଞ୍ଜମାଡ଼ତଡ଼ ନୁ ମିଗ୍‌ଲି ରାଲି ମାନ୍ଦାନ୍ ଉରଞ୍‌ତାଡ଼ ରୁଟିକିଙ୍କ ଶିଷ୍ୟଡ଼ ପେହେକି ସାଡ଼ଟାନ୍ ଜୁଡ଼ି ନିଃହଡ଼ ।

^{୧୦} ତାନ୍‌ପେକେ ଜିସୁ ନାରୁଡ଼କିଙ୍କ ରହସିସ୍ ଶିଷ୍ୟଡ଼ ତ ଓଡ଼ତାଗେ ତାରି ଦଲ୍‌ମନୁତା ନାରଦା ଆଡ଼ତଣ୍ଟ ।

ଫାରୁଶିଡ଼ ଆଗର୍ଯ୍ୟ ପାଡ଼ୟି ଉଡ଼ାଙ୍କ ଇଛା ମାଡ଼ତଡ଼,
(ମାଡ଼ିଉ ୧୭:୧-୪)

୧୧ ☆ଅଣ୍ଟ ଦିନେ ବେସକ୍ତତ୍ ଫାରୁଶିତ୍ ଜିସୁନ୍ ଗାରେଝାସ୍ ଅନ୍ ତତ୍ ରାମକ୍ ମାଡ଼ାଙ୍କ ପସ୍ପତତ୍ । ଜିସୁନ୍ ଦୋଷତିଙ୍କ ପୟ୍ଦାନ ମାଇଦିଙ୍କ ଉଡ଼ୟ୍ ଖାଟି ଅତ୍ ଅଂକିଙ୍କ ଅନୁରଦ୍ ମାଡ଼ତତ୍ ଅଣ୍ଟୟ୍ ଆଶର୍ଯ୍ୟ ପାଡ଼ିୟ୍ ମାଡ଼ି ଅଣ୍ଟ ପ୍ରମାଣ୍ ମାଡ଼ିଣ୍ ଯେ, ଅନ୍ ସେଜେ ଇଶ୍ବରତେ ଶକ୍ତି ମିୟେ ।

୧୨ ☆ଜିସୁ ଗାଟି ନେସକି କେଡ଼ତଣ୍ଟ, “ଇ ଯୁଗ୍ତେ ନାରୁଡ଼, ବାକ୍‌ଝା ପାଡ଼ିୟ୍ ଉଡ଼ାନ ମାଇଦିଙ୍କ ବାତେଙ୍କ ଇସର୍ ଦାୟେ ? ନାନ ମିକିଂଙ୍କ ସତ୍ କେସ୍ ନେହ୍‌ତୁତାନ, ଇ ଲେକେଡ଼ ପ୍ରମାଣ୍ ଇ ନାରୁଡ଼କ୍ ଇଦାନାଦ୍ ଆୟ୍‌ୟ ।”

୧୩ ଇଲା କେସ୍ ଜିସୁ ଅଡ଼କିଂଙ୍କ ଓଡ଼ସି ଓଡ଼ତାଗ୍ ମାଲ୍‌ସ୍ ଖାଡ଼ତଣ୍ଟ ନୁ ମାଡ଼ଗିନ୍ ଆପ୍‌ପାକା ଆଡ଼ତଣ୍ଟ ।

ହେରୋଦ୍ ନୁ ଫାରୁଶିତ୍ ପାଣ୍ଡୁ
(ମାଡ଼ିଉ ୧୭:୫-୧୨)

୧୪ ଅଣ୍ଟଦିନେ ଶିଷ୍ୟତ୍ ରୁଟି ଅଦାନଙ୍କ ମାଙ୍ଗ୍ ମାଡ଼ତତ୍ । ଅତ୍ ଗାରେ ମାଡ଼ର୍ ଅଣ୍ଟୟ୍ ରୁଟି ମାଡ଼ତେ ।

୧୫ ☆ଜିସୁ ଅଡ଼କିଂଙ୍କ ସତର୍କ୍ ମାଡ଼ି କେଡ଼ତଣ୍ଟ, “ସାବଦାନ, ଫାରୁଶିତ୍ ନୁ ହେରଦ୍‌ତେ ପାଣ୍ଡୁତାଗାଙ୍କ ସତର୍କ୍ ମାନୁର୍ ।”

୧୬ ଶିଷ୍ୟତ୍ ଇ ବିଷୟତେ ନିଜର୍ ନିଜର୍ ଲୋପେ ଆଲ୍‌ସି ମିକା କେଡ଼ତତ୍, “ମାମ୍ ସାଙ୍ଗ୍‌ତେ ରୁଟି ତାଡ଼୍‌ଝାଙ୍କ ଅଣ୍ଟ ଇଗଟି କେଡ଼ତଣ୍ଟ ।”

୧୭ ଅତ୍ ବାତେ ଆଲ୍‌ସି ମିୟେଡ଼, ପୁଞ୍ଜମେଣ୍ଟେ ଜିସୁ କେଡ଼ତଣ୍ଟ, “ଗାରେ ରୁଟି ଇଲେ ଇଞ୍ଜ ଇସର୍ ଆଲ୍‌ସୁଡ଼ିଡ଼ ବାତେଙ୍କ ? ମିଡ଼ ବାତେ ଇଞ୍ଜେକ୍ ଆଇନା ପୁନ୍‌ପାର୍‌ଝିଡ଼କି ବୁଜେମ୍ ଆଦ୍‌ପାର୍‌ଝିଡ଼ ? ଇସର୍ ବାକ୍‌ଝା ନଡ଼ି !

୧୮ ☆କଣ୍ଡା ମାଞ୍ଜ ବାତେ ଉଡ଼୍‌ପାର୍‌ଝିଡ଼, କେଞ୍ଜକ୍ ମାଞ୍ଜ କେଞ୍ଜ ପାର୍‌ଝିଡ଼ ଏକେ ମାଡ଼ିଝିଡ଼ ?

୧୯ ଏଇଙ୍ଗ୍ ରୁଟି ଉଝୁସ୍ ବେଲା ଏଇଙ୍ଗ୍ ହଜାର୍ ନାରୁଡ଼କିଙ୍କ ଡିହ୍‌ସ୍‌ମାଡ଼ିଡ଼, ମିକ୍ ବାତେ ହେକେ ଇଲେ ? ଆ ଦିନେଡ଼ ଲେକାମ୍

☆ ୮:୧୧ ମାଡ଼ିଉ ୧୨:୩୮; ଲୁକ ୧୧:୧୭. ☆ ୮:୧୨ ମାଡ଼ିଉ ୧୨:୩୯; ଲୁକ ୧୧:୨୯.

☆ ୮:୧୫ ଲୁକ ୧୨:୧. ☆ ୮:୧୮ ମାର୍କ ୪:୧୨.

ରାଲି ମାନ୍ଦାନ ରୁଟି ଦୁଇଟି ଯାରେ ପେହକି ବେସକ ଜୁଡି ନିହସ୍ ମାଡ଼ତିଡ଼, ହେକେ ମିନ୍ଦେ ?”

“ବାର୍ତ୍ତାନ” ଇଞ୍ଜ ଶିଷ୍ୟତ୍ ଉତ୍ତର ହିଡ଼ତଡ଼ ।

୨୦ ଜିସୁ ମେଣ୍ଡେ ପାତ୍ରାରା ମାଡ଼ତଣ୍ଡ, “ମେଣ୍ଡେ ବେସୁଙ୍କ ନାଲୁ ହଜାର ନାରୁଡ଼ ମାଇଦିଙ୍କ ସାଡ଼ତାନ ରୁଟି ଉଝୁସ୍ ମାଡ଼ତାନ, ମିଗିଲି ମାଡ଼ତେ ରୁଟି ଦୁଇଟି ପେହକି ବେସକ ଜୁଡି ନୀଇସ୍ ମାଡ଼ତିଡ଼ ?” ଅଡ଼ ଉତ୍ତର ଇଡ଼ତଡ଼, “ସାଡ଼ତାନ ।”

୨୧ ଜିସୁ ପ୍ରଶ୍ନ ମାଡ଼ତଣ୍ଡ, “ଆଗେକ୍ ବା ବାତେ ମିଡ଼ ବୁଜେମ୍ ଆୟୁଡ଼ିଡ଼ ?”

ଜିସୁ ବେଡ଼ସାଇଦାତାର୍ କାନାଙ୍କ ଉଡ଼ାନ ଶକ୍ତି ହିଡ଼ତଣ୍ଡ

୨୨ ଅଡ଼ ବେସୁଙ୍କ ବେଡ଼ସାଇଦା ନାର୍ ଏଞ୍ଜତଡ଼, ନାରୁଡ଼ ଖେରଙ୍କ କାନାଙ୍କ ଜିସୁନ୍ ଗାରେ ତାସ୍ ଅଂକିଙ୍କ ଇଟାନ ମାଇଦିଙ୍କ ଅନୁରୋଦ ମାଡ଼ତଡ଼ ।

୨୩ ଜିସୁ କାନାନ କାଇ ପୟସ୍ ଅଂକିଙ୍କ ନାର୍ଦେ ବାୟୁଡ଼ ଅଡ଼ତଣ୍ଡ । ଆଗେ ଅଂକିଙ୍କ କଣ୍ଟାନାଗ୍ ଉସୁଲ୍ ମେହେସିସ୍ ଅନ୍ ମେନ୍ଦୁଲ୍ ତାଗେ କାୟୁଝାଟି ଅଂକିଙ୍କ ପାତ୍ରାରା ମାଡ଼ତଣ୍ଡ, “ବାତା ଉଡ଼ ପାରୁଡ଼ି ?”

୨୪ ନାରୁଡ଼କ୍ ଉଡ଼ି କେଡ଼ତଣ୍ଡ, “ହ, ନାରୁଡ଼କିଙ୍କ ଉଡ଼ ପାରୁଡ଼ିତାନ । ଅଡ଼ ବୁଟା ମାଡ଼ାନଡ଼ ଲେକାମ୍ ତନ୍ଦମିନ୍ଦେଡ଼ ।”

୨୫ ଜିସୁ ନାରୁନ୍ଦେ କଣ୍ଡେଡ଼ ପର ନିଜର୍ କାଇଝାଟି ନୁ ନାରୁଣ୍ଡ ସାୟେ ହେକେ ମାଡ଼ତଣ୍ଡ । ହଟାଡ଼ ଅନାଦ୍ ଉଡ଼ାନ ଶକ୍ତି ମାଲ୍‌ସ୍ ଝାଡ଼ତେ ନୁ ଅଣ୍ଡ ଲେକେଡ଼ ଉଡ଼ପାରୁଡ଼ି ।

୨୬ ଜିସୁ ଅଂକିଙ୍କ ଆ ନାର୍ ମାଲ୍‌ସ୍ ଆନ୍‌ମା ଇଞ୍ଜ ଗଟ୍ ଇସ୍ ଅନ୍ ଲୋନ୍ ରୟସିଡ଼ତଣ୍ଡ ।

ଜିସୁନ୍ ବିଷୟତେ ପିତର୍ କେତାନାଦ୍

(ମାଡ଼ିଉ ୧୭:୧୩-୨୦; ଲୁକ ୯:୧୮-୨୧)

୨୭ ତାନ୍ ପେକେ ଜିସୁ ନୁ ତାନ୍ ଶିଷ୍ୟତ୍ କାଇସରିୟା ଫିଲିପ୍‌ପା ନାର୍ଦେ ଗାରେ ନାରକି ନା ଆଦାନ୍‌ଖେଲେ ଆର୍ଦାଗ୍ ଜିସୁ ପାତ୍ରାରା ମାଡ଼ତଣ୍ଡ, “ନାନ୍ ବେନନ୍, ଇ ବିଷୟତେ ନାରୁଡ଼ ବାତେ କେଡ଼ତଡ଼ ?”

୨୮ ☆ଅଡ଼ ଉତ୍ତର ହିତତଡ଼, “ବେସକ୍ ତଡ଼ କେତୁତଡ଼, ନିମେ ବାପ୍ତିସ୍ମ ଯୋହନ୍,” ମେଣ୍ଡେ ବେସକ୍ ତଡ଼ କେତୁତଡ଼, ନିମେ ଏଲିୟ । ମେଣ୍ଡେ ଝେରତଡ଼ ମନେ ମାଡ଼ତୁଡ଼, ନିମେ ବାବବାଦୀଡ଼ ଲୋପେଙ୍କ ଝେରନ୍ତି ।

୨୯ ☆ଜିସୁ ଅଡ଼କିଂଙ୍କ ପାତ୍ରାରା ମାଡ଼ତଣ୍ଡ, “ମେଣ୍ଡେ ମିଡ଼ ବାତେ ଆଲ୍‌ସୁତିଡ଼ ? ନାନ୍ ବେନନ୍, ଇ ବିଷୟତେ ମିଡ଼ ବାତେ କେତୁତିଡ଼ ।” ପିତର୍ ଉତ୍ତର ଇଡ଼ତଣ୍ଡ, “ନିମେ ଇଶ୍ବରତେ ହେଞ୍ଚିମାୟାନ୍ ତ୍ରାଣକର୍ତ୍ତାନ୍ ମସୀହନ୍ ।”

୩୦ ଜିସୁ ଅଡ଼କିଂଙ୍କ ଗର୍ ଇଡ଼ତଣ୍ଡ, “ନା” ବିଷୟତେ ଇ ଗର୍ ବେନଙ୍କ କେଲ୍‌ମାରି ।

ଜିସୁ ନିଜର୍ ଦୁଃକାମ୍ ନୁ ତଲାନ ବିଷୟତେ ଗର୍ ହିଡ଼ତଣ୍ଡ
(ମାତିଉ ୧୭:୨୧-୨୮; ଲୁକ ୯:୨୨-୨୭)

୩୧ ଜିସୁ ଶିଷ୍ୟଡ଼କିଙ୍କ ବୁଜାମାଡ଼ି କେଡ଼ତଣ୍ଡ, ନାରୁନ୍ ପିଲେତିଙ୍କ ନାଗେ କଷ୍ଟ ଆଦ ଝେୟତିଡ଼ । ଦର୍ମନେତା, ମୁକ୍ୟ ପୁରହିତ ନୁ ଦର୍ମଗୁରୁଡ଼ ନଡ଼ତ ତିପାଲ୍ ଆସ୍ ଅଣ୍ଡ ତଲିତଣ୍ଡ । କିନ୍ତୁ ମୁଣ୍ଡଦିନାତେ ପେକେ ଅଣ୍ଡ ମେଣ୍ଡନଦାମ୍ ତେଦିତଣ୍ଡ ।

୩୨ ଇ ସାରେ ଗଟି ଜିସୁ ଗାଟି ଲେକେଡ଼ତେ ଶିଷ୍ୟଡ଼କିଙ୍କ ବୁଜାମାଡ଼ିଡ଼ତଣ୍ଡ । ଆଦିଙ୍କ ପିତର୍ ଅଂକିଙ୍କ ଲୋପେ କାଙ୍ଗ ଅସ୍ ଅନ୍‌ତଡ଼ କାଈଲି କେଡ଼ତଣ୍ଡ ।

୩୩ କିନ୍ତୁ ଜିସୁ ମାଲ୍‌ସ୍ ଶିଷ୍ୟଡ଼ା ଉଡ଼ତଣ୍ଡ ନୁ ପିତରତିଙ୍କ ଲେକେଡ଼ ଉଡ଼ି କେଡ଼ତଣ୍ଡ, “ନାୟାଗାଙ୍କ ଦୁର୍ ଆୟମ୍ ଶୟତାନ୍, ନିୟାଦ୍ ଚିନ୍ତା ମାତର୍ ନାରୁଡ଼ାଦ୍, ଇଶ୍ବରତେ ଶକ୍ତି ଆୟ ।”

୩୪ ☆ତାନ୍ ପେକେ ଜିସୁ ଶିଷ୍ୟଡ଼କିଙ୍କ ନୁ ସାରେ ତଡ଼କ୍ କାର୍‌ଜି ମିକା କେଡ଼ତଣ୍ଡ, “ବେନ କି ନା ସାଙ୍ଗେ ଝାଦାନ୍ ମାଇଦିଙ୍କ ଇଚ୍ଛା ଆଦତଣ୍ଡ, ଅଣ୍ଡ ସାରେ ଝିଡ଼ସିଣ୍ଡ ନୁ ନିଜର୍ କୁଶ କାଞ୍ଜି ନା ପେକେପେକେ ଝାଡ଼ିଣ୍ଡ ।

☆ ୮:୨୮ ମାର୍କ ୭:୧୪,୧୫; ଲୁକ ୯:୨,୮.

☆ ୮:୨୯ ଯୋହନ୍ ୭:୬୮,୭୯.

☆ ୮:୩୪

ମାତିଉ ୧୦:୩୮; ଲୁକ ୧୪:୨୭.

୩୫ ☆ବେନ ଆୟି ନିଜର ଜିହ୍ୱନ୍ ଗେଲ୍‌ସ୍ତାଙ୍କ ଇଚ୍ଛା ମାଡ଼ିତଣ୍ଡ, ଅଣ୍ଡ ଆଦ ହରା ମାଡ଼ିତଣ୍ଡ; କିନ୍ତୁ ବେନ ଆୟି ନା ମାଇଦିଙ୍କୁ ନୁ ଇ ଲେକେଡ଼ ଗର୍ ମାଇଦିଙ୍କୁ ନିଜର ଜିହ୍ୱନ୍‌ତିଙ୍କୁ ଇସ୍‌ମିକା, ଅଣ୍ଡ ଆଦଲେକାମ୍ ଆଦ ନେହେତିତଣ୍ଡ ।

୩୬ ଅର୍ତ୍ତୁଣ୍ଡ ନାରୁଣ୍ଡ ସାରେ ଜଗଡ଼ତିଙ୍କୁ ଲାବ୍ ମାଡ଼ି ନିଜର ଜିହ୍ୱନ୍‌ତିଙ୍କୁ ହରାମାଡ଼କେ, ଅନାଦ୍ ବାତେ ଲାବ୍ ଆଦତେ ? ନିଜାମ୍ ଲେକାମ୍ ଆୟ ।

୩୭ ବେନ୍ ବିଷୟତେ ବିନିମୟତେ ଅଣ୍ଡ ଅନାଦ୍ ଜିହ୍ୱନ୍‌ତିଙ୍କୁ ଦର୍ସ୍ନେ ପାର୍‌ଝଣ୍ଡ ।

୩୮ ଇଶ୍ୱର୍‌ ଝାଦାନ୍ ଦିନାମ୍‌ତେ ଯଦି ବେନ ନା ମାଇଦିଙ୍କୁ ନୁ ନା ଶିକ୍ଷାତେ ମାଇଦିଙ୍କୁ ସିଗ୍‌ ଆଦତ, ଆଲାକକ୍‌ ଇଶ୍ୱରତେ ଗୌରବତେ ନିଶ୍ଚି ଆସ୍‌ ନାରୁନ୍‌ ପିଲେ ବେସୁଙ୍କୁ ପବିତ୍ର ସ୍ୱର୍ଗତେ ଦୂତକିନ୍‌ ତ ମେଣ୍ଡନ୍‌ ଦାମ୍‌ ଝାଦତଣ୍ଡ, ଅଣ୍ଡ ଆନ୍ତେ ଅଡ଼ସେଙ୍ଗେ ସିଗ୍‌ ଆଦତଣ୍ଡ ।”

୯

୯ ଜିସୁ ଅଡ଼କିଂଙ୍କୁ ମେଣ୍ଡ କେଡ଼ତଣ୍ଡ, “ନାନ୍ ମିକିଙ୍କୁ ସଡ଼ କେସ୍‌ ନେଏଡୁତାନ୍, ଇଶ୍ୱରତେ ରାଜ୍ୟ ଶକ୍ତିତଡ଼ ଝାଦାନାଦ୍‌ ନୁ ଆଦାନାଦ୍‌ ଉଡ଼ାନ୍‌ ଯାକ ଇଗ୍‌ ମାୟାନ୍‌ ବେସକ୍‌ତଡ଼ ନାରୁଡ଼ ଡଲଡ଼ ।”

ଜିସୁ ମେଣ୍ଡନ୍‌ ଦାମ୍‌ ତନ୍ଦାନାଦ୍‌

(ମାଡିଉ ୧୭:୧-୧୩; ଲୁକ ୯:୨୮-୩୭)

୨ ☆ଆଦିନ୍‌ ଆରୁ ଦିନାତେ ପେକେ ପିତର, ଯାକୁବ୍‌ ନୁ ଯୋହନ୍‌ତିଙ୍କୁ ସାଙ୍ଗେ ଅସ୍‌ ଜିସୁ ଅଣ୍ଡୟ୍‌ ଡେଙ୍ଗ୍‌ମାୟାନ୍‌ ମେଟେତାଗ୍‌ ଆଡ଼ତଡ଼ । ଆଗେ ବେନଡ଼ବା ଇଲକଟ୍‌ ମାଡ଼ତଡ଼ । ଶିଷ୍ୟଡ଼ ଉଡ଼ତଡ଼ ଜିସୁନାଦ୍‌ ଅଣ୍ଡୟ୍‌ ବେସୁଙ୍କୁ ଉଡ଼ଝେ ଲେକାମ୍‌ ତନ୍ଦତଣ୍ଡ ।

୩ ଅନାଦ୍‌ ସିଲା ପାଣ୍ଡି ଆସ୍‌ ଗାଟି ଝେୟ୍‌ସ୍‌ ଆଡ଼ତେ ଜଗଡ଼ତେ ବେନ ଆଦିଙ୍କୁ ନର୍‌ସ୍‌ ଆସର୍‌ ପାଣ୍ଡି ମାଡ଼ପାର୍‌ଝଡ଼ ଆୟେଡ଼ ।

୪ ତାନ୍‌ ପେକେ ମୁଝୁଡ଼, ଶିଷ୍ୟଡ଼ ଉଡ଼ତଡ଼, ଏଲିୟ୍‌ ନୁ ମୋଶାଲ୍‌ ପେଇସ୍‌ ମିକା ଜିସୁନଡ଼ ଡିର୍‌ୟା ଡିର୍‌ୟି ଆଦୁତଡ଼ ।

୫ ପିତର ଜିସୁଙ୍କ କେତେତଣ୍ଡ, “ଗୁରୁ, ଇଦ୍ ବେସର୍ ସାରଦେତେ ଗର୍ ଯେ ନେଣ୍ଡ ମାନାଡ୍ ଇଗେ ମିନ୍ଦେଡ୍ । ଇଗ୍ ମୁଣ୍ଡ ଗୁଡ଼ସା ତିଆର୍ ମାଡିକା । ଅଣ୍ଡୟ ନି ମାଇଦିଙ୍କ୍ ଅଣ୍ଡୟ ମୋଗାନ୍ ମାଇଦିଙ୍କ୍ ନୁ ମେଣ୍ଡ ଅଣ୍ଡୟ ଏଲିୟନ୍ ମାଇଦିଙ୍କ୍ ।”

୬ ପିତର ବାତେ କେତେତଣ୍ଡ, ଇଞ୍ଜ ଆଲ୍‌ସକଟ୍ ଇ ଗର୍ କେସ୍‌ମାଡ୍‌ତଣ୍ଡ । ଇକେ ଶିଷ୍ୟଡ୍ ପିନା ଝେର୍ସ୍ ମାଡ୍‌ତଡ୍ ।

୭ ✱ଅଟାଡ୍ ମୟଲ୍ ତାଗାଙ୍କ୍ ଅଣ୍ଡୟ ମାବ୍ ତନ୍ଦେତେ ନୁ ଆଦିନ୍ ନିଡ୍‌କେ ଅଡ୍‌କିଙ୍କ୍ ମିସ୍‌ତେ । ମେଣ୍ଡେ ଆ ମାବ୍‌ତେ ଲୋପେଙ୍କ୍ ଅଣ୍ଡୟ ଗର୍ କେଞ୍ଜାଙ୍କ୍ ଆଡ୍‌ତେ, “ହୋ ନା ପ୍ରିୟ ମାର୍, ଇନାଦ୍ ଲେଙ୍ଗ୍ ମାନ୍ ଇସ୍ କେଞ୍ଜାର୍ ।”

୮ ଆସୁର୍ ଶିଷ୍ୟଡ୍ ସାରେ ପାକା ସିର୍‌ପାର୍ ଉଡି ମାଡ୍‌ଡ୍ ଜିସୁନ୍ ଝିଡ୍‌ସି ଆଗେ ଝେର୍ ବେନଙ୍କ୍ ଉଡ୍‌ଡ୍ ।

୯ ଅଡ୍ ମେଟେତାଗାଙ୍କ୍ ତିଗାନ୍ ଝେଲେ ଜିସୁ ଅଡ୍‌କିଙ୍କ୍ ଗର୍ ଇସ୍ ତେଡ୍‌ତଣ୍ଡ, “ନେଣ୍ଡ ବାତେ ଉଡି ମିନ୍ଦେଡି, ନାରୁନ୍‌ପିଲେ ଡଲ୍‌ଡାଙ୍କ୍ ତେଦ୍‌ନା ଜାକ ଆ ଗର୍ ବେନଡ୍‌କ୍ କେଲ୍‌ମାର୍ ।”

୧୦ ଜିସୁନ୍ ଆଦେଶ୍ ଅଡ୍ ପାଲନ୍ ମାଡ୍‌ତଡ୍, କିନ୍ତୁ ଇ ବିଷୟତେ ଅଡ୍‌ଅଡ୍ ଲୋପେ ଆଲଚନା ମାଡ୍‌ତଡ୍, “ଡଲି ତେଦାନାଦ୍” ଇଡ୍‌କେ ବାତେ ?

୧୧ ✱ଅଣ୍ଡ ଜିସୁଙ୍କ୍ ପାଗାରା ମାଡ୍‌ତଣ୍ଡ, “ଏଲିୟ ମୁନେଙ୍କ୍ ଝାଡ୍‌ତଣ୍ଡ ଇଞ୍ଜ ମାନ୍ ଦର୍ମଶାସ୍ତ୍ର ତେ ଗୁରୁଡ୍ ବାତେଙ୍କ୍ କେଡ୍‌ତଡ୍ ?”

୧୨ ଜିସୁ ଉତ୍ତର ଇଡ୍‌ତଣ୍ଡ “ମୁନେଡ୍ ଲେକାମ୍ ସାରେ ବିଷୟତେ ତିଆର୍ ମାଡ୍‌ନ୍ ମାଇଦିଙ୍କ୍ ଏଲିୟ ମୁନେ ଝାଦାନ୍ ଗର୍ । ମେଣ୍ଡେ ନାରୁନ୍‌ପିଲେ ନାଗେ ଦୁଃକାମ୍ ତିପାଲ୍ ଆଡ୍‌ତଡ୍ ଇଞ୍ଜ ଶାସ୍ତ୍ରତାଗ୍ ବାତେଙ୍କ୍ ଲେକା ମିନ୍ଦେ ?

୧୩ ଅଣ୍ଡ ବେଲା ଆଇନ୍, ନାନ୍ ମିକିଙ୍କ୍ କେସିଦୁତାନ୍, ଏଲିୟ ଝାସ୍ ହେଝ୍‌ସ୍ ମିନ୍ଦେଣ୍ଡ ନୁ ନାରୁଡ୍‌ଅନ୍ ପରୁ ମନ୍ ଇଛା ବ୍ୟବହାର୍ ମାଡିମିନ୍ଦେଡ୍ । ଇଦିନ୍ ମାଇଦିଙ୍କ୍ ଅନ୍ ବିଷୟତେ ଶାସ୍ତ୍ରତାଗ୍ ବାତେ କେସ୍‌ମିନ୍ଦେଡ୍, ଆଝ୍‌ସାରେ ଗଟେମ୍ ଆଦ୍‌ତା ।”

✱ ୯:୭ ମାଡିଉ 3:୧୭; ମାର୍କ ୧:୧୧; ଲୁକ 3:୨୨. ✱ ୯:୧୧ ମାଡିଉ ୧୧:୧୪.

ଜିସୁ ବୁଡ଼ ପୟସ୍ ମାନ୍ଦାନ ପେକାଙ୍କ ସାୟ ମାଡ଼ତଣ୍ଡ
(ମାଡ଼ିତ ୧୭:୧୪-୨୧; ଲୁକ ୯:୩୭-୪୩)

୧୪ ଅଡ଼ ଖେର ଶିଷ୍ୟଡ଼ ଗାରେ ହେଞ୍ସ୍ ମାନ୍ଦାନଖେୟ, ଆଗେ ନାଗେ ନାରୁଡ଼ ଗୁଡ଼ି ମାଡ଼ତଡ଼ ନୁ ଆ ଶିଷ୍ୟଡ଼ତ ବେସକ୍ତଡ଼ ଦର୍ମଗୁରୁଡ଼ ରାମକ୍ ମାଡ଼ମାଡ଼ତଡ଼ ।

୧୫ ନାରୁଡ଼ ଜାପେ ଜିସୁଙ୍କ ଉଡ଼ି ଦାଦରେଲ୍ତଡ଼ ନୁ ମିରି ଆଞ୍ଜ ଅଂକିଙ୍କ ମଡ଼କ୍ ତଡ଼ ।

୧୬ ଜିସୁ ଶିଷ୍ୟଡ଼କିଙ୍କ କେଡ଼ତଣ୍ଡ, “ଅଡ଼ତ ବେନ ବିଷୟତେ ରାମକ୍ ମାଡ଼ମାଡ଼ତିଡ଼?”

୧୭ ନାରୁଡ଼ ଲୋପେଙ୍କ ଅରଡୁଣ୍ଡ ଉଉର ଇସ୍ କେଡ଼ତଣ୍ଡ, ଗୁରୁ, ନା ମାରିଙ୍କ ବୁଡ଼ ପୟତେ ନୁ ଅଣ୍ଡ ଗଟି ଡିୟାଙ୍କ ପାରଞ୍ଜଣ୍ଡ ।

୧୮ ବୁଡ଼ ଅଂକିଙ୍କ ବେସୁଙ୍କ ବେସୁଙ୍କ ନେଲ୍ ରାପିଡୁଡ଼ । ଆସୁଟ୍ ଅନ୍ ପାୟୁରତାଗାଙ୍କ ବୟୁଲ୍ ପେୟଡ଼ିଡ଼, ଅଣ୍ଡ ଅନ୍ ପାଲ୍କିଙ୍କ କରକୁତଣ୍ଡ ନୁ ଅନ୍ ମେୟୁଲ୍ ମେୟୁଲ୍ । ବୁଡ଼ ଖିରସ୍ତାନ ମାଇଦିଙ୍କ ନି ଶିଷ୍ୟଡ଼କିଙ୍କ କେଡ଼ତାନ, କିନ୍ତୁ ଅଡ଼ ବାଡ଼ ବା ମାଡ଼ପାରଞ୍ଜଡ଼ ।

୧୯ ଜିସୁ ଅଡ଼କିଙ୍କ କେଡ଼ତଣ୍ଡ, “ମିଡ଼ ବେସର କମ୍ ବିଶ୍ୱାସିଡ଼ । ମି ତଡ଼ ନାନ୍ ମେଣ୍ଡେ ବେସକ୍ ଦିନା ମାଡ଼ତାନ ? ପେକାଙ୍କ ନା ଗାରେ ପୟସ୍ ତାଡ଼ାଟ୍ !” ଅଡ଼ଅକିଙ୍କ ଜିସୁନ୍ ଗାରେ ତାଡ଼ତଡ଼ ।

୨୦ ପ୍ରେତାମ୍ ଜିସୁଙ୍କ ଉଡ଼ ଝାନାକେ ପେକାଙ୍କ ରେଡ଼ ଇଲ୍ଖେ ମାଡ଼ି ନେଲ୍ ରାପି ପେକାନ୍ ପାୟୁରତାଗାଙ୍କ ବୟୁଲ୍ ପେସ୍ପି ନେଲ୍ ପରଲ୍ଲାଙ୍କ ପସ୍ତଣ୍ଡ ।

୨୧ ଜିସୁ ତାମ୍ ବାବାଙ୍କ କେଡ଼ତଣ୍ଡ, “ବେସକ୍ ଦିନା ପୟସ୍ ଅଣ୍ଡ ଇଲା ଆଡ଼ତଣ୍ଡ?”

୨୨ ଅଣ୍ଡ ଉଉର ଇଡ଼ତଣ୍ଡ “ପିଲେକଂସ୍ । ବୁଡ଼ ଅଂକିଙ୍କ କିସ୍ତାଗ୍ ବା ଏରଦାଗ୍ ରାପି ଆଞ୍ଜକାନ୍ ମାଇଦିଙ୍କ ନାଗେଦାମ୍ ରେଷ୍ଟା ମାଡ଼ତେ । ଗୁରୁ ! ନିଜାମ୍ ଆକ୍, ଦୟାମାଡ଼ି ମାକିଙ୍କ ଇଗାଙ୍କ ସାହାୟ ମାଡ଼ା ।”

୨୩ ଜିସୁ କେଡ଼ତଣ୍ଡ, “ହଁ !” ବେନ ବିଶ୍ୱାସ ମାଡ଼ିତଣ୍ଡ, ଅନ୍ ଗାରେ ସାରେ ନିଜାମ୍ ।

୨୪ ପେକାଲତ୍ ବାବାଲ୍ ଗାଟି ଲେଙ୍ଗାତେ କେତତଣ୍ଡ, “ନା ବିଶ୍ୱାସ୍ ମିନ୍ଦେ, କିନ୍ତୁ ଅବିଶ୍ୱାସି । ନା ବିଶ୍ୱାସ୍ ଅଦିକ୍ ମାଡାନ୍ ମାଇଦିଙ୍କ ନାକିଙ୍କ ସାହାଯ୍ୟ ମାଡ଼ା ।”

୨୫ ଜିସୁ ଉଡ଼ତଣ୍ଡ ସାରେ ପାକାଙ୍କ ନାରୁଡ଼ ଅନଗାରେ ଝାସ୍ ମାଡ଼ତଡ଼ । ଆଦିଙ୍କ ଆ ପ୍ରେତାମାତିଙ୍କ ଗର୍ ଇଡ଼ତଣ୍ଡ, “ତିର୍ତ୍ତେ ପାର୍ତ୍ତେ ନନ୍ ନୁ କେଞ୍ଜାଙ୍କ ପାର୍ତ୍ତେ ଆମା ନାନ୍ ନିକିଙ୍କ କେତୁତାନ୍, ଇ ପେକାନ୍ ଲୋପେଙ୍କ ପେୟ୍ସ୍ ଅନ୍ ମେଣ୍ଡେ ବେସୁଙ୍କ ବା ଅନ୍ ଲୋପେ ନେଙ୍ଗମା ।”

୨୬ ପ୍ରେତାମା ଲେଙ୍ଗାଦେ କିଡ଼କି ମିକା ପେକାଙ୍କ ନେଲ୍ ରାପି ଅନଲୋପେଙ୍କ ପେୟ୍ସ୍ ଆଡ଼ତେ । ତେଡ଼ଇଲ୍ତେ ମାଡ଼ି ପେକାଙ୍କ ମଡ଼ଦେ ଲେକାମ୍ ତଡ଼ତଣ୍ଡ ନୁ ସାରେତଡ଼ କେତତଡ଼, “ଅନ୍ ତଲ୍ତଣ୍ଡ ।”

୨୭ କିନ୍ତୁ ଜିସୁ ଅନ୍ କାଇ ପୟ୍ସ୍ ଅଂକିଙ୍କ କେତତଣ୍ଡ ନୁ ଅଣ୍ଡ ତେଦି ନିଡ଼ତଣ୍ଡ ।

୨୮ ଜିସୁ ଲନ୍ ଲୋପେ ଆଡ଼ତେ ପେକେ ଶିଷ୍ୟତ୍ ଅଂକିଙ୍କ ଝେରକର୍ ପାଚାରା ମାଡ଼ତଡ଼, “ମାମ୍ ବାତେଙ୍କ ଆ ପ୍ରେତାମାତିଙ୍କ ତଲିଦ୍ ପାର୍ତ୍ତେ ?”

୨୯ ଜିସୁ ଉତ୍ତର ଇଡ଼ତଣ୍ଡ, “ଇଦ୍ ଲେକାମ୍ ପ୍ରେତାମାତିଙ୍କ ମାଡ଼ର୍ ପ୍ରାର୍ତ୍ତନାତେ ଶକ୍ତି ତଡ଼ ତଲ୍ଲାଇ ଆଦତେ-ଝେର ଉପାୟ୍ ଇଲେ ।”

**ଜିସୁ ତଲ୍ଲାନ ବିଷୟତେ ମେଣ୍ଡନ୍ ଦାମ୍ ଗର୍ ଇଡ଼ତଣ୍ଡ
(ମାତିଉ ୧୭:୨୨-୨୩; ଲୁକ ୯:୪୩-୪୫)**

୩୦ ଜିସୁ ନୁ ତାନ୍ ଶିଷ୍ୟତ୍ ଆ ପଡ଼ୟ୍ ଝିଡ଼ସି ଗାଲିଲୀ ଅଞ୍ଚଳ ଲୋପେଇସ୍ ଆଡ଼ତଡ଼ । ଅଣ୍ଡ ବେଗ୍ ମିନ୍ଦେଣ୍ଡ, ବେନଡ଼ ପୁନ୍ ମାକିଡ଼, ଇଞ୍ଜି ଜିସୁ ଇଚ୍ଛା ମାଡ଼ ମାଡ଼ତଣ୍ଡ,

୩୧ କିନ୍ତୁ ଇଦ୍ ସମୟତେ ଜିସୁ ଶିଷ୍ୟତ୍ କିଙ୍କ ବୁଜାମାଡ଼ି କେସ୍ ମାଡ଼ତଣ୍ଡ, ବେଦ୍ ପୁରୁଙ୍କ, “ମନୁଷ୍ୟପୁତ୍ର,” ନାରୁଡ଼ କାଇଦେ ଦସ୍ ଅସ୍ ମାୟି ଆଦତଡ଼, କିନ୍ତୁ ବେଦ୍ ପୁରୁଙ୍କ ଅଣ୍ଡ ତଲ୍ଲାନ ମୁଣ୍ଡଦିନାତେ ପେକେ ଅଣ୍ଡ ଜିଞ୍ଜେ ଆଦତଣ୍ଡ ।

୩୨ ଶିଷ୍ୟତ୍ ଇ ଗର୍ତେ ଅର୍ତ୍ତ ପୁନ୍ୟାଙ୍କ ପାର୍ତ୍ତେ । କିନ୍ତୁ ଆ ବିଷୟତେ ଅଂକିଙ୍କ ମେଣ୍ଡେ ପ୍ରଶ୍ନ ମାଡ଼ାଙ୍କ ଝେରତଡ଼ ।

ସାରେଡିଙ୍କ ବେଡ଼ୟଣ୍ଟ ବେନ ?

(ମାତିଉ ୧୮:୧-୫; ଲୁକ ୯:୪୭-୪୮)

୩୩ ଅଡ଼ କପର୍ନାହୁମ୍ ତାଗ୍ ଏଞ୍ଜତଡ଼ ଲୋନ୍ ନେଙ୍ଗ୍‌ତେ ପେକେ ଜିସୁ ଶିଷ୍ୟଡ଼କିଙ୍କ ପାଚାରାମାଡ଼ତଣ୍ଟ, “ଆର୍‌ଦାଗ୍ ଝାଦାନ୍‌ଝେୟ୍ ମିଡ଼୍‌ବେନ୍ ବିଷୟତେ ରାମ୍‌କ୍ ମାଡ଼ମାଡ଼ତିଡ଼୍?”

୩୪ ☆ଅଡ଼ ଉତ୍ତର ଇଞ୍ଜକଟ୍ ମାଡ଼ତଡ଼, ବାତେଙ୍କିକ୍‌କେ ଅଡ଼ ଲୋପେଙ୍କ ସାରେଡିଙ୍କ ବେନଣ୍ଟ ବେଡ଼ୟଣ୍ଟ, ଇ ବିଷୟତେ ଅଡ଼ ଆର୍‌ଦାଗ୍ ଆଲ୍‌ସ ମାଡ଼ତଡ଼ ।

୩୫ ☆ଜିସୁ କୁଦି ଅନ୍ ବାରଜାନ୍ ଶିଷ୍ୟଡ଼କିଙ୍କ ଗାରେ କାଙ୍ଗ୍ ଅଡ଼କିଙ୍କ କେଡ଼ତଣ୍ଟ, “ବେନ ମୁନେ ଜାଗା ଇଚ୍ଛା ମାଡ଼ିତଣ୍ଟ, ଅଣ୍ଟ ପେକେ ମାନିଣ୍ଟ ନୁ ସାରେତଡ଼ଦେ ସେବକ ଆଇନ୍ ।”

୩୬ ତାନ୍‌ପେକେ ଅଣ୍ଟ ଅର୍‌ତୁଙ୍କ ବାବୁଙ୍କ ତାସ୍ ସାରେତଡ଼ ମୁନେ ନିଲ୍‌ସ୍ତତଣ୍ଟ, ମେଣ୍ଟେ ଅଂକିଙ୍କ ବର୍ ମାଡ଼ି କେଡ଼ତଣ୍ଟ,

୩୭ ☆“ବେନଆଇ ନା ପେଦେର୍‌ତେ ଇଦ୍‌ଲେକାମ୍ ଅର୍‌ତୁଙ୍କ ବାବୁଙ୍କ ସ୍ବାଗତ ମାଡ଼ିତଣ୍ଟ, ଅଣ୍ଟ ନାକିଙ୍କ ସ୍ବାଗତ ମାଡ଼ିତଣ୍ଟ ନୁ ବେନ ନାକିଙ୍କ ଗ୍ରହଣ ମାଡ଼ିତଣ୍ଟ, ଅଣ୍ଟ ମାତର୍ ନାକିଙ୍କ ଆୟ, ନା ଡ୍ରାନକର୍‌ଜାଙ୍କ ଆଣ୍ଡେ ଗ୍ରହଣ ମାଡ଼ିତଣ୍ଟ ।”

ବେନ ମାନ୍‌ବିରକି ଆୟ୍‌ୟଣ୍ଟ, ଅଣ୍ଟ ମାନ୍ ପାକ୍‌ତଣ୍ଟ

(ଲୁକ ୯:୪୯-୫୦)

୩୮ ଯୋହନ୍ ଜିସୁଙ୍କ କେଡ଼ତଣ୍ଟ, “ଗୁରୁ ନି ପେଦେର୍ ଆସ୍ ଝେରଣ୍ଟ ନାରୁଣ୍ଟ ବୁଡ଼ ଝୁଡ଼ସ୍ଥାନାଦ୍ ମାମ୍ ଉଡ଼ତମ୍ ଅଣ୍ଟ ମା ଦଲ୍‌ତଣ୍ଟ ଆୟ୍‌ଝାଙ୍କ ମାମ୍ ଅଂକିଙ୍କ କାର୍‌ଙ୍ଗ୍ ତାଡ଼ମ୍ ।”

୩୯ ଜିସୁ କେଡ଼ତଣ୍ଟ, “ଇ କାମ୍‌ଦାଗ୍ ଅଂକିଙ୍କ ତିପାଲ୍ ଇମାଟ୍ ।” ବେନ ନା ପେଦେର୍ ଆସ୍ ଆଶର୍ଯ୍ୟ ପାଡ଼ୟି ମାଡ଼ିତଣ୍ଟ, ଅଣ୍ଟ ସାଙ୍ଗେ ସାଙ୍ଗେ ନା ବିରୁଦ୍ଧତେ ବାତେ କେଡ଼ ପାର୍‌ଝଣ୍ଟ ।

୪୦ ☆ବେନ ମାନ୍ ବିରୁଦ୍ଧ ଆୟ୍‌ୟଣ୍ଟ, ଅଣ୍ଟ ମାନ୍ ପାକ୍‌ତଣ୍ଟ ।

୪୧ ☆ନାନ୍ ନିଜାମ୍ କେଡୁତାନ୍, ନା ପେର୍‌କ୍‌ତଣ୍ଟ ଇଞ୍ଜ ମିକିଙ୍କ ବେନ

☆ ୯:୩୪ ଲୁକ ୨୨:୨୪. ☆ ୯:୩୫ ମାତିଉ ୨୦:୨୭,୨୭; ୨୩:୧୧; ମାର୍କ ୧୦:୪୩,୪୪; ଲୁକ ୨୨:୨୭. ☆ ୯:୩୬ ମାତିଉ ୧୦:୪୦; ଲୁକ ୧୦:୧୭; ଯୋହନ୍ ୧୩:୨୦. ☆ ୯:୪୦ ମାତିଉ ୧୨:୩୦; ଲୁକ ୧୧:୨୩. ☆ ୯:୪୧ ମାତିଉ ୧୦:୪୨.

ଯଦି ଉନ୍ମାନ୍ ମାଇଦିଙ୍କ ଗିଲାସତାର୍ ଏର ଇଦତ, ଅଣ୍ଟ ନିଜାମ୍ ଅଣ୍ଟ ମସାହ ନାଗାଙ୍କ ପୁରସ୍କାର ପାହେମ୍ ଆଦତଣ୍ଟ ।

ବିଶ୍ୱାସତେ ଇଲ୍‌ଝେନନ୍

(ମାତିଉ ୧୮:୬-୯; ଲୁକ ୧୭:୧-୨)

୪୭ ବେନଆଇ ନା ଇ ବିଶ୍ୱାସିଡ୍ ଲୋପେଙ୍କ ସାରେତାଗାଙ୍କ ସୁଜୁର୍ ମିକା ବିଶ୍ୱାସ ଇଲ୍‌ଝେନନ୍ ଗଟାମାଡିତଣ୍ଟ, ଅନ୍ ବଣ୍ଟକତାର୍ ଅଣ୍ଟୟ ଜାତେକାଲ୍ ତହ୍‌ସିସ୍ ଅଂକିଙ୍କ ସମୁଦ୍ରତାର୍ ଏସିଦାଙ୍କ ଅନ୍ ମାଇଦିଙ୍କ ସାୟ୍ ଆଦତେ ।

୪୮ ✨ଯଦି ନି ଅଣ୍ଟୟ କାଇଦେ ସେଙ୍ଗେ ବିଶ୍ୱାସ ଝିଡ୍‌ସିଡ୍‌କେ, ଆ କାଇଦିଙ୍କ ନାଡ୍‌କି ହେସିମୁର୍ । ରେଣ୍ଟ କାଇକ୍ ଗାଟି ନିଡ୍‌ସ ମାନ୍ଦାନ୍ ନରକତାଗେ ରାଲାନାଗାଙ୍କ ଅଣ୍ଟୟ କାଇ ଇଲକଟ ଅନନ୍ତ ଜିଝୁନ୍‌ତାର୍ ଆଦାନାଦ୍ ସାୟେ ।

୪୯ ବାତେଙ୍କ ଇକ୍‌କେ ଅଡ୍‌କିଂଙ୍କ ନର୍କତାର୍ ପୁଡ୍‌ୟକ୍ ତଲ୍‌ଅ, କିସ୍ ବେସୁଙ୍କ ପିୟ ।

୫୦ ଯଦି ମି ଝେରଡ୍ ତେକେଡ୍ ସେଙ୍ଗେ ବିଶ୍ୱାସ ମାଡିମାନ୍ତାଡ୍, ଆ ତେକେଡିଙ୍କ ନାଡ୍‌କିମୁର୍ । ରେଣ୍ଟ ତେକାମାଞ୍ଜ ନରକତାର୍ ରାଲାନ୍ ଝିଡ୍‌ସି ଝେରଡ୍ ତେକ୍ ଇଲକଟ ଅନନ୍ତ ଜିଝୁନ୍ ଲାବ୍ ମାଡାନ୍ ନାଦ୍ ସାୟେ ।

୫୧ ବାତେଙ୍କ ଇକ୍‌କେ ଅଡ୍‌କିଂଙ୍କ ନର୍କତାର୍ ପୁଡ୍‌ୟକ୍ ତଲ୍‌ଅ, କିସ୍ ବେସୁଙ୍କ ପିୟ ।

୫୨ ✨ଯଦି ମି ଝେରଡ୍ କଣ୍ଟେଡ୍ ସେଙ୍ଗେ ବିଶ୍ୱାସ ମାଡିମାନ୍ତାଡ୍, ଆଦିଙ୍କ ଏଲ୍‌ସିମୁର୍ । ରେଣ୍ଟ କଣ୍ଟା ମାଞ୍ଜ ନରକତାର୍ ରାଲାନାଦ୍ ଝିଡ୍‌ସି ଝେରଡ୍ କଣ୍ଟା ମାଞ୍ଜ ଇଶ୍‌ରତେ ରାଜ୍ୟତାର୍ ନେଙ୍ଗାଙ୍କ ନାଦ୍ ସାୟେ ।

୫୮ ମନେ ନେହ୍‌ମୁର୍, ନରକଡ୍ ପୁଡ୍‌ୟ ବେସୁଙ୍କେ ବା ତଲ୍, ଆଗେ ନିଡ୍‌ସ ମାନ୍ଦାନ୍ କିସ୍ ବେସୁଙ୍କ ବା ପିୟ ।

୫୯ “ଆଝଡ୍ ତଡ୍ ବେଦ୍‌ପୁରୁଙ୍କ ପୁଜାନାଦିନ୍ ତଡ୍ ସାୟେ ଆଦତେ, ଆଦେପୁରୁଙ୍କ କିସ୍ ତଡ୍ ସାରେତଡ୍ ପବିତ୍ର ଆଦତଡ୍ ।”

୫୦ ☆ “ଅଞ୍ଜଡ଼, ଅଣ୍ଡ ସାୟେଡ଼ ଜିନିଷ; କିନ୍ତୁ ଅଞ୍ଜଡ଼ ଯଦି ତାନ୍ ଅଞ୍ଜଡ଼ତେ ମିଙ୍ଗୁସ୍ତାନାଦ୍ ହରାମାଡ଼ିତେ, ଆଦିଙ୍ଗ୍ ବେଦ୍‌ପୁରୁଙ୍ଗ୍ ମିଙ୍ଗୁସ୍ତାଙ୍ଗ୍ ଆଦତେ ?”

“ମି ହୁଦୟତାଗ୍ ସାଙ୍ଗନ୍ ଲୋପେ ଅଞ୍ଜଡ଼ଲନା କାଲିଲି ମାନୁର୍, ଆଲାଇକେ ମିଡ଼ିଆନ୍‌ତେ ମାନ୍‌ପାର୍‌ଦତିଡ଼ ।”

୧୦

କାଇଦେ ଏର୍ ସମ୍ପର୍କତେ ଜିସୁନ୍ ଶିକ୍ଷା

(ମାତିଉ ୧୯:୧-୧୨; ଲୁକ ୧୬:୧୮)

୧ ତାନ୍‌ପେକେ ଜିସୁ ଯର୍ଦ୍ଦନ ବେଡେମ୍ ଖେୟ୍‌ସ୍ ଇହୁଦିୟା ନାରତାଗ୍ ହେଞ୍ଜଡ଼ । ଆଗେ ଆନ୍‌ତେ ନାରୁଡ଼୍ ନାଗେ ସଂକ୍ୟାତେ ଖାସ୍ ଅନ୍ ଗାରେ ଗୁଡ଼ତେ ନୁ ଅଣ୍ ମୁନେଡ଼ ଲେକାମ୍ ଅଡ଼କିଙ୍ଗ୍ ଶିକ୍ଷା ଇଦାଙ୍ଗ୍ ପସ୍ତତଣ୍ ।

୨ ବେସକତଡ଼୍ ଫାରୁଶୀଡ଼୍ ଅନ୍ ଗାରେ ଖାସ୍ ଅଂକିଙ୍ଗ୍ ଉଡ଼ିୟିଦାଗ୍ ରାପାଙ୍ଗ୍ ଚେଷ୍ଟା ମାଡ଼ତଡ଼୍ । ଅଡ଼୍ କେଡ଼ତଡ଼୍, “ମା ଶାସ୍ତ୍ରତେ ନିୟମ୍ ଅନୁସାରେ ଅର୍ତୁଣ୍ଡ୍ ଅନ୍ ମୁତେଙ୍ଗ୍ କାଇଦେ ଏର୍ ଇଦ୍‌ପାର୍‌ଦତିଷ୍ କି ?”

୩ ଜିସୁ ଉତ୍ତର ଇଡ଼ତଣ୍, “ଇ ବିଷୟତେ ମୋଗାନ୍ ନିୟମ୍ ବାତେ କେତୁତେ ?”

୪ ☆ ଅଡ଼୍ ଉତ୍ତର ଇଡ଼ତଣ୍, “କାଇଦେ ଏର୍ ଇସ୍ ମୁତେଙ୍ଗ୍ ଝିଡ଼ିଆନ୍ ମାଇଦିଙ୍ଗ୍ ମୋଗାଲ୍ ଅନୁମତି ଇଡ଼ତଣ୍ ।”

୫ ଜିସୁ କେଡ଼ତଣ୍, “ମି ହୁଦୟତେ ତୁଟାଙ୍ଗ୍‌ତେ ମାଇଦିଙ୍ଗ୍ ମୋଗାଲ୍ ଇ ଲେକାମ୍ ନିୟମ୍ ମାଡ଼ିମାଡ଼ତଣ୍ ।

୬ ଇକେ ସୃଷ୍ଟି ସମୟତେ ଇଶ୍ବର ନାରୁଡ଼୍‌କ୍ ମାନେଇ ନୁ ନାଟାଡ଼୍ ଲେକାମ୍ ତିଆର୍ ମାଡ଼ିମାଡ଼ତଣ୍ ନୁ ଶାସ୍ତ୍ରତାଗ୍ କେଡ଼ତାଦ୍ ମିନ୍ଦେ ଯେ,

୭ ଆଦିନ୍ ମାଇଦିଙ୍ଗ୍ ନାରୁଣ୍ଡ୍ ଯାୟ୍ ବାବାଲଡ଼୍‌କ୍ ଝିଡ଼ିସି ତାନ୍ ମୁତେନ୍ ତ କାହିଲିତଣ୍ ନୁ

୮ ଅଡ଼୍ ଇର୍‌ଝୁଡ଼୍ କାଲିଲି ଅଣ୍ଡୟ୍ ଆଦତଡ଼୍ । ଅଡ଼୍ ମେଣ୍ଡେ ଇର୍‌ଝୁଡ଼୍ ଆସ୍ ମାନଡ଼୍, କିନ୍ତୁ ଅଣ୍ଡୟ୍ ଆଦତଡ଼୍ ।

୯ ଇଶ୍ଵର ବେନତ୍ତକ କାଲ୍‌ପି ମାଡ଼ିମିନ୍ଦେଣ୍ଡ, ନାରୁଡ୍ ଅଡ଼କିଂଙ୍କ
ଝେର୍‌ଝେର୍ ମାଡ଼ମାକିଡ୍ ।”

୧୦ ଅଡ଼ ଲୋନ୍ ମାଲ୍‌ତେ ପେକେ ଶିଷ୍ୟଡ୍ ଜିସୁଙ୍କ ଇ ବିଷୟତେ
ମେଣ୍ଡନ୍‌ଦାମ୍ ପାଚାରା ମାଡ଼ତଡ୍ ।

୧୧ ☆ଜିସୁ ଅଡ଼କିଂଙ୍କ କେଡ଼ତଣ୍ଡ, “ବେନ୍ ନାରୁଣ୍ଡ କି ମୁତେଙ୍କ
କାଇଦେ ଏର୍ ଇସ୍ ମେଣ୍ଡନ୍ ମୁତେଙ୍କ ତାଡ଼କେ, ଅଣ୍ଡ ନିଜେ ବ୍ୟବିଚାରି
ଆଦତଣ୍ଡ ନୁ

୧୨ ବେନ୍ ମୁତେ ମୁଦପାଙ୍କ କାଇଦେ ଏର୍ ଇସ୍ ମେଣ୍ଡ ଅର୍‌ତୁଙ୍କ
ପେଣ୍ଡଲୁ ଆଡ଼କେ, ଆଦ୍‌ଆନ୍‌ତେ ବ୍ୟବିଚାର୍ ଆଦତେ ।”

ଜିସୁ ପିଲାକିଙ୍କ ଆର୍‌ଗର୍‌ବାଦ୍ ମାଡ଼ତଣ୍ଡ

(ମାଡ଼ିଡ ୧୯:୧୩-୧୫; ଲୁକ ୧୮:୧୫-୧୭)

୧୩ ଅଡ଼ ପର କାଇଝାଟି ଆର୍‌ଗର୍‌ବାଦ୍ ମାଡ଼ାନ୍ ମାଇଦିଙ୍କ ବେସକ୍
ତଡ଼ ଶିଷ୍ୟଡ୍ କେଡ଼ତଡ଼ ପିଲାକିଙ୍କ ଜିସୁନ୍ ଗାରେ ତାଡ଼ମାର୍ ।

୧୪ ଆ ନାରୁଡ଼କ୍ ଶିଷ୍ୟଡ୍ ତିରସ୍ତାର୍ ମାଡ଼ମାନ୍‌ନାଦ୍ ଉଡ଼ି, ଜିସୁ
ଶିଷ୍ୟଡ଼ ପର କପାମ୍ ଆସ୍ କେଡ଼ତଣ୍ଡ, “ପିଲାକିଙ୍କ ନା ଗାରେ ଝାଦାଙ୍କ
ଇମୁର୍; ଅଡ଼କ୍ ଦମକ୍ ଇମାର୍, ବାଡେଙ୍କଇକେ ସୁଦୁପିଲାନ୍ ଲେକାମ୍
ନାରୁଡ଼ ସ୍ଵର୍ଗରାଜ୍ୟ ଅଦିକାର୍ ମାଡ଼ିତଡ଼ ।

୧୫ ☆ଇ ଗର୍ ନାନ୍ ମିକିଂଙ୍କ ନିଜାମ୍ କେଡୁତାନ୍ ଯେ, ସୁଦୁପିଲାନ୍
ଲେକାମ୍ ଅର୍‌ତୁଣ୍ଡ ଇଶ୍ଵରତେ ରାଜ୍ୟ ଗ୍ରହଣ ମାଡ଼ାଙ୍କ ତିଆର୍ ଆୟକଟ
ମାକେ, ଅଣ୍ଡ ଆଦିନାଗ୍ ନେଙ୍ଗାନଙ୍କ ପାର୍‌ଝଣ୍ଡ ।”

୧୬ ତାନ୍‌ପେକେ ଜିସୁ ପିଲାଙ୍କ ବରତାଗ୍ ଝାଟି ଅଡ଼ ପର କାଇଝାଟି
ଆର୍‌ଗର୍‌ବାଦ୍ ମାଡ଼ତଣ୍ଡ ।

ଅର୍‌ତୁଣ୍ଡ ସାଞ୍ଜୁକାର୍ ନାରୁଣ୍ଡ

(ମାଡ଼ିଡ ୧୯:୧୬-୩୦; ଲୁକ ୧୮:୧୮-୩୦)

୧୭ ଜିସୁ ମେଣ୍ଡନ୍‌ଦାମ୍ ଅନାଦ୍ ଆଦାନାଦ୍ ଆରାମ୍ ମାଡ଼ତେ
ଝେଲେ ଅର୍‌ତୁଣ୍ଡ ନାରୁଣ୍ଡ ମିରିଝାସ୍ ଅନ୍ ମୁନେ ମର୍‌ମିଣ୍ଡା ଉଝୁସି
ପାଚାରାମାଡ଼ତଣ୍ଡ, “ଗୁରୁ, ସାରେଦିନାଡ଼ ଜିଝୁନ୍ ଲାବ୍ ମାଡ଼ାଙ୍କ ନାକିଙ୍କ
ଲେକେଡ଼ ବାଡେ ମାଡ଼ଝେୟଡ଼ିଡ଼ ?”

୧୮ ଜିସୁ ଉତ୍ତର ଇଡ଼ତଣ୍ଡ, “ନାକିଙ୍କ ବାତେଙ୍କ ସାୟ ଇଞ୍ଜ କେତୁତିନ୍ ? ଇଶ୍ବରତିଙ୍କ ଝିଡ଼ସି ଝେରଅରତୁଣ୍ଡ ବେନ ଲେକେଡ଼ ଇଲେଣ୍ଡ ।

୧୯ ନିମେ ଶାସ୍ତ୍ରତେ ଆଜ୍ଞା ସାରେ ପୁଡ଼ତି ନାରୁଡ଼କ୍ ଆଞ୍ଜିକମା, ଆରଲ୍ଲା ମାଡ଼ମାର୍, ତଙ୍ଗ ମା, ବେନନ୍ ବିରୁଦ୍ଧତେ ମିର୍ ଗଟି ତାଡ଼ମାର୍, ତିପାଲ୍ ମାଡ଼ମାର୍, ଯାୟବାବାଙ୍କ ସାୟେ ଉଡ଼ମାର୍ ।”

୨୦ ନାରୁଣ୍ଡ କେଡ଼ତଣ୍ଡ, “ଗୁରୁ,” ନା ମୁନେକଞ୍ଜ ଇ ସାରେ ଗଟି ମାନେମ୍ ଆସ ଝାସ୍ମିନେନ୍ ।

୨୧ ଜିସୁ ଅନ୍‌ପାକେ ପ୍ରେମତେ ଉଡ଼ି କେଡ଼ତଣ୍ଡ, “ଅଣ୍ଡୟ ବିଷୟ ମାତର ନିୟାଦ୍ ଅବାବ୍ ମିନେ । ଆନ୍ ନିୟାଦ୍ ସାରେ ସମ୍ପତ୍ତି ଝାନ୍ନି ଆ ଦନ୍ତିଙ୍କ, ଗରିବିଡ଼କ୍ ଇମ୍, ଆଲାକ୍‌କେ ମିଡ଼୍ ସ୍ବର୍ଗତେ ଦନ୍ ପାହେମ୍ ଆଦତିନ୍ । ତାନ୍‌ପେକେ ଝାସ୍ ନା ପେକେ ଝାଡ଼େ ।”

୨୨ ଇ ଗର୍ କେଞ୍ଜିଞ୍ଜାନାକେ ଆ ନାରୁନ୍ ମକମ୍‌ତାଗ୍ ମୁର୍ମୁର୍ ଆସ୍ ଆଡ଼ତନ୍ ନୁ ଅଣ୍ଡ ଦଃକମ୍‌ତେ ଆଡ଼ତଣ୍ଡ, ବାତେଙ୍କ ଇକେ ଅଣ୍ଡ ବେଡ଼ୟ୍ ଦନି ମାଡ଼ତଣ୍ଡ ।

୨୩ ଜିସୁ ଶିଷ୍ୟତା ଉଡ଼ି କେଡ଼ତଣ୍ଡ, “ତାବ୍ କିନ୍ ସାଉକାରିଡ଼୍, ସର୍ଗରାଜ୍ୟତାଗ୍ ଆଦାଙ୍କ ବେସର୍ ତିପପାଲ୍ ।”

୨୪ ଇଦ୍ କେଞ୍ଜି ଶିଷ୍ୟତ୍ ବିସ୍ମିତ ଆଡ଼ତଡ଼୍ । କିନ୍ତୁ ଜିସୁ ମେଣ୍ଡେ କେଡ଼ତଣ୍ଡ, “ଶିଷ୍ୟନଡ଼ି, ବାସ୍ତବିକ୍ ସର୍ଗରାଜ୍ୟତାଗ୍ ଆଦାଙ୍କ ବେସର୍ ତିପପାଲ୍ ।

୨୫ ଦନି ନାରୁଣ୍ଡ ସର୍ଗରାଜ୍ୟତାଗ୍ ଆଦାନ୍ ଝିଡ଼ସି ଉର୍ ସୁଜ୍‌ତେ ବସ୍‌କ୍ଷ ଆଦାଙ୍କ ଗାଟି ସହଜ୍ ଆଦତେ ।”

୨୬ ଇ ଗର୍‌ତେ ଶିଷ୍ୟତ୍ ଗାଟି ବକ୍ସୁଞ୍ଜା ଆସ୍ ନିଜ୍ ନିଜ୍‌ତିଙ୍କ ପାଚାରା ମାଡ଼ତଡ଼୍, “ଆଲାକ୍‌କେ ବେନ ପରିତ୍ରାଣ ପହେମ୍ ଆଦତଣ୍ଡ ?”

୨୭ ଜିସୁ ଅଡ଼କିଂଙ୍କ ସିଦା ଉଡ଼ି କେଡ଼ତଣ୍ଡ, “ନାରୁନ୍ ପାକେ ଇଦ୍ ଆଦପାର୍‌ଞ୍ଜ; ଇଶ୍ବର ସାରେ ମାଡ଼୍ ପାର୍‌ଦତଣ୍ଡ ।”

୨୮ ଇ ଗର୍ କେଞ୍ଜି ପିତର୍ କେଡ଼ତଣ୍ଡ, “ଉଡ଼ା, ମାମ୍ ସାରେ ଝିଡ଼ସି ନି ପେକେ ଝାଡ଼ତମ୍ ।”

୨୯ ଜିସୁ କେଡ଼ତଣ୍ଡ, “ନାନ୍ ମିକିଂଙ୍କ ସଡ଼ କେସ୍ ନେହ୍‌ତୁତାନ୍, ନା ମାଈଦିଙ୍କ ନୁ ‘ସୁସମାଚାର୍’ ମାଈଦିଙ୍କ ବେନଆଇ ଲୋନ୍, ତାମୁଣ୍ଡ,

ଏଲାଡ଼, ବାବାଲ୍, ଯାୟ, ପିଲା ବା ଅନାଦ୍ ଖାୟା ସାରେ ଝିଡ଼ସିତଣ୍ଡ,
ଇ ଜିଞ୍ଜୁନ୍‌ତେ ଅଣ୍ଡ ମେଣ୍ଡେ ନାରଗେ ପାହେମ୍ ଆଦତଣ୍ଡ ।

୩୦ ଇସଡ଼ ଲୋନ୍, ତାମୁଣ୍ଡ ଏଲାଡ଼, ଯାୟ, ପିଲା, ଖାୟାନ୍ ଶହେ
ଗୁଣ ପାହେମ୍ ଆଦାନ୍ ତଡ଼୍‌ତିପାଲ୍ ଆନ୍‌ତେ ବଗେମ୍‌ଆଦତଣ୍ଡ; କିନ୍ତୁ
ଅଣ୍ଡ ଆକାଲାତେ ଅନନ୍ତ ଜିଞ୍ଜୁନ୍ ଲାବ୍ ମାଡ଼ିତଣ୍ଡ ।

୩୧ ☆ବେନଡ଼୍‌ଇଞ୍ଜେ ମୁନ୍ ମିନ୍‌ହେଡ଼୍‌, ଅଡ଼୍‌ଲୋପେଙ୍କ୍ ନାଗେ ପଡ଼େମ୍
ଆଦତଡ଼୍‌, ନୁ ବେନଡ଼୍‌ଇଞ୍ଜେ ପେକେ ମିନ୍‌ହେଡ଼୍‌; ଅଡ଼୍‌ଲୋପେଙ୍କ୍ ନାଗେ
ମୁନ୍ ଆଦତଡ଼୍‌ ।”

ଜିସୁ ତଲାନ୍ ବିଷୟତେ ମୁଣ୍ଡଦାମ୍ ଗଟ୍ ଇଡ଼ତଣ୍ଡ

(ମାତିଉ ୨୦:୧୭-୧୯; ଲୁକ ୧୮:୩୧-୩୪)

୩୨ ତାନ୍‌ପେକେ ଜିସୁ ନୁ ତାନ୍ ଶିଷ୍ୟଡ଼୍‌ ଜିରୁଶାଲାମ୍ ଆରଦାଲା
ଆଡ଼ତଡ଼୍‌, ଜିସୁ ଶିଷ୍ୟଡ଼୍‌ ମୁନ୍‌ମୁନ୍ ଆଞ୍ଜ ମାଡ଼ତଣ୍ଡ, ଶିଷ୍ୟଡ଼୍‌ ଝେରସ୍
ଆସ୍ ମାଡ଼ତଡ଼୍‌ ନୁ ପେକେ ତାକାନ୍ ଝେରେ ନାରୁଡ଼୍‌ ଆନ୍‌ତେ ଝେରସ୍
ମାଡ଼ତଡ଼୍‌ । ଜିସୁ ମେଣ୍ଡୁନ୍ ଦାମ୍ ତାନ୍ ବାରଜାନ୍ ଶିଷ୍ୟଡ଼୍‌କିଙ୍କ୍ ଅଣ୍ଡୟ
ଆଗେ କାଙ୍ଗ୍ ବବିଷ୍ୟଡ଼୍‌ତେ ଅଡ଼୍‌ ପ୍ରତି ବାତେ ସାୟ ଗଟେମ୍
ଆଦତେ, ଆ ବିଷୟତେ ଅଣ୍ଡ କେଡ଼ତଣ୍ଡ ।

୩୩ “କେଞ୍ଜାର୍, ମାମ୍ ଜିରୁଶାଲାମ୍‌ତା ଆଦୁତମ୍ । ଆଗେ
ମନୁଷ୍ୟପୁତ୍ର ବେଡ଼ିୟି ଦର୍ମପୁରହିତ ନୁ ଦର୍ମଗୁରୁଡ଼୍‌ କାଇଦେ
ସମପ୍‌ତ ଆଦତଣ୍ଡ । ଅଡ଼୍‌ଅଂକିଙ୍କ୍ ତଲାନ୍ ଦଣ୍ଡ ଇସ୍ ଅଣ୍ଡଇହୁଦୀଡ଼୍‌,
କାଇଦେ ଝିଡ଼ସିତଡ଼୍‌ ।

୩୪ ଅଡ଼୍‌ଅଂକିଙ୍କ୍ ପରିହାସ୍ ମାଡ଼ିତଡ଼୍‌, ଅନ୍‌ପର୍ ଉସିତଡ଼୍‌, ଅଂକିଙ୍କ୍
କୋରତାତେ ରେହ୍‌ତିତଡ଼୍‌ ନୁ ଆଞ୍ଜିତଡ଼୍‌, କିନ୍ତୁ ମୁଣ୍ଡଦିନା ପେକେ ଅଣ୍ଡ
ଡଲ୍‌ତାଗାଙ୍କ୍ ତେଦିତଣ୍ଡ ।”

ଜାକୁବ୍ ନୁ ଯୋହନ୍‌ତେ ଅନୁରଦ୍

(ମାତିଉ ୨୦:୨୦-୨୮)

୩୫ ଅଣ୍ଡଦିନେ ଜେବତିନ୍ ଇର୍‌ଝୁଡ଼୍‌ମାର୍କ୍ ଯାକୁବ୍ ନୁ ଯୋହନ୍ ଜିସୁଙ୍କ୍
କେଡ଼ତଡ଼୍‌, “ଗୁରୁ, ନିମେ ମା ମାଇଦିଙ୍କ୍ ବାଡ଼ ମାଡ଼ା, ଇଦ୍ ମାମ୍ ଇଚ୍ଛା
ମାଡ଼ତୁମ୍ ।”

☆ ୧୦:୩୧ ମାତିଉ ୨୦:୧୭; ଲୁକ ୧୩:୩୦.

୩୬ ଜିସୁ ପତ୍ରା ମାଡ଼ତଣ୍ଟ, “ବାଡ଼ ଇଚ୍ଛା ମାଡ଼ୁଡ଼ି?”

୩୭ ଅଡ଼ ଉତ୍ତର ଇଡ଼ତଡ଼, “ଗୌରବମୟ ରାଜ ସିଂହାସନତାର ନିମେ ବେସୁଙ୍କ କୁଦିତି, ମା ଲୋପେଙ୍କ ଅରତୁଙ୍କ ନି ତିହେପାକେ ନୁ ମେଣ୍ଟଅରତୁଙ୍କ ଡେବ୍‌ବେ ପାକା କୁଦାଙ୍କ ଇମ୍ ।”

୩୮ ☆ଜିସୁ ଅଡ଼କିଂଙ୍କ କେଡ଼ତଣ୍ଟ, “ମିଡ଼ ବାତା ତାଲୁକୁତିଡ଼, ପୁନଃଡ଼ି । ନାନ୍ ବେନ୍ ଦୁଃକ ବଗତେ ପାନପାତ୍ରତାଗାଙ୍କ ଉଦାଙ୍କ ଆଞ୍ଜିମିହେନ୍, ଆଗାକଞ୍ଚ ମିଡ଼ ଉଦ୍‌ପାର୍‌ଦତିଡ଼ ? ନାନ୍ ବେଲା ତିପାଲୁ ଆଦାଙ୍କ ଆଞ୍ଜିମିହେନ୍, ଆ ଦିକ୍ଷା ମିଡ଼ ବାଡ଼ ଅଦେ ପାର୍‌ଦତିଡ଼ ?”

୩୯ ନାନେ ବେନ୍ ପାନପାତ୍ର ଉଦାଙ୍କ ଆସ ମିହେମ୍ ମିଡ଼ ବାତେ ଅଦ୍ ଉଦାଙ୍କ ପାର୍‌ଡିଡ଼, ଅଡ଼ ପାର୍‌ଡମ୍ ଇଞ୍ଜ କେଡ଼ତଡ଼ ।

୪୦ ଜିସୁ କେଡ଼ତଣ୍ଟ, “ବାସ୍ତବିକ ମିଡ଼ ନା ପାନପାତ୍ରତାଗାଙ୍କ ଉଦ୍‌ଡିଡ଼, ନୁ ନା ଲେକାମ୍ ତିପାଲୁ ଆଦତିଡ଼, କିନ୍ତୁ ନୁ ତିହେପାକେ ବା ଡେବ୍‌ବେ ପାକା ବେନ କୁଦିତିଡ଼, ଇଦ୍ ସ୍ଥିର ମାଡ଼ାଙ୍କ ନା ଅଦିକାର୍ ଇଲେ । ବେନଡ଼ ମାଇଦିଙ୍କ ଇଶ୍‌ର ଆ ଜାଗା ତିଆର୍ ମାଡ଼ିମିହେଣ୍ଟ, ଆଦ୍ ଅଣ୍ଟ ଅଡ଼କିଂଙ୍କ ଇଦ୍‌ତଣ୍ଟ ।”

୪୧ ଇ ସାରେ ଗର୍ କେଞ୍ଜି ଦଶଜାନ୍ ଶିଷ୍ୟଡ଼ ଯାକୁବ୍ ନୁ ଯୋହନ୍‌ଡେ ପର୍ କପାମ୍ ଆଡ଼ତଡ଼ ।

୪୨ ☆ଜିସୁ ଅଡ଼କିଂଙ୍କ ଅଣ୍ଟୟାଗେ କାଙ୍ଗ କେଡ଼ତଣ୍ଟ, “ମିଡ଼ ପୁନୁର୍, ଇ ଜଗଡ଼ତାର ଶାସକିଡ଼ ନାରୁଡ଼ ଲୋପେ ମାପୁଇନା ମାଡ଼ିତଡ଼, ନୁ ନେତାଲଡ଼ ବିଜାଡିଡ଼ ପର ଶାସନ୍ ମାଡ଼ିତଡ଼ ।

୪୩ ☆କିନ୍ତୁ ମିଡ଼ ଇ ନିତିଡେ ତାଲେମ୍ ଆୟୁଡ଼ି । ମି ଲୋପେଙ୍କ ଅରତୁଣ୍ଟ ଯଦି ବେଡ଼ୟଣ୍ଟ ଆଦାଙ୍କ ଚାହେମ୍ ଆଦ୍‌ତଣ୍ଟ, ଅଣ୍ଟ ଝେର୍‌ଅରତୁଣ୍ଟ ସେବକ ଆଇଣ୍ଟ ।

୪୪ ମେଣ୍ଟେ ମି ଲୋପେଙ୍କ ଯଦି ଅରତୁଣ୍ଟ ମୁନେଡ଼ ଜାଗା ଅଦିକାର୍ ମାଡ଼ାଙ୍କ ଇଚ୍ଛା ମାଡ଼କେ, ଅଣ୍ଟ ଅଡ଼ ଦାସଡ଼ ଲେକାମ୍ ଆଇଣ୍ଟ ।

୪୫ ନାରୁଡ଼ ପିଲେଆନ୍ତେ ସେବା ପାହେମ୍ ଆଦାଙ୍କ ଝାଡ଼ଣ୍ଟ, କିନ୍ତୁ ସେବା ମାଡ଼ାଙ୍କ ନୁ ସାରେତଡ଼ ମୁକ୍ତିଡେ ମୁଲ୍ୟ ଲେକାମ୍ ନିଜର୍ ଜିହ୍ନ ଉସର୍ଗ ମାଡ଼ାଙ୍କ ଝାସ୍‌ମିଦ୍‌ଦେଣ୍ଟ ।”

☆ ୧୦:୩୮ ଲୁକ ୧୨:୫୦. ☆ ୧୦:୪୨ ଲୁକ ୨୨:୨୫, ୨୭. ☆ ୧୦:୪୩ ମାତିଉ ୨୩:୧୧; ମାର୍କ ୯:୩୫; ଲୁକ ୨୨:୨୭.

ଜିସୁ ବାଟି ମୟ କାନାଙ୍କ ସାୟ ମାଡ଼ତଣ୍ଡ
(ମାତିଉ ୨୦:୨୯-୩୪; ଲୁକ ୧୮:୩୫-୪୩)

୪୭ ଜିସୁ ନୁ ତାନ୍ ଶିଷ୍ୟତ୍ ଯିରାୟତାନ୍ ଖାଡ଼ତଡ଼ । ଅଡ଼ ଆ
ଚାଉନତିଙ୍କ ଖିଡ଼ସି ଆଦାନ୍ ଖେଲେ ନାଗେ ନାରୁଡ଼ ଅନ୍ ପେକେ
ଆଡ଼ତଡ଼ । ଚିମୟରତେ ମାର ବାଟି ମୟ ପେଦେରତେ ଅରଡ଼ଣ୍ଡ
କାନାଲ୍ ବିକାରି ଆରଦାଗ୍ କୁଦିମାଡ଼ତଣ୍ଡ ।

୪୭ ନାଜରିତିୟ ଜିସୁ ଆ ଆର୍ ଆଦୁତଣ୍ଡ ଇଞ୍ଜ କେଞ୍ଜି ଅଣ୍ଡ ଗାଟି
ଲେଙ୍ଗ୍ ମାଡ଼ି କେଡ଼ତଣ୍ଡ, “ହୋ ଦାଉଦ୍‌ତେ ମାର୍ ଜିସୁ ନାକିଙ୍କ୍ ଦୟା
ମାଡ଼ା ।”

୪୮ ନାରୁଡ଼ ଅଂକିଙ୍କ୍ ଦମକା ମାଡ଼ି କଟ ମାୟାଙ୍କ୍ କେଡ଼ତଡ଼, କିନ୍ତୁ
ଅଣ୍ଡ ମେଣ୍ଡେ ଗାଟିଲେଙ୍ଗ୍ କାର୍ଜିତଣ୍ଡ; “ହୋ ଦାଉଦ୍‌ତେ ମାରିନ୍ ଜିସୁ,
ନାକିଙ୍କ୍ ଦୟା ମାଡ଼ା ।”

୪୯ ଜିସୁ ନିସ୍ ମିକା କେଡ଼ତଣ୍ଡ, “ଅଂକିଙ୍କ୍ କାର୍ଜିଗାଟ୍ ।” ନାରୁଡ଼
କାନାଙ୍କ୍ କାଙ୍ଗ୍ କେଡ଼ତଡ଼, “ଦାୟ୍ ଆୟମା, ତେଦିଖାଡ଼ା, ଅଣ୍ଡ ନିକିଙ୍କ୍
କାର୍ଜି ମିୟେଣ୍ଡ ।”

୫୦ କାନାଲ୍ ତାନ୍ ତାଦର୍ ହେସି ଖେଡ଼କେତେ ତୁଲ୍ଲି ଜିସୁନ୍ ଗାରେ
ଏଞ୍ଡତଣ୍ଡ ।

୫୧ ଜିସୁ ଅଂକିଙ୍କ୍ ପାଚାରା ମାଡ଼ତଣ୍ଡ, “ନି ମାଇଦିଙ୍କ୍ ନାନେ ବାତେ
ମାଡ଼ିତାନ୍ ଇଞ୍ଜ ଇଛା ମାଡ଼ତୁ ?” କାନାଲ୍ କେଡ଼ତଣ୍ଡ, “ଗୁରୁ ! ନାନ୍
ଉଡ଼ାନ୍ ମାଇଦିଙ୍କ୍ ଇଛା ମାଡ଼ତୁନ୍ ।”

୫୨ ଜିସୁ ଅଂକିଙ୍କ୍ କେଡ଼ତଣ୍ଡ, “ଅନ୍, ନି ବିଶ୍ୱାସ୍ ନିକିଙ୍କ୍ ସାୟ ମାଡ଼ତେ
।” ସାଙ୍ଗେ ସାଙ୍ଗେ କାନାଲ୍ ତାନ୍ ଉଡ଼ାନ୍ ଶକ୍ତି ପାହେମ୍ ଆଡ଼ତଣ୍ଡ ନୁ
ଅଣ୍ଡ ଆନ୍ତେ ଜିସୁନ୍ ପେକେ ପେକେ ଡାକ୍ତଣ୍ଡ ।

୧୧

ଯିରୁଶାଲେମ୍‌ତାଗ୍ ଜିସୁ ଆଦାନାଦ୍

(ମାତିଉ ୨୧:୧-୧୧; ଲୁକ ୧୯:୨୮-୪୦; ଯୋହନ୍ ୧୨:୧୨-୧୯)

୧ ଅଡ଼ ଯିରୁଶାଲାମ୍‌ତେ ଗାରେ ଏଞ୍ଡସ୍ ବେଡ଼ପାଗୀ ନୁ ବେତାନି
ନାର୍‌ଦେ ପରୁଡ଼ ପାକେ ମାୟାନ୍ ଜିତମେଟେଡ଼ ଗାରେ ଏଞ୍ଡତଡ଼ ।

ଜିସୁ ତାନ୍ ଇର୍ଝୁଡ଼, ଶିଷ୍ୟତ୍ବିଙ୍କ ନିର୍ଦ୍ଦେଶ ଇସ୍ ମୁନେଙ୍କ ରୟସ୍ କେସ୍ମାଡ଼ତଣ୍ଡ,

୨ “ମୁନ୍ ମାୟାନ୍ ନାର୍ କି ନାର୍ ଆନୁଟ୍, ଆଗେ ଏଞ୍ଜକେ ବେନ ବେସୁଙ୍କ ତାରକଟ୍ ମାୟାନ୍ ଅଣ୍ଡୟ୍ ଗଦ ପିଲ୍ତିଙ୍କ ତହସ୍ ମାୟାନାଦ୍ ଉଡ଼ିତିଡ଼, ତାଙ୍କ୍ ଲେୟସ୍ ନା ଗାରେ ପୟସ୍ ତାଡ଼ାଟ୍ ।

୩ ‘ବାଡେଙ୍କ୍ ଇଦ୍ ମାଡ଼ୁଡ଼ିଡ଼’ ଇଞ୍ଜ ବେନ ଯଦି ପାଚାରା ମାଡ଼୍ କ; ଅଂକିଙ୍କ୍ କେଡିତିଡ଼, ‘ଗୁରୁଙ୍କ୍ ଦରକାର୍ ମିନ୍ଦେ ନୁ ସିଟ୍ପାଟ୍ ଆଦିଙ୍କ୍ ମାଲ୍ପିଦ୍ତଡ଼୍ ।’ ”

୪ ଅଡ଼ କେଡତେ ନାର୍ ଆଞ୍ଜ୍ ଉଡ଼ତଡ଼୍ ଅଣ୍ଡୟ୍ ଗଦ ପିଲ୍ ନାର୍ଦେ ଦୁଝାଡ଼ତାଗ୍ ଅଣ୍ଡୟ୍ ଆର୍ଦାଗ୍ ତହସ୍ ମିନ୍ଦେଡ଼୍ ।

୫ ଆଦିଙ୍କ୍ ଲେତାନ୍‌ଝେଲେ ଗାରେ ନିସ୍ ମାୟାନ୍ ବେସକ୍ ତଡ଼୍, କେଡତଡ଼୍, “ବାଡ଼ ମାଡ଼ୁଡ଼ିଡ଼, ଗଦ ପିଲ୍ତିଙ୍କ୍ ଲେଡୁଡିଡ଼ ବାଡେଙ୍କ୍ ?”

୬ ଜିସୁ କେସ୍ମାୟାନ୍ ଲେକାମ୍ ଶିଷ୍ୟତ୍ବ ଉତ୍ତର୍ ଇଡ଼ତଡ଼୍, ନୁ ନାର୍ଦେନଡ଼୍ ଅଡ଼କିଂଙ୍କ୍ ଝିଡ଼ସିଡ଼ତଡ଼୍ ।

୭ ଶିଷ୍ୟତ୍ବ ଗଦ ପିଲ୍ତିଙ୍କ୍ ତାସ୍ ମେନ୍ଦୁଲ୍ତାଗ୍ ନିଜର୍ ସିଲେ ତାରିଡ଼ତଡ଼୍ ନୁ ଜିସୁ ତାନ୍ ପର କୁଦତଣ୍ଡ ।

୮ ବେସକ୍ତଡ଼୍ ଆର୍ଦେ ପର ଆନ୍ତେ ନିଜର୍ ସିଲେ ତାରିଡ଼ତଡ଼୍ । ବାଗାଡ଼ତ୍ ମାଡେଡ଼ କମା ସାରେ ନାଡ଼କି ଆର୍ଦେ ପର ଝାଟଡ଼ ।

୯ ଜିସୁନ୍ ମୁନେ ନୁ ପେକେ ଆଦାନ୍ ନାରୁଡ଼୍ ବେଡ଼ୟ୍ ଲେଙ୍କ୍‌ଦେ କେଡାଙ୍କ୍ ପସ୍ତଡ଼୍, ପ୍ରସଂଶା

୧୦ “ପ୍ରବୁନ୍ ପେଦେର୍‌ଡେ ବେନ ଝାଡୁତଣ୍ଡ, ଅନାଦ୍ ପ୍ରସଂଶା ଆୟି । ମେଣ୍ଡେ ତିଆର୍ ଆଦାଙ୍କ୍ ଆଞ୍ଜମାୟାନ୍ ମା ବାବାଲ୍ ଦାଉଦ୍ ରାଜାନ୍ ରାଜ୍ୟତିଙ୍କ୍ ଇଶ୍ବର ଆଶ ବାଦ୍ ମାଡ଼ିଣ୍ଡ । ଇଶ୍ବରଡେ ଗୌରବ୍ ଆୟି ।”

୧୧ ଜିସୁ ଯିରୁଶାଲାତାଗ୍ ନେଙ୍କ୍‌ତଣ୍ଡ ନୁ ମନ୍ଦିରତାଗ୍ ଆଞ୍ଜ୍ ସାରେପାକା ଉଡ଼ତଣ୍ଡ । କିନ୍ତୁ ଆସୁଟ୍ ମୁଲ୍‌ପୁଟ୍ ଆସ ମାୟାନ୍ ମାଲ୍‌ଦିଙ୍କ୍ ବାରଜାନ୍ ଶିଷ୍ୟତ୍ବ ତ ଜିସୁ ବେତାନି ନାର୍ଦା ଆଡ଼ତଡ଼୍ ।

ତୟ ମାଡ଼ତିଙ୍କ୍ ଜିସୁ ଅବିଶାପ୍ ଇଡ଼ତଣ୍ଡ
(ମାଡିଉ ୨୧:୧୮-୧୯)

୧୨ ତାନ୍ ମେଣ୍ଡନ୍ ଦିନେ ଅଡ଼୍ ବେତାନିତାଗାଙ୍କ ମାଲ୍‌ଦାନ୍ ଖେଲେ ଜିସୁ କାର୍‌ଝିଙ୍କ ଆଡ଼ତଣ୍ଡ ।

୧୩ ଅଣ୍ଡୟ୍ ତୟ୍ ମାଡ଼ତାଗ୍ ନାଗେ ଆକି ମାନ୍ଦାନାଦ୍ ଅଣ୍ଡ୍ ଜୁୟ୍‌କଙ୍କ ଉଡ଼ତଣ୍ଡ । ଆଗେ କାୟା ମିନ୍ଦେ କି ଇଲ୍‌ଲେ, ଉଡ଼ାନ୍ ମାଲ୍‌ଦିଙ୍କ ଜିସୁ ତାନ୍ ଗାରରେ ଆଡ଼ତଣ୍ଡ । ଆଗେ ଆକିଙ୍କ ଝିଡ଼ସି ବାଡ଼ ମେଣ୍ଡେ ଉଡ଼ଣ୍ଡ, କାରନ୍ ଆସୁର୍ ତୟା ଆଦାନାଦ୍ ସମୟ୍ ଏଞ୍ଜକଟ୍ ମାଡ଼ତେ ।

୧୪ ଜିସୁ ଆ ମାଡ଼ତିଙ୍କ ଉଡ଼ି କେଡ଼ତଣ୍ଡ, “ନିୟାଗାଙ୍କ ବେନ ମେଣ୍ଡେ ବେସୁଙ୍କବା କାୟା ତିନ୍ଦାନଙ୍କ ପାହେମ୍ ଆୟଡ଼୍ ।” ଶିଷ୍ୟଡ଼୍ ଇଦ୍ କେଞ୍ଜିଡ଼ତ୍ ।

ଜିସୁ ମନ୍ଦିରତିଙ୍କ ପରିଷ୍କାର ମାଡ଼ତଣ୍ଡ

(ମାତିଉ ୨୧:୧୨-୧୭; ଲୁକ ୧୯:୪୫-୪୮; ଯୋହନ୍ ୨:୧୩-୨୨)

୧୫ ଅଡ଼୍ ପିରୁଗାଲେମ୍‌ତାଗ୍ ଏଞ୍ଜସ୍ ମନ୍ଦିରତେ ଲୋପେ ଆଡ଼ତଡ଼୍, ନୁ ଆଗେ ଆସାନ୍ ଖାମାନ୍ ମାଡ଼ାନ୍ ନାରୁଡ଼କିଙ୍କ ଜିସୁ ବାୟ୍‌ଦେ ପେସ୍ପିଡ଼ତଣ୍ଡ । ମୁଦ୍ରା ବ୍ୟବସାୟି ମାଡ଼ମାନ୍ଦାନ୍ ନାରୁଡ଼ତେ ବେଞ୍ଚ୍ ନୁ ପାର୍‌ଖା ଖାମନ୍‌ନାରୁଡ଼ାଦ୍ ଟେଙ୍ଗା ସାରେ ମିଇସିଡ଼ତଣ୍ଡ ।

୧୬ ମନ୍ଦିରତେ ଦୁଝାଡ଼୍ ଇସ୍ ଜିନିଷପତ୍ର ଅଦା ତାଡ଼ତା ମାଡ଼ାଙ୍କ ବେନଙ୍କ ବା ଝିଡ଼ସଣ୍ଡ ।

୧୭ ତାନ୍ ପେକେ ଜିସୁ ନାରୁଡ଼କିଙ୍କ ଶିକ୍ଷାଇସ୍ କେଡ଼ତଣ୍ଡ, “ଦର୍ମଶାସ୍ତ୍ରତାଗ୍ ଲେକା ମିନ୍ଦେ, ‘ନା ମନ୍ଦିର୍ ସାରେ ଦେଶ୍ ନାରୁଡ଼୍, ମାଲ୍‌ଦିଙ୍କ ପ୍ରାର୍ତ୍ତନା ଲୋନ୍ ଇଞ୍ଜ ପେଦେର୍ ଆଦତେ,’ କିନ୍ତୁ ମିଡ଼୍ ଆଦିଙ୍କ ତଙ୍ଗାନ୍ ଲୋନ୍ ମାଡ଼ତିଡ଼୍ ।”

୧୮ ବେଡେଇ ଯାଜକ୍ ନୁ ଶାସ୍ତ୍ରୀଡ଼୍ ଇଦ୍ ଗଟନା ବିଷୟତେ କେଞ୍ଜି ଜିସୁଙ୍କ ଆଞ୍ଜୁକାଙ୍କ ଉପାୟ୍ ମେହେକାଙ୍କ ପସ୍ପତଡ଼୍ । ଅଡ଼୍ ଜିସୁଙ୍କ ଖେରସ୍ ମାଡ଼ତଡ଼୍ । କାରନ୍ ନାରୁଡ଼୍‌ଅନ୍ ଶିକ୍ଷାତେ ଆଶର୍ଯ୍ୟ ଆଡ଼ତଡ଼୍ ।

୧୯ ଆ ଦିନ୍ ମୂଲ୍‌ପୁର୍ ଖେଲେ ଜିସୁ ନୁ ତାନ୍ ଶିଷ୍ୟଡ଼୍ ଗାଉନ୍‌ତିଙ୍କ ଝିଡ଼ସି ଆଡ଼ତଡ଼୍ ।

ତୟ୍ ମାଡ଼ତାଗାଙ୍କ ଶିକ୍ଷା

(ମାତିଉ ୨୧:୨୦-୨୨)

୨୦ ତାନ୍ମେଣ୍ଡ ଦିନ୍ ନାରକୁକେ ଅଡ଼ ଆରଦାଲା ଆଦାନ୍‌ଖେଲେ
ଉଡ଼ତଡ଼ ଆ ତୟା ମାଡ଼ ମଦଲ୍ କଞ୍ଚୁ ଝାସିମିୟେ ।

୨୧ ମୁନେଡ଼ ଦିନାଡ଼ ଗର୍ ହେକେ ମାଡ଼ି ପିତର ଜିସୁଙ୍କ କେଡ଼ତଣ୍ଡ,
“ଗୁରୁ ଉଡେ ନି ତଡ଼ ଅବିଶାପ୍ ଆସ୍‌ମାନ୍‌ ତୟା ମାଡ଼ ତଲିମିୟେ
।”

୨୨ ଜିସୁ ଉଉର ଇଡ଼ତଣ୍ଡ, “ଇଶ୍‌ବର ତିଙ୍କ ବିଶ୍ୱାସ୍ ମାଡ଼ାଟ୍ ।

୨୩ ☆ନାନ୍ ନିଜାମ୍ ମିକିଂଙ୍କ କେଡୁତାନ୍, ଯଦି ବେନ ଇ ମେଟେତିଙ୍କ
ତେଦିଆଞ୍ଚୁ ସନ୍ତୁରତାଗ୍ ରାଲାନ୍ ମାଇଦିଙ୍କ କେଡିତଣ୍ଡ ନୁ ମନ୍‌ଦାଗ୍
ସନ୍ଦେହ ନେହ୍‌ଝିକଟ୍, ଅଣ୍ଡ ବାତେ କେଡ଼ତଣ୍ଡ, ଆଦ୍ ଆଦିତେ ଇଞ୍ଚି
ବିଶ୍ୱାସ୍ ମାଡ଼ିତଣ୍ଡ, ଆଲାଈକ୍‌ ଆଦ୍ ନିଜାମ୍ ଗଟେମ୍ ଆଦିତେ ।

୨୪ ଅଦିନ୍ ମାଇଦିଙ୍କ ନାନ୍ କେଡୁତାନ୍ ପ୍ରାର୍ତ୍ତନା ମାଡ଼ାନ୍ ଖେଲେ
ବାଡ଼ ତାଲୁକୁଡିଡ଼, ଆଝ୍ ଦରକ୍‌ତା ଇଞ୍ଚି ବିଶ୍ୱାସ୍ ମାଡ଼ାଟ୍, ଆଲାଈକ୍‌
ଆଝ୍ ମିଡ଼ ନିଜାମ୍ ପାହେମ୍ ଆଦିଡିଡ଼ ।

୨୫ ☆ପ୍ରାର୍ତ୍ତନା ମାଡ଼ାନ୍ ମାଇଦିଙ୍କ ନିଡ଼ତେ ଖେଲେ, ଯଦି ବେନନ୍
ବିରୁଦ୍‌ତେ ମିୟାଦ୍ ବାତେ କେତାନାଦ୍ ମାନ୍ତ୍ରତେ, ଆଦିଙ୍କ୍‌ ଷେମା
ମାଡ଼ିମୁଟ୍ । ଆଲାଈକ୍‌ ମି ସ୍ୱର୍ଗତେ ବାବାଲ୍ ଇଶ୍‌ବର ମିୟାଦ୍ ସାରେ
ଦଷ୍ଟ ଷେମା ମାଡ଼ିତଣ୍ଡ ।”

୨୬ କିନ୍ତୁ ମିଡ଼ ଯଦି ଖେରତଡ଼କିଙ୍କ୍‌ ଷେମା ମାଡ଼ିଡ଼, ମି ସ୍ୱର୍ଗତେ
ବାବାଲ୍ ଆନ୍‌ତେ ମି ପାପ ଆନ୍ତେ ଷେମା ମାଡ଼ଣ୍ ।

ଜିସୁନ୍ ଶାସନ୍

(ମାଡ଼ିଉ ୨୧:୨୩-୨୭; ଲୁକ ୨୦:୧-୮)

୨୭ ଅଡ଼ ମେଣ୍ଡନ୍ ଦାମ୍ ଯିରୁଶାଲେମ୍‌ତାଗ୍ ଝାଡ଼ତଡ଼ । ଜିସୁ
ମନ୍ଦିରତେ ଲୋପେ ଉଡ଼ମାନ୍‌ ସମୟତେ ମୁକ୍ୟ ପୁରହିତ, ଦର୍ମଗୁରୁ
ନୁ ଇହୁଦି ଦର୍ମନେତାଲଡ଼ ଅନ୍ ଗାରେ ଝାସ୍ ପାଚାରାମାଡ଼ତଡ଼,

୨୮ “ଇ ସାରେ ପାଡ଼ିୟି ମାଡ଼ାନ୍ ମାଇଦିଙ୍କ୍‌ ନିୟାଦ୍ ବାତେ ଅଦିକାର୍
ମିୟେ ? ନିକିଙ୍କ୍‌ ଇ ଅଦିକାର୍ ବେନ ଇଡ଼ତଣ୍ଡ ?”

୨୯ ଜିସୁ ଉତ୍ତର ଇଡ଼ତଣ୍ଡ, “ମିକିଂଙ୍କ ଅଣ୍ଡୟ ପ୍ରଶ୍ନ ପାଚାରାମାଡ଼ିତାନ୍ । ଯଦି ତାନ୍ ଉତ୍ତର ଇଡ଼ପାରୁଡ଼ିଡ଼, ଇ ମାଡ଼ାନ୍ ମାଈଦିଙ୍କ ନାୟାଦ୍ ବାଡ଼ ଅଦିକାର ମିନ୍ଦେ, ଆଦ୍ ମିକିଂଙ୍କ କେଡିତାନ୍ ।

୩୦ ବାପ୍ତିସ୍ମ ଇଦାନ୍ ଯୋହନ୍ ବେନନାଗାଙ୍କ ଅଦିକାର ପାହେମ୍ ଆସ୍ମାଡ଼ତଣ୍ଡ, ଇଶ୍ବରତାଗାଙ୍କ ନା ନାରୁଡ଼୍ ଡ଼ାଗାଙ୍କ ?”

୩୧ ଅଡ଼୍ ନିଜର୍ ନିଜର୍ ଲୋପେ ରାମ୍ବ୍ ମାଡ଼ାଙ୍କ ପସ୍ତତଡ଼୍, “ଇ ଗର୍ତ୍ତେ ବାଡ଼ ଉତ୍ତର ଇଡ଼ତାଡ଼୍ ?” ଯଦି କେଡିତାଡ଼୍, “ଇଶ୍ବରତାଗାଙ୍କ,” ଯୋହନ୍ତିଙ୍କ ମାଡ଼୍ ବାଡେଙ୍କ ବିଶ୍ବାସ୍ ମାଡ଼୍ ଖାଡ଼୍ ଇଞ୍ଜ ଅଣ୍ଡ୍ ପାଚାରାମାଡ଼ିତଣ୍ଡ ।

୩୨ ଯଦି କେଡିତାଡ଼୍, “ନାରୁଡ଼୍ ଡ଼ାଗାଙ୍କ” ଅଡ଼୍ ନାରୁଡ଼୍ କ୍ ଖେରସ୍ ମାଡ଼ତଡ଼୍, କାରନ୍ ସାରେତଡ଼୍ ପୁଞ୍ଜ୍ ମାଡ଼ତେ ଯେ, ଯୋହନ୍ ଇଶ୍ବରତେ ଅରୁଡ଼୍ ବାବବାଦୀ ମାଡ଼ତଣ୍ଡ ।

୩୩ ଅଡ଼୍ ଜିସୁଙ୍କ ଉତ୍ତର ଇଡ଼ତଡ଼୍, “ମାମ୍ ପୁନମ୍ ।”

ଜିସୁ ଅଡ଼ିଂଙ୍କ କେଡ଼ତଣ୍ଡ, “ବେନ୍ ଅଦିକାରତେ ହିଞ୍ଜୁସାରେ ମାଡ଼ତୁନ୍, ନାନ୍ ମିକା ମିକିଙ୍କ କେଲନ୍ ।”

୧୨

ଅଜ୍ଞୁର୍ ଖାୟାତାଗ୍ ବାଗ୍ ଚାଷିଡ଼୍ ଖେଷଡ଼୍
(ମାଡିଡ ୨୧:୩୩-୪୭; ଲୁକ ୨୦:୯-୧୯)

୧ ତାନ୍ପେକେ ଜିସୁ ଖେଷଡ଼୍ ଇସ୍ କେଡ଼ତଣ୍ଡ, “ଅଣ୍ଡୟୟାଗ୍ ଅରୁଡ଼୍ ନାରୁଡ଼୍ ଖେରଡ଼୍ ଅଜ୍ଞୁର୍ ଖାୟେ ଆରାମ୍ ମାଡ଼ି ତାନ୍ ଡିଡ଼ିୟାକା ଖେଲୁମ୍ କୁରୁଡ଼ତଣ୍ଡ । ଅଜ୍ଞୁର୍କିନ୍ ମାଈଦିଙ୍କ ଅଣ୍ଡୟ ଗୁୟନ୍ଦେ ଡେଞ୍ଡତଡ଼୍ ନୁ କେପାନଡ଼୍ ମାଈଦିଙ୍କ ଡଡ଼ ଡହୁଡ଼ତଡ଼୍ । ତାନ୍ପେକେ ଅଣ୍ଡ୍ କ୍ଷେତଡିଙ୍କ ବାଗ୍ ଚାଷିଡ଼୍ କାଈଦେ ଖିଡ଼ସିସ୍ ଦୁରାମ୍ ପଡ଼ୟତାଗ୍ ଆଡ଼ତଣ୍ଡ ।”

୨ ଆସୁର୍ ଅଜ୍ଞୁର୍ ଆଦାୟ୍ ମାଡ଼ାନ୍ ସମୟ୍ ଖାଡ଼ତେ, ନିଜର୍ ବାଗ୍ ଆଦାୟ୍ ମାଡ଼ାନ୍ ମାଈଦିଙ୍କ ଖେରଣ୍ଡ ଦାସ୍ତିଙ୍କ ଅଡ଼୍ ଗାରେ ରହୁଡ଼ତଣ୍ଡ ।

୩ ଚାଷିଡ଼୍ ଆ ଦାସ୍ତିଙ୍କ ପୟସ୍ ରେହସ୍ ଆସାମ୍ କାଈଦେ ରୟସିଡ଼ତଡ଼୍ ।

୪ ଖାୟେତ୍ ମାଲିକ୍ ମେଣ୍ଡୁଅରତୁନ୍ ଦାସତିଙ୍କ ରହତଣ୍ଡ । ଚାଷିତ୍, ଅଙ୍କ ଆନ୍ତେ କାରାପ୍ ବ୍ୟବହାର ମାଡ଼ତଡ଼, ନୁ ରେହସ୍ ଅନ୍ ତାଲ୍ତିଙ୍କ ପାଃସିଡ଼ତଡ଼ ।

୫ ତାନ୍ପେକେ ମାଲିକ୍ ବେନ୍ ଦାସଙ୍କ ରହତଣ୍ଡ, ଅଙ୍କିଙ୍କ ଚାଷିତ୍, ଡଲ୍ନା ରେହସିଡ଼ତଡ଼ । ମାଲିକ୍ତେ ପାକେତ୍ ଖେରବାଗାତଡ଼, ଖାଡ଼ତଡ଼, ଚାଷିତ୍, ଅଡ଼କ୍ ଆନ୍ତେ ଆଲେକେ ମାଡ଼ତଡ଼ । ବେସ୍କତଡ଼କିଙ୍କ ରେହତଡ଼, ନୁ ଖେରତଡ଼କିଙ୍କ ଆଞ୍ଜକତଡ଼ ।

୬ ଇଞ୍ଜେ ମାଲିକ୍ତେ ଗାରେ ମାଡ଼ର୍ ଖେରଣ୍ଡେ ମାଡ଼ର୍ ବାକି ମିନ୍ଦେଣ୍ଡ ତାନ୍ ପ୍ରିୟ ମାର୍ । ମାଲିକ୍ ଆଲ୍ସତଣ୍ଡ, “ଅଡ଼, ନା ମାରିଙ୍କ ନିଜାମ୍ ମାନେମ୍ ଆଦତଡ଼ ।” ଇଲା ଆଲ୍ସି ମାଡ଼େଙ୍କ୍ତେ ଚାଷିତ୍, ଗାରେ ନିଜର୍ ମାରିଙ୍କ ରହତଣ୍ଡ ।

୭ କିନ୍ତୁ ଆ ଚାଷିତ୍, ନିଜେନିଜ୍ତିଙ୍କ କେଡ଼ତଡ଼, “ଇଣ୍ଡ ମାଲିକ୍ତେ ମାର୍ । ଖାଡ଼ାଟ୍ ଅଙ୍କିଙ୍କ ରେହସିନ୍ନା ଆଲାଇକ୍ ମାଲିକ୍ତେ ସମ୍ପତି ମାନ୍ କାଇଦେ ଖାଡ଼ତେ ।”

୮ ଇଲା କେସ୍ ଅଡ଼, ମାଲିକ୍ତେ ମାରିଙ୍କ ପୟସ୍ ଆଞ୍ଜକତଡ଼, ନୁ ମଡ଼ତିଙ୍କ ଖାୟେତ୍ ବାୟଦେ ଏସିଡ଼ତଡ଼ ।

୯ ଜିସୁ ପାଚାରାମାଡ଼ତଣ୍ଡ, “କେସୁଡ଼ାଟ୍, ତାନ୍ ପେକେ ଆ ଅଙ୍ଗୁର୍ ଖାୟେତ୍ ମାଲିକ୍ ବାଡ଼ ମାଡ଼ିମାନ୍ତୁତଣ୍ଡ ? ଅଣ୍ଡ ଖାସ୍ ନିଜାମ୍ ଆ ଚାଷିତ୍ ଡଲ୍ନା ରେହସିସ୍ ଖାୟେତିଙ୍କ ଖେର୍ ଚାଷିତ୍ ଇସ୍ମାନ୍ତୁତଣ୍ଡ ।”

୧୦ ଶାସ୍ତ୍ରତାଗ୍ ଇ ଗଟ୍ ମିଡ଼, ନିଜାମ୍ କାଡ଼ତିଡ଼ ।

“ଲୋନ୍ ତିଆର୍ ମାଡ଼ାନଡ଼, ବେନ୍ କାଲ୍ଦିଙ୍କ ଦରକାର୍ ଆୟ ଇଞ୍ଜ ଆଲ୍ସି ଝିଡ଼ସିସ୍ ମାଡ଼ତଡ଼, ଆଦ୍ ଲୋଡ଼ତେ ମୁକ୍ୟ ମୁଲ୍ତେ କାଲ୍ ଆଡ଼ତେ ।

୧୧ ନିଜେ ପ୍ରବୁ ଇଦ୍ କେଡ଼ତଣ୍ଡ,
ବେସର୍ ଚମକାର୍ ଇ ପାଡ଼ୟି !”

୧୨ ଇହୁଦିଡ଼, ନେତାଙ୍କ ଗିରପ୍ ମାଡ଼ାନ୍ ମାଇଦିଙ୍କ ତେଷ୍ଟା ମାଡ଼ତଡ଼, କାରନ୍ ଅଡ଼, ପୁଡ଼ତଡ଼, ଅଡ଼କିଙ୍କ ଉଡ଼ି ମିକା ଜିସୁ ଇ ଖେଷଡ଼, କେଡୁତଣ୍ଡ । କିନ୍ତୁ ନୁରୁଡ଼, ଖେରଜିଙ୍କ ଅଡ଼, ଜିସୁଙ୍କ ଝିଡ଼ସି ଆଡ଼ତଡ଼ ।

ଶିଷ୍ଟ ଛଦାନ ପ୍ରଶ୍ନ

(ମାତିତ ୨୨:୧୫-୨୨; ଲୁକ ୨୦:୨୦-୨୬)

୧୩ ବେସକତୁଡ଼ ପାରୁସିଡ଼ ନୁ ହେରୋଦ୍‌ତେ ମାନ୍ଦେତେ ବେସକତୁଡ଼ ଜିସୁଙ୍କ ପ୍ରଶ୍ନ ପାଚାରାମାଡ଼ି ଉଡ଼ିଦାଗ୍ ରାପାନ୍ ମାଇଦିଙ୍କୁ ଝାସମାଡ଼ିତଡ଼ ।

୧୪ ଅଡ଼ ଜିସୁଙ୍କ ପାଚାରାମାଡ଼ିତଡ଼, “ଗୁରୁ, ମାମ୍ ପୁଡ଼ତମ୍ ନାରୁଡ଼କିଙ୍କୁ ଝେରଝକଟ ନିମେ ସଡ଼ ଗଟି କେତିତିନ୍ । ବେନନ୍ ସିଗ୍ ମାରଜାଦ୍ ସେଙ୍ଗ ଉଡ଼କଟ ନିମେ ଇଶ୍ବରତେ ଇଚ୍ଛା ବିଷୟତେ ଶିକ୍ଷା ଇଦ୍‌ତିନ୍ । କେଲ୍‌ମ୍, ରୋମ୍ ସମ୍ପାର୍ତିଙ୍କୁ ଶିଷ୍ଟ ଛଦାଙ୍କୁ ମା ଦର୍ମ ନିୟମତେ ବିରୁଦ୍ଧ କି ଆୟ ? ମାମ୍ ଶିଷ୍ଟ ଛଦତମ୍ କି ଇଲେ ?”

୧୫ ଜିସୁ ଅଡ଼ ଚାଲାକ୍‌ତିଙ୍କୁ ବୁଜେମ୍ ଆସ୍ କେଡ଼ତଣ୍ଡ, “ନାକିଙ୍କୁ ବାତେଙ୍କୁ ଉଡ଼ିଦାଗ୍ ରାପାଙ୍କୁ ଚେଷ୍ଟା ମାଡ଼ିତୁଡ଼ ? ଝେରଟ୍ ରୁପାମୁଦ୍ରା ତାଡ଼ାଟ୍, ନାନ୍ ଉଡ଼ିତାନ୍ ।”

୧୬ ଅଡ଼ ଡାବ୍ ତାଡ଼ତାଙ୍କୁ ଜିସୁ ପାଚାରାମାଡ଼ିତଣ୍ଡ, “ଇଦିନ୍ ପର ବେନନ୍ ମୁଉଁ ନୁ ପେଦେର୍ ମିନ୍ଦେ ?”

“ସମ୍ପାର୍ତିଦା” ଇଞ୍ଜ ଅଡ଼ ଉତ୍ତର ଇଡ଼ିତଡ଼ ।

୧୭ ଜିସୁ କେଡ଼ତଣ୍ଡ, “ଆଲାଈକ୍, ବେନ୍ ସମ୍ପାର୍ତିଦା, ଆଦ୍ ସମ୍ପାର୍ତିଙ୍କୁ ଇମୁଟ୍; ବେନ୍ ଇଶ୍ବରତାଦ୍, ଆଦ୍ ଇଶ୍ବରତିଙ୍କୁ ଇମୁଟ୍ ।” ଜିସୁନ୍ ଇ ଗଟ୍ ଅଡ଼ କେଞ୍ଜି ବାକ୍‌ଝା ଆଡ଼ିତଡ଼ ।

ପୁନରୁଡ଼ତାନତେ ପ୍ରଶ୍ନ

(ମାତିତ ୨୨:୨୩-୩୩; ଲୁକ ୨୦:୨୭-୪୦)

୧୮ ☆ତଲ୍‌ତେ ନାରୁଡ଼ତେ ପୁନରୁଡ଼ତାନ୍ ବିଶ୍ବାସ୍ ମାଡ଼ିତେ ସାଦୁକିଡ଼ ମାନ୍ଦେ ବେସକତୁଡ଼ ଝାସ୍ ଜିସୁଙ୍କ ପାଚାରା ମାଡ଼ିତଡ଼,

୧୯ “ଆ ଗୁରୁ, ମୋଶାଲ୍ ମା ମାଇଦିଙ୍କୁ ଇ ବ୍ୟବସ୍ଥା ଲେକ୍‌ତଣ୍ଡ, ଝେରଣ୍ଡ ପିଲାଜିଲା ଇଲକଟ ଆସ୍ ତଲ୍‌କେ ଆ ନାରୁନ୍‌ତେ ରାଣ୍ଡିମୁତେଙ୍କୁ ତାନ୍ ତାମୁଣ୍ଡ ପେଣ୍ଡିଲୁ ଆଦ୍ ଝେୟଡ଼ିଡ଼ ନୁ ଅଡ଼ାଝ ବେନ୍ ପିଲା ଜନମ୍ ଆଦତା, ଆଝ ତଲ୍‌ତେ ନାରୁନ୍‌ତେ ପିଲା ଇଞ୍ଜ ପେଦେର୍ ଆଦତେ ।

୨୦ ଆଲେକେ ସାଡ଼ ଜାନ ତାମୁସକ୍ ମାଡ଼ତଡ଼ । ବେଡ଼ୟ ଦାଦାଲ୍ ପେଣ୍ଡୁଲୁ ଆସ୍ ପିଲାଜିଲା ଆୟକଟ ଡଲ୍‌ତଣ୍ଡ ।

୨୧ ଡଲିମାୟାନନ୍ ରାଣ୍ଡି ନାଟାଡ଼ତିଙ୍କ ଦ୍ଵିତିୟ ତାମୁଣ୍ଡ ପେଣ୍ଡୁଲୁ ଆସ୍ ଅଣ୍ଡ ଆନ୍ତେ ପିଲାଜିଲା ଆୟକଟ ଡଲ୍‌ତଣ୍ଡ । ତୃତିୟ ତାମୁଣ୍ଡବା ଆଲେ ଆଡ଼ତଣ୍ଡ,

୨୨ ମେଣ୍ଡେ ଝେର୍ବାଗାଡ଼ ସାଡ଼ ଜାନ ତାମୁସକ୍ ଆ ଝେରଡ଼ ନାଟାଡ଼ ପେଣ୍ଡୁଲୁ ଆସ୍ ସାରେତଡ଼ ପିଲାଜିଲା ଆୟକଟ ଡଲ୍‌ତଡ଼ । ମାଡ଼େଙ୍ଗ୍ ନାଟାଡ଼ ଆନ୍ତେ ଡଲ୍‌ତେ ।

୨୩ ଇଞ୍ଜେ କେଲ୍‌ମୁଟ୍, ପୁନରୁଡ଼ତାନ୍ ଦିନତେ, ବେସୁଙ୍କ ଡଲ୍‌ତେନଡ଼ ପୁନଜ ବିଡ଼ ଆସ୍ ତେଦିତଡ଼, ଆ ନାଟାଡ଼ ବେନନ୍ ମୁତେ ଆଦତେ ? ସାଡ଼ଜାନ୍ ଯାକ ତ ତାଙ୍କିକ୍ ପେଣ୍ଡୁଲୁ ଆସ୍ ମାଡ଼ତଡ଼ ।”

୨୪ ଜିସୁ ଉତ୍ତର ଇଡ଼ତଣ୍ଡ, “ମିକିଙ୍କ ବେସର୍ ବୁସା ଚିନ୍ତେ ମିନ୍ଦେ । ଦର୍ମଶାସ୍ତ୍ର ନୁ ଇଶ୍ଵରତେ ଶକ୍ତି ବିଷୟତେ ମିଡ଼ ବାତେ ପୁନଞ୍ଜିଡ଼ ।

୨୫ କାରନ୍ ଡଲ୍‌ତେନାରୁଡ଼ ପୁନରୁଡ଼ତିଡ଼ ଆଡ଼ତଡ଼, ଅଡ଼ ସ୍ଵର୍ଗତେ ଦୃତକିନ୍ ଲେକାମ୍ ଆଦତଡ଼ ଅଡ଼ ପେଣ୍ଡୁଲୁ ଆୟୟଡ଼ କି ପେଣ୍ଡୁଲୁ ଇଞ୍ଜିଡ଼ ।”

୨୬ ଡଲ୍‌ତେନାରୁଡ଼ ପୁନରୁଡ଼ତାନ୍ ଗର୍ ପାଚାରମାଡ଼ଡ଼ିଡ଼ ? ମୋଶାନ୍ ବଇତାଗ୍ ନିଡ଼ତାନ୍ ପଦଲେ ବିଷୟତେ କାରଞ୍ଜିଡ଼ କି ? ଆଗେ ଲେକା ମିନ୍ଦେ, ଇଶ୍ଵର ମୋଶାଙ୍କ କେଡ଼ତଣ୍ଡ, “ନାନ୍ ଅବ୍ରାହାମ୍‌ତେ ଇଶ୍ଵର, ଇସାହାକତେ ଇଶ୍ଵର ନୁ ଯାକୁବ୍‌ତେ ଇଶ୍ଵର !

୨୭ ଅଣ୍ଡ ଡଲ୍‌ତେନାରୁଡ଼ତେ ଇଶ୍ଵର ଆୟଣ୍ଡ, ଅଣ୍ଡ ଜିଞ୍ଜୁମାୟାନଡ଼ ଇଶ୍ଵର । ମିଡ଼ ପୁରାପୁରି ବୁଲ୍ ।”

ବେଡ଼ୟାଦ୍ ଆଞ୍ଜା

(ମାଡ଼ିଡ଼ ୨୨:୩୪-୪୦; ଲୁକ ୧୦:୨୫-୨୮)

୨୮ ଅରୁଡ଼ଣ୍ଡ ଦର୍ମଗୁରୁ ଆଗେ ମାଞ୍ଜି ଇ ସାରେ ରାମ୍‌କ୍ ଲେକାମ୍ ଆଦାନାଦ୍ କେଞ୍ଜମାଡ଼ତଣ୍ଡ । ସାଦୁକିଡ଼କ୍ ଜିସୁ ଟିକ୍ ଜବାବ୍ ଇଡ଼ତଣ୍ଡ ଇଞ୍ଜ ପୁଞ୍ଜି ଅଣ୍ଡ ଜିସୁଙ୍କ ମେଣ୍ଡ ଅଣ୍ଡୟ ପ୍ରଶ୍ନ ପାଚାରମାଡ଼ତଣ୍ଡ, “ମା ଦର୍ମଶାସ୍ତ୍ରତାଗ୍ ବେନ୍ ଆଞ୍ଜା ସାରେକେ ବେଡ଼ୟାଦ୍ ?”

୨୯ ଜିସୁ ଉତ୍ତର କେତେକ, “ଇସ୍ରାଏଲିୟ ନାରୁତ୍ କେଜାର୍ ସାରେକେ ବେଡ଼ୟାଦ୍ ଆଜ୍ଜା ଆଦୁତେ, ‘ମାନ୍ ପ୍ରବୁ ଇଶ୍ବର ଝେରଣ୍ଡେ ପ୍ରବୁ ।

୩୦ ପ୍ରବୁ ଇଶ୍ବରତିଙ୍କ ପୁରା ହୃଦୟ, ପୁରା ଆତ୍ମା, ପୁରା ମନ, ଶକ୍ତି ସାମର୍ଥ୍ୟ ଇସ୍ ପ୍ରେମ ମାଡ଼ାର୍ ବା ବକ୍ତି ମାଡ଼ାର୍ ।’

୩୧ ଦ୍ଵିତିୟ ବେଡ଼ୟାଦ୍ ଆଜ୍ଜା ଆଦୁତେ, ‘ମି ଗାରେତଡ଼କ୍ ଆମ୍ବାତେଲେକାମ୍ ପ୍ରେମ ମାଡ଼ାର୍ ।’ ଇ ରେଣ୍ଡିନ୍ ଝିଡ଼ସି ବେଡ଼ୟା ଆଜ୍ଜା ମେଣ୍ଡ ଇଲେ ।”

୩୨ ଦର୍ମଗୁରୁ କେତେକ, “ଗୁରୁ, ନିମେ ସତ୍ କେତଡିନ୍ ! ବାସ୍ତବିକ୍ ନିମ୍ କେତାନ୍ ଲେକାମ୍, ମାତର୍ ମାନ୍ ପ୍ରବୁ ଆଦୁତେ ଝେରଣ୍ଡେ ଇଶ୍ବର ଅଙ୍କ ଝିଡ଼ସି ଝେର୍ ଇଶ୍ବର ଇଲେ ।

୩୩ ନାରୁତ୍ ତାନ୍ ପୁରାହୃଦୟ, ପୁରାମନ, ପୁରାଶକ୍ତି ଇସ୍ ଅଂକିଙ୍କ ପ୍ରେମ ନୁ ବକ୍ତି ମାଡ଼ାନ୍ ସାଙ୍ଗେ ସାଙ୍ଗେ ତାନ୍ ପଡ଼ଶିଡ଼କ୍ ଆମ୍ବାତେ ଲେକାମ୍ ପ୍ରେମ ମାଡ଼ାର୍ । ଇଶ୍ବରତେ ଲେକେଡ୍ ପଶୁ ନୁ ଝେର୍ ବଲି ଉସର୍ଗ ମାଡ଼ାନ୍ ଝିଡ଼ସି, ଇ ରେଣ୍ଡ ଆଜ୍ଜା ପାଲନ୍ ମାଡ଼ାଙ୍କ ପେକେ ଦରକାର୍ ।”

୩୪ ☆ତାମ୍ ଜାନବାନ୍ ଉତ୍ତର୍ କେଜି ଜିସୁ କେତେକ, “ମିଡ଼, ଇଶ୍ବରତେ ରାଜ୍ୟତାଗାଙ୍କ ନାଗେଦୁରାମ୍ ଇଲେଡି ।”

ତାନ୍ ପେକେ ଜିସୁଙ୍କ ମେଣ୍ଡେ ପ୍ରଶ୍ନ ପାଚାରାମାଡ଼ାଙ୍କ ବେନବା ସାହାସ୍ ମାଡ଼ଡ଼ ।

ମସିହନ୍ ବିଷୟତେ ପ୍ରଶ୍ନ

(ମାତିଡ ୨୨:୪୧-୪୬; ଲୁକ ୨୦:୪୧-୪୪)

୩୫ ଦାଉଦ୍ତେ ମନ୍ଦିରତାଗ୍ ଅଣ୍ଡିନେ ଶିକ୍ଷା ଇଦାନ୍ଝେଲେ କ୍ରିଷ୍ଟ ଝେରଡ୍ ପ୍ରଶ୍ନ ପାଚାରାମାଡ଼ଡ଼, ଦର୍ମଗୁରୁଡ଼୍ ବାତେଙ୍କ କେତୁଡଡ଼, ମସିହ ଦାଉଦ୍ତେ ମାର୍ ଇଞ୍ଜ ?

୩୬ ପବିତ୍ର ଆମ୍ବାତାଗାଙ୍କ ପ୍ରେରଣା ପାହେମ୍ଆସ୍ ଦାଉଦ୍ କେତେକ, “ପ୍ରବୁ ନା ପ୍ରବୁଙ୍କ କେତେକ,”

ମାମ୍ ମି ସାରେ ଶତ୍ରୁତ୍ତିଙ୍କ

ମି ତେକେତ୍ ମଦଲ୍ ମାଡ଼ନା ଯାକ, ନିମେ ମା ତିମେ ପାକେ
କୁଦିମାନ ।

୩୭ ଇଗାଙ୍କ ପୁନ୍ଦାଙ୍କ ଆଦୁଡ଼ତେ ଯେ, ମସିହଙ୍କ ଦାଉଦ୍ ପ୍ରବୁ ଇଞ୍ଜି ଲେକା
ଆଡ଼ତେ । ଆଲାଈକ୍ସେ ମସିହ ଦାଉଦ୍ତେ ମାର୍ ଆଦତଣ୍ଟ ବେଲା ?

ଦର୍ମଗୁରୁଡ଼ ବିଷୟତେ ଜିସୁନ୍ ସତର୍କଗର୍
(ମାତିଉ ୨୩:୧-୩୬; ଲୁକ ୨୦:୪୫-୪୭)

ଅନ୍ଦାମ୍ ଖେରଡ଼ ବେଡ଼ିୟା ମାୟେ ନାରୁଡ଼ ଜିସୁନ୍ ଗର୍ ଇଞ୍ଜାତେ
କେଞ୍ଜିମାଡ଼ତଡ଼ ।

୩୮ ଅଡ଼କିଂଙ୍କ ଶିକ୍ଷା ଇଦାନ୍‌ଖେଲେ ଜିସୁ କେଡ଼ତଣ୍ଟ, “ଲାଟି ତକା
କେରସ୍ ଆର୍ ବଜାରତା ନାରୁଡ଼ଡ଼ାଗାଙ୍କ ସମ୍ମାନ ପାହେମ୍ ଆଦ୍
ଦର୍ମଗୁରୁଡ଼ ସେଙ୍ଗେ ସତର୍କ ମାନୁର୍ ।

୩୯ ଉପାସନା ଲୋନ୍ ନୁ ବଜିକିନାଗ୍ ଜାଗା ଅଦିକାର୍ ମାଡ଼ମାୟାନ୍
!

୪୦ ଅଡ଼ ରାଣ୍ଡିମୁତେକିନ୍ ଇଲ୍‌ଖେ ସୁୟଗ୍ ଅସ୍ ଆଞ୍ଜିନ୍ ସମ୍ପତି
ଅଦତଡ଼ । କିନ୍ତୁ ଚାଲାକ୍ ମାଡ଼ି ଲେକେଡ଼ ପ୍ରାର୍ତନା ମାଡ଼ିତଡ଼ । ଆଦିନ୍
ମାଇଦିଙ୍କ ଅଡ଼ ନାଗେ କଷ୍ଟ ଦଣ୍ଡପାହେମ୍ ଆଦତଡ଼ ।”

ରାଣ୍ଡିମୁତେନ୍ ଦାନ
(ଲୁକ ୨୧:୧-୪)

୪୧ ଅନ୍ଦାମ୍ ଜିସୁ ମନ୍ଦିରତାଗ୍ ଦାନ ଇଦାନ୍ ଜାଗେଡ଼ ଗାରେ
କୁଦିମାଡ଼ତଣ୍ଟ । ନାରୁଡ଼ ଝାସ୍ ଆଗେ ନେହସ୍ ମାୟାନ୍ ବାକ୍ସତାଗ୍
ଦାନ ଝାଗାନାଦ୍ ଅଣ୍ଟ ଉଡ଼ ମାଡ଼ତଣ୍ଟ । ଦନିଡ଼ ଆଗେ ନାଗେ ଡାବକ୍
ଝାଟମାଡ଼ତଡ଼ ।

୪୨ ଆସୁର୍ ଅଣ୍ଟୟ ଗରିବ୍ ରାଣ୍ଡିଲ୍ ଆଗେ ଝାସ୍ ମାଡ଼ର୍ ରେଣ୍ଟ୍
ସୁଦୁରାଞ୍ଜି ତମ୍ବା ମୁଦ୍ରା* ଆ ବାକ୍ସତାଗ୍ ଝାଟତେ ।

୪୩ ଜିସୁ ଶିଷ୍ୟତ୍ତିକିଙ୍କ ସଡ଼ କେଡ଼ତଣ୍ଟ, “ଇ ଗରିବ୍ ରାଣ୍ଡିନ୍ ଦାନ
ଖେରବାଗାତଡ଼ ଇସ୍‌ମାୟାନ୍ ଦନ୍ତାଗାଙ୍କ ନାଗେ ।

* ୧୨:୪୨ ସୁଦୁରାଞ୍ଜି ତମ୍ବା ମୁଦ୍ରା ଆଞ୍ଜୁ ରେଣ୍ଟ୍ ଅଣ୍ଟୟ ବେଡ଼ିୟାଦ୍ ତମ୍ବା ମୁଦ୍ରା ତଡ଼ ସାମାନ୍ ।
ସୁଦୁରାଦିଙ୍କ ଲାପ୍‌ଟସ୍ ନୁ ବେଡ଼ିୟାଦିଙ୍କ କହ୍ନାଟେସ୍ କେତିତଡ଼ ।

୪୪ ସାଞ୍ଜକାରିତ୍ୱ ତାମ୍ ମିଗ୍ଲତେ ଦନ୍ତାଗାଙ୍କ ଇସ୍ମିନ୍ଦେଡ଼, କିନ୍ତୁ ଲୁ ନାଗାଡ଼ ତାନ୍ ଦରିଦ୍ର୍ୟ ତଡ଼୍ ତାନ୍ ଗାରେ ସମ୍ପତି ବାଡ଼ ମାଡ଼ତେ, ସାରେ ଇଡ଼ତେ ।”

୧୩

ମନ୍ଦିର୍ ଦ୍ୱଂସ ବିଷୟରେ ଗର୍

(ମାତିଉ ୨୪:୧-୨; ଲୁକ ୨୧:୫-୬)

୧ ଅଣ୍ଟ ଦିନେ ଜିସୁ ମନ୍ଦିରକଞ୍ଚ ପେଇସ୍ ଆଦାନ୍ ଖେଲେ ତାନ୍ ଶିଷ୍ୟ ଅର୍ଡ଼ଣ୍ଟ କେତଣ୍ଟ, “ଗୁରୁ ! ଉଡ଼େ, ବେସର୍ ସୁନ୍ଦର୍ କାଲ୍‌କ୍ ନୁ ବେସର୍ ସୁନ୍ଦର୍ ଲୋକ୍ !”

୨ ଜିସୁ ଉତ୍ତର ଇସ୍ କେଡ଼ତଣ୍ଟ, “ନେଣ୍ଟ ଇଦ୍ ବାଡ଼ିୟା ଲୋନତିଙ୍କ୍ ଉଡ଼ଡ଼ିଡ଼ ? ଆଦ୍ ଖେରଟ୍‌ବା କାଲ୍ ନିଜର୍ ପଡ଼ିୟେତାଗ୍ ମାନ୍ । ଆଦ୍ ସାରେ ବୁମ୍‌ଦାଗ୍ କାଲ୍‌ଲିତେ ।”

ଯୁଗ୍ ତେରାନ୍ ଖେଲେତେ ଗର୍

(ମାତିଉ ୨୪:୩-୧୪; ଲୁକ ୨୧:୭-୧୯)

୩ ଅଣ୍ଟ ଦିନେ ଜିସୁ ମନ୍ଦିର୍ ମୁନେଡ଼ ଜିତ ମେଟେତେ ପର କୁଦିମାଡ଼ତଣ୍ଟ । ପିତର୍, ଯାକୁବ, ଯୋହନ ନୁ ଆନ୍ଦ୍ରିୟ କାଲ୍‌ଲି ତାନ୍ ଗାରେ ଝାସ୍ ପାସ୍‌ରିଞ୍ଚିତଡ଼,

୪ “ଇଞ୍ଜୁସାରେ ବେସୁଙ୍କ୍ ଗଟେମ୍ ଆଦ୍‌ତେ ମାକିଙ୍କ୍ କେଲ୍‌ମ୍ । ବାତେଏ ଉଡ଼ି ଇଞ୍ଜୁ ସାରେ ବକେତେ ଏଞ୍ଜୁତା ଇଞ୍ଜ୍ ମାମେ ପୁନ୍‌ତମ୍ ?”

୫ ଜିସୁ ଅଡ଼କିଙ୍କ୍ କେଡ଼ତଣ୍ଟ, “ସାବଦାନ୍, ବେନ ବେଲା ମିକିଙ୍କ୍ ବୁସା ମାଡ଼ମାକିଣ୍ଟ ।”

୬ ନାଗେ ନା ପେଦେରତିଙ୍କ୍, ଅସ୍ କେଡିତଡ଼, ନୁ ନାନେ ଅଣ୍ଟେ ଇଦିନ୍‌ତଡ଼ ଅଡ଼୍‌ପିନା ନାରୁଙ୍କ୍ ବୁସା ମାଡ଼ିତଡ଼ ।

୭ ଗାରେତେ ଯୁଦ୍ ବା ଜେକେତେ ଯୁଦ୍ ମରେ କେଞ୍ଜି ମିଡ଼୍ ଖେରେମାର୍ । ଇଦିନ୍ ଲେକେ ପିନା ଗଟେମ୍ ଆଦ୍‌ତା । କିନ୍ତୁ ଇଦିନ୍ ଅର୍ଥ ଆୟ୍ ଯେ ତେରାନ୍ ଦିନାମ୍ ଏଞ୍ଜୁତେ ।

୮ ଦେଶ୍ ଦେଶ୍ ଲୋପେ ଯୁଦ୍ ଆଦ୍‌ତେ । ଅଣ୍ଟ ରାଜ୍ୟ ମେଣ୍ଟନ୍ ରାଜ୍ୟତିଙ୍କ୍ ଯୁଦ୍ ମାଡ଼ିତେ । ସାରେ ହେକାମ୍ ବୁମ୍ ମେୟିଦ୍‌ତେ

ନୁ ମୁହଁ ଆଦତେ । କିନ୍ତୁ ଲୁହୁସାରେ ଡଙ୍କେଡ଼ ମାନ୍ଦାନ ମୁତେନ୍ ଡଙ୍କେନପ୍ ଆରାମ୍ ଆଦାନ ମୁନେତେ ଗଟି ।

୯୮ “ମିକିଙ୍କୁ ସାବଦାନ ମାନ୍ଦେ ଖେୟତିତ୍ ।” ମିଡ଼୍ ତହୁସ୍ ଜେଲ୍ ଦାଗ୍ ଆଡ଼ତିତି । ମିଡ଼୍ ଉପାସନା ଲଡ଼ତାଗ୍ ଦେବ୍ ତିଡ଼୍ତିତ୍ । ନା ମାଇଦିଙ୍କୁ ମିଡ଼୍ ସାସନକର୍ତ୍ତାଲଡ଼୍ ନୁ ରାଜାଲଡ଼୍ ମୁନେ ନିସ୍ ସୁସମାଚାର୍ ଗର୍ କେଷ୍ଟ୍ ଖେୟତିତ୍ ।

୧୦ କିନ୍ତୁ ଅଣ୍ଟ ବାଡ଼ ଆୟଣ୍ଟବା, ତେରାନ୍ ଦିନାମ୍ ଖାଦାନ ମୁନେକେ ସାରେ ଜାତି ନୁ ସାରେ ନାରୁଡ଼୍ ଗାରେ ଇଦ୍ ସୁସମାଚାର୍ ନିଜାମ୍ତେ ପ୍ରଚାର୍ ଆଦତେ ।

୧୧ ମିକିଙ୍କୁ ତହୁସ୍ ଜେଲ୍ ଦାଗ୍ ଅଦାନ ଖେଲେ, ଆଗ୍ ବାତେକେତାଙ୍କୁ ଆଦତେ, ଇଦ୍ ବିଷୟତିଙ୍କୁ ଦାନ୍ ଆଇମାର୍ । ଆ ସମୟତେ ବାଡ଼ କେତାଙ୍କୁ ଆଦତେ, ଆଦ୍ ମିକିଙ୍କୁ କେଜ୍ପିଦ୍ତତ୍ । ଆସୁର୍ ମିକିଙ୍କୁ ନିଜର୍ ମନ୍ଦେ ବାଡ଼ କେଡ଼୍ଖେୟ । ମିଡ଼୍ ବାଡ଼ ତେତିତ୍, ଆଦ୍ ପବିତ୍ର ଆମ୍ ପୁଞ୍ଜିପିତ୍ ।

୧୨ ଆ ସମୟତେ ନାରୁଡ଼୍ ନିଜର୍ ଦାଦାଲଡ଼୍କିଙ୍କୁ ଆଞ୍ଜକାନଙ୍କୁ ପସ୍ତିଦ୍ତତ୍, ବାବାଲଡ଼୍ ନିଜର୍ ମାର୍କିନ୍ ପର ଆଲେ ମାଡ଼ିତତ୍ । ପିଲାକି ନିଜର୍ ଯାୟବାବାନ୍ ପର ବିରଦ୍ତେ ତେଦିତତ୍ ଅଡ଼୍କିଙ୍କୁ ଆଞ୍ଜକାନା ମାଡ଼ିତତ୍ ।

୧୩ “ନା ସେଙ୍ଗେ ସାରେତତ୍ ମିକିଙ୍କୁ ଗୁନା ମାଡ଼ିତତ୍, କିନ୍ତୁ ବେନଡ଼୍ ମାଡ଼େଙ୍ଗ୍ ଆୟନା ନିସ୍ମାନ୍ତତ୍, ଅଡ଼୍ ପରିତ୍ରାଣ ପାଏମ୍ ଆଦତତ୍ ।

କପାମ୍ତେ ଗର୍

(ମାଡ଼ିଉ ୨୪:୧୫-୨୮; ଲୁକ ୨୧:୨୦-୨୪)

୧୪ “ମିଡ଼୍ ଆ ‘ଦ୍ବସ୍ କାରିଡ଼ି’ ପିନ୍ଦଲାଦିଙ୍କୁ ଉଡ଼ିତିତ୍, ବେନ୍ କି ମାଡ଼ାନାଦ୍ ଆୟ, ଆଗେ ଆଦିଙ୍କୁ ଉଡ଼ିତିତ୍,” କାର୍ଯ୍ୟାନତି ଇଦିଙ୍କୁ ବୁଜେମ୍ ଆଦାଙ୍କୁ ଚେଷ୍ଟା ମାଡ଼ାର୍, “ଆସୁର୍ ଯିହୁଦାବାସିଡ଼୍ ମେଚେଡ଼୍ ପର ମିରିଡ଼୍ ।”

୧୫ “ବେନ୍ ଅଲୋଡ଼୍ତେ ମୁସ୍ ନାଗ୍ ଆଞ୍ଜ ମିନ୍ଦେଣ୍ ଲନ୍ ଲୋପେଡ଼୍ ବେନ୍ ଜିନିଷ୍ ଅଦାନଙ୍କୁ ଅଣ୍ଟ ତିଗିସ୍ ସମୟ ନଷ୍ଟ ମାଡ଼ମାକିଣ୍ଟ ।

☆ ୧୩:୯ ମାଡ଼ିଉ ୧୦:୧୭-୨୦; ଲୁକ ୧୨:୧୧,୧୨.

☆ ୧୩:୧୩ ମାଡ଼ିଉ ୧୦:୨୨.

☆ ୧୩:୧୫ ଲୁକ ୧୭:୩୧.

୧୭ ବେନଅ ଖାୟତା ଆଞ୍ଜି ମିନ୍ଦେଣ୍ଡୁ, ଚକାସିଲେ ଆଦାନଙ୍କ ଅଣ୍ଡ ଲନ୍ ଖାଡ଼ମାକିଣ୍ଡୁ ।

୧୭ ଆସୁର୍ ଡଙ୍ଗେଡ଼ ମାନ୍ଦାନ୍ ନାଟା ନୁ କାୟଦାଗ୍ଗେ ପିଲ୍ଲେ ପୟସ୍ ମାନ୍ଦାନ୍ ଯାୟକି ବେସର୍ କଷ୍ଟ ଆୟ ।

୧୮ ଇଶ୍ବରତିଙ୍କ ପ୍ରାର୍ଥନା ମାଡ଼ାଟ୍, ଇ ଗଟନା ବେଲା ସାଲ୍‌ଦେ ଖେଲେ ଆୟମାକି ।

୧୯ ☆ଆ ଦୁର୍ଦ୍ଦିନତେ ଦୁଃକକଷ୍ଟ ସାରେ ସୃଷ୍ଟି ଆରାମ୍‌ତେ ନେଣ୍ଡୁ ଆୟନା ଗଟେମ୍ ଆସ୍ ମାନ୍ଦାନ୍ ସାରେ ତିପାଲ୍ ପେକେ ବୟଙ୍କର୍ ଆଦତେ ।

୨୦ କିନ୍ତୁ ପ୍ରଭୁ ଆ ଦୁର୍ଦ୍ଦିନତେ ସମୟତିଙ୍କ କମ୍ ମାଡ଼ିସ୍ ମିନ୍ଦେଣ୍ଡୁ । ଆଲା ଆୟ୍‌ଖେ ମାକ୍‌କେ, ଆଗାଙ୍କ ବେନ ରକ୍ଷା ପାୟେମ୍ ଆଦାଙ୍କ ପାର୍‌ଖଣ୍ଡୁ । ତାନ୍ ଏଞ୍ଜିମାନ୍ଦାନ୍ ନାରୁଡ଼୍ ସେଙ୍ଗେ ଅଣ୍ଡ ସମୟ ନେହ୍‌ସ୍ ମିନ୍ଦେଣ୍ଡୁ ।

୨୧ ଆସୁର୍ ବେନଅ କେତିତଣ୍ଡୁ, “ଉଡେ, ମସିହ ଇଗେ ମିନ୍ଦେଣ୍ଡୁ,” ଆଗେ ଉଡେ ମସିହ ଆଗେମିନ୍ଦେଣ୍ଡୁ, ଆଦିଙ୍କ ବିଶ୍ବାସ୍ ମାଡ଼ମାଟ୍ ।

୨୨ ବୁସା ମାଡ଼ାନ୍ ମସିହ ନୁ ବୁସା ମାଡ଼ାନ୍ ବଣ୍ଡକ୍ରିଷ୍ଟଡ଼୍ ତନ୍ଦିତଡ଼୍ । ଅଦିକ୍ ଆକେ ଇଶ୍ବର ଏଞ୍ଜିତେ ନାରୁଡ଼୍‌କୁ ବା ଟକା ମାଡ଼ାନ୍ ଅଡ଼୍ ବେପଡ଼୍‌ମାଡ଼୍‌ଖେ ପାଡ଼ିୟି ମାଡ଼ିତଡ଼୍ ନୁ ବେସୁଙ୍କ ଉଡ଼୍‌ଖେ ଆସୁଙ୍କତାଞ୍ଜୁ ତଅତିତଡ଼୍ ।

୨୩ ମିଡ଼୍ ସାବଦାନ୍ ମାନୁଟୁ । ହିଞ୍ଜୁ ସାରେ ଗଟେମ୍ ଆଦାନ୍ ମୁନେ ନାନେ ମିକିଂଙ୍କ କେଞ୍ଜିପିତାନ୍ ।

ନାରୁନ୍‌ପିଲେ ମେଣ୍ଡୁ ଖାଦାନ୍‌ଦିନାମ୍

(ମାଡ଼ିଡ଼ ୨୪:୨୯-୩୧; ଲୁକ ୨୧:୨୫-୨୮)

୨୪ ☆“ଆ ଦୁକାମ୍‌ଦିନେ ଖାଡ଼ତେ ପେକେ ପଡ଼୍‌ଡ଼ତିଙ୍କ ଇକାଡ଼୍ ଆଦତେ, ନେଞ୍ଜିତିଙ୍କ ଖେସ୍ ଆଦତେ,”

୨୫ ☆ଉକାକ୍ ମୟଲତାଗାଙ୍କ ରାଈତା ମହାଶୂନ୍ୟତେ ଶକ୍ତିସାରେ ଖାଡ଼କି ଆଦତା ।

୨୬ ☆ଆସୁର୍ ନାରୁନ୍‌ପିଲେ ଗୌରବ୍ ନୁ ମହା ପରାକ୍ରମତେ

☆ ୧୩:୧୯ ପ୍ରକାଶିତ୍ ବାକ୍ୟ ୭:୧୪. ☆ ୧୩:୨୪ ପ୍ରକାଶିତ୍ ବାକ୍ୟ ୭:୧୨. ☆ ୧୩:୨୫ ପ୍ରକାଶିତ୍ ବାକ୍ୟ ୭:୧୩. ☆ ୧୩:୨୬ ପ୍ରକାଶିତ୍ ବାକ୍ୟ ୧:୭.

ମାତ୍ତାଗାଙ୍କୁ ଝାଦାନାଦ୍ ଉଡ଼ିତିଡ଼ ।

୨୭ ତାନ୍ ଏଞ୍ଜି ସି ମାନ୍ଦା ନାରୁଡ଼ିକ୍ ଜଗତ୍ତେ ଅଣ୍ଟ ପଡ଼୍‌ୟେତାଗାଙ୍କୁ ମେଣ୍ଟନ୍ ପଡ଼ିୟେତାର୍ ମେକି ଆଦାନ ମାଜଦିକ୍ ଅଣ୍ଟ ତାନ୍ ଦୂତକିକ୍ ସାର୍‌ଏକାମ୍ ବା ପୃତିବିତେ ଶେଷ୍‌ସିମା ଏଞ୍ଜୁନା ରଅତିତଣ୍ଟ ।

ତୟେ ମାତ୍ତାଗାଙ୍କୁ ଶିକ୍ଷା

(ମାତିଉ ୨୪:୩୨-୩୫; ଲୁକ ୨୧:୨୯-୩୩)

୨୮ “ତୟେ ମାତ୍ତାଗାଙ୍କୁ ଶିକ୍ଷା ନାଡ଼୍‌ସାର୍ । ବେସୁର୍ ଲେତାଞ୍ଜୁ ଆକି କଡ଼୍‌ସିତା, ଆସୁର୍ ଏଦ୍ କାଲାମ୍ ଏଞ୍ଜୁତେ ଇଞ୍ଜି ମିଡ଼୍ ପୁନ୍‌ଡ଼ିଡ଼ ।

୨୯ ଟିକ୍ ଆଲେନେ ହିଞ୍ଜୁସାରେ ଗଟନା ଉଡ଼୍‌କେ, ତେରାନ୍ ଦିନାମ୍ ଏଞ୍ଜୁତେ ଇଞ୍ଜି ପୁନ୍‌ଡ଼ିଡ଼ ।

୩୦ ନାନ୍ ମିକିଂଙ୍କୁ ନିଜାମ୍ କେତୁତାନ୍, ବେନଡ଼୍ ଜିଞ୍ଜି ମିନ୍ଦେଡ଼୍, ଅଡ଼୍ ତଲାନ୍ ମୁନେଙ୍କୁ ଇଞ୍ଜୁ ସାରେ ଗଟେମ୍ ଆଦତା ।

୩୧ ମୟଲ୍ ନୁ ପୃତିବି ଦଂସ ଆଦତେ, କିନ୍ତୁ ନୁା ଗର୍ ବେସୁଙ୍କୁ ଦଂସ ଆୟ ।”

ଅନ୍ ଝାଦାନ ଦିନାମ୍ ବେନ ପୁନଡ଼୍

(ମାତିଉ ୨୪:୩୬-୪୪)

୩୨ ☆“ଆଦିନ୍, ବେସୁର୍ ଝାଦତଣ୍ଟ, ବେନ ପୁନଡ଼୍ । ସ୍ୱୟଂ ଇଶ୍ୱର୍ ତେ ମାର୍ କିମ୍ବା ସ୍ୱର୍ଗତେ ଦୂତ ବା ଇଗଟି ପୁନ ଇକ୍ତେ ବାବାଲ୍ ଇଶ୍ୱର୍ ଇଗଟି ପୁଡ଼ତଣ୍ଟ ।

୩୩ ସାବ୍‌ଦାନ୍ ଆସ୍ କେପିମାନୁର୍, ଆଦ୍ ସମୟ ବେସୁର୍ ଝାଦତେ ଆଦ୍ ମିଡ଼୍ ପୁନ୍‌ଡ଼ିଡ଼ ।

୩୪ ☆ଅରୁଡ଼ଣ୍ଟ ନାରୁଣ୍ଟ ଉଡାଙ୍କୁ ଆଦାଙ୍କୁ ପେୟଡ଼୍ ଖେଲେ, ତାନ୍ ଲୋନ୍ ଚାକରିଡ଼୍ ଦାଉତ୍ୟ ଝିଡ଼୍‌ସିସ୍ ଆଦତଣ୍ଟ । ଅଡ଼୍ ଲୋପେଙ୍କୁ ବେନ ବାଡ଼୍ ମାଡ଼ିତଣ୍ଟ, ବୁଜାମାଡ଼ିସ୍, କେପାନଡ଼ିକିଙ୍କୁ ତିଆର୍ ଆସ୍ ମାନ୍ଦାଙ୍କୁ କେସ୍ ଆଦତଣ୍ଟ ।

୩୫ ଆଲେ ନେ ନାନେ ମିକିଂଙ୍କୁ ସାବ୍‌ଦାନ୍ କେସ୍‌ମିନ୍ଦେନ୍, ବାତାଙ୍କୁ ଇକ୍ତେ ଲୋଡ଼ତେ ମୁଦ୍‌ପାଲ୍ ବେସୁଙ୍କୁ ଝାଦତଣ୍ଟ, ମିଡ଼୍ ପୁନ୍‌ଡ଼ିଡ଼୍

ମୂଲ୍ୟପୁର ବା ନାହନାର୍କା, ଝିୟଦାନ ଗାରେ ବା ପଡ଼୍‌ଦ ପେୟତାନ
ଝେଲେ ଅଣ୍ଡ ଝାଦ୍ ପାର୍ଦତଣ୍ଡ ।

୩୭ ଅଣ୍ଡ ଯଦି ଅଟାଡ଼ ଝାସ୍ ଏଞ୍‌ଦତଣ୍ଡ, ମିକିଂଙ୍କ ଉଞ୍ଜତେ
ପଡ଼୍‌ୟତାଗେ ଅଣ୍ଡ ଉଡ଼ମାକିଣ୍ଡ ।

୩୮ ନାନ ମିକିଂଙ୍କ ବାତେ କେଡୁତାନ, ଝେରତଡ଼କିଙ୍କ ବା ଆଦେ
କେଡୁତାନ ଜାଗ୍ରତ୍ ଆସ୍ ମାନୁର୍ ।”

୧୪

ଜିସୁନ୍ ବିରଦତେ ପେରଲାନାଦ୍

(ମାତିଉ ୨୬:୧-୫; ଲୁକ ୨୨:୧-୨; ଯୋହନ୍ ୧୧:୪୫-୫୩)

୧ ନିସାର ପାଣ୍ଡୁନ୍ ନୁ କମିରଣ୍ଡନ୍‌ ଯୁଟି ପାଣ୍ଡୁନ୍‌ତେ ରେଣ୍ଡ ଦିନା
ମୁନେ ଜିସୁଙ୍କ ମିଞ୍ଜି ପି ତଅସ୍ ଅସ୍ ଆଞ୍ଜୁକାନଙ୍କ ମୁକ୍ୟ ପୁରୋଇତ ନୁ
ଦର୍ମଗୁରୁଡ଼ ଉପାୟ ମେହେକୁତଡ଼ ।

୨ ଅଡ଼ କେଡତଡ଼, “ପାଣ୍ଡୁନ୍‌ତେ ଝେଲେ ଇଦ୍ ପାଡ଼୍‌ୟି ମାଡ଼ମାଟ୍,
ବାତେଙ୍କଇକେ ଆସୁଟ ନାରୁଡ଼ ରାମକ କଟ ମାଡ଼ିତଡ଼ ।”

ଜିସୁ ବେତାନିତାଗ୍ ଅବିସିଲ୍ ଆଡ଼ତଣ୍ଡ

(ମାତିଉ ୨୬:୬-୧୩; ଯୋହନ୍ ୧୨:୧-୮)

୩ ☆ଜିସୁ ବେନିତାଗେତେ କୁଷ୍ଟି ଶିମୋନ ପେଦେରତେ ଅର୍ଡୁଣ୍ଡ
ନାରୁଡ଼େ ଲୋନ୍ କୁଟମାମ୍ ଆସମାତଣ୍ଡ । ଜିସୁ ଆଗେ ତିୟାଙ୍କ କୁଦି
ମାଡ଼ତେ ଝେଲେ ଅଣ୍ଡ ନାଟାଡ଼ ଝାସ୍ ନାଗେ ଦାନିନ୍ ପାଇସାନାଦ୍
ଜଟାମାଂସି ଗାବମାୟାନ୍ ନିୟ ବରତିମାୟାନ୍ ଅଣ୍ଡ ପାଣ୍ଡୁରିଲାଦ୍ ଗିନେ
ପୟସ୍ ଝାଡ଼ତେ । ଆଦ୍ ଗିନେତିଙ୍କ ଉସ୍ ଜିସୁନ୍ ମୁଞ୍ଜିନ୍ ପର୍ ସାରେ
ନିୟ ତସତେ ।

୪ ଆଗେ ମାୟା ବେସକେ ନାରୁଡ଼ ଅଦିନ୍ ଆ ପାଡ଼୍‌ୟି ଉଡ଼ି କପାମ୍
ଆଡ଼ତଡ଼ ନୁ ତାମତାମ୍ ଲୋପେ କେତାକେତି ଆଡ଼ତଡ଼, “ଇଦ୍
ଗାବମାୟାନ୍ ନିୟ ଇଲା ନଷ୍ଟ ମାଡ଼ାନାଦ୍ ସାୟ ଆଡ଼ତେ କି ?

୫ ତାଙ୍କିଙ୍କୁ ଖାମିକେ, ତିନିଗହ ପିନା ରୌପ୍ୟ ମୁଦ୍ରା ଦରକେ ନୁ ଆ
ଡାବକ୍ ଗରିବ୍ ନାରୁଡ଼କ୍ ଇଦାଙ୍କୁ ଆୟେଡ଼,” ଆ ନାଟାଡ଼ତିଙ୍କି ନାଗେ
ଗଟି କେଡ଼ତଡ଼ ।

୬ କିନ୍ତୁ ଜିସୁ କେଡ଼ତଡ଼, “ତାଙ୍କି ଆସର ଅଇରାନ୍ ମାଡ଼ୁଛି ବାତାଙ୍କୁ ?
ଆଦ୍ ନାମା ଇଦିଙ୍କୁ ଅଣ୍ଟି ସୁନ୍ଦର ପାଡ଼ିୟ ମାଡ଼ିମିନ୍ଦେ ।

୭ ଗରିବ୍ ନାରୁଡ଼ ମିକିଂଙ୍କୁ ସାରେ ଝେଲେ ଦକିତଡ଼ । କିନ୍ତୁ ମିଡ଼,
ଅଡ଼କିଂଙ୍କୁ ସାହାଯ୍ୟ ମାଡ଼ାଙ୍କୁ ଇଚ୍ଛା ମାଡ଼ିତିଡ଼, ଆସୁର୍ ସାହାଯ୍ୟ ମାଡ଼େ
ପାର୍ଦ୍ଦତିଡ଼, ନାନେ ମିକିଂଙ୍କୁ ସାରେ ଝେଲେ ଦରକନ୍ ।

୮ ଆଦ୍ ତାନ୍ ସାମର୍ଥ୍ୟ ଅନୁସାରତେ ଇଦି ନା ମାୟିଦିଙ୍କୁ ମାଡ଼ତେ
ନାନେ ସମାଦି ଆଦାନ୍ ମୁନେନେ ଆଦ୍ ନାପର ଗାବ୍ ମାନ୍ଦାନ୍ ନିୟ୍
ତସ୍ତେ ।

୯ ନାନ୍ ସଡ଼ କେଡ଼ତାନ୍, ସାରା ଜଗତ୍ତାଗେ ନା ସୁସମାଚାର
ବେଗେ ପ୍ରଚାର୍ ଆଦ୍ତେ, ଆଗେ ଇ ନାଟାଡ଼ ବାତେ ମାଡ଼ତେ, ଆଦ୍
ସାରେ ଏକେ ମାଡ଼ାନ୍ ମାୟିଙ୍କୁ କେସମାନ୍ତଡ଼ ।”

ଜିସୁନ୍ ପର ଯିହୁଦାଲ୍ ବିରୋଦ୍

(ମାଡ଼ିତ ୨୭:୧୪-୧୬; ଲୁକ ୨୨:୩-୬)

୧୦ ଜିସୁନ୍ ବାରଜାନ୍ ଶିଷ୍ୟଡ଼ ଆଗାଙ୍କୁ ଇଷ୍ଟରିୟୋ ଯିହୁଦା
ପେଦେରତଣ୍ଡ ଅର୍ଡ଼ଣ୍ଡ ଶିଷ୍ୟ ଜିସୁଙ୍କୁ ପସ୍ତାପିଦାଙ୍କୁ ମୁକ୍ୟ ପୁରହିଡ଼ତେ
ଗାରେ ଆଡ଼ତଣ୍ଡ ।

୧୧ ଅଡ଼ ଅନ୍ ଗଟିନେ କେଞ୍ଜି ଝେଡ଼ତଡ଼ ନୁ ଅଂକିଙ୍କୁ ଆଦିନ୍ ମାୟିଙ୍କୁ
ବେସର୍ ଡାବକ୍ ଅଦ୍ତି ଇଞ୍ଜି ଅଂକିଙ୍କୁ କେଡ଼ତଡ଼ । ଆ ସମୟତେ
ଜିସୁଙ୍କୁ ଅଡ଼ କାୟା ପସ୍ତାପାଙ୍କୁ ଯିହୁଦାଲ୍ ସୁଯୋଗ ମେହେକ୍ତଣ୍ଡ ।

ଜିସୁ ଶିଷ୍ୟଡ଼ ତଡ଼ ନିସ୍ତାର ପାଣ୍ଡୁ ମାଡ଼ତଣ୍ଡ

(ମାଡ଼ିତ ୨୭:୧୭-୨୫; ଲୁକ ୨୨:୭-୧୪, ୨୧-୨୩; ଯୋହନ୍
୧୩:୨୧-୩୦)

୧୨ କମିରଗୁନ୍ୟ ରୋଟି, ପାଣ୍ଡୁ ଦିନାତେ ଝେଲେ ନିସ୍ତାର ପାଣ୍ଡୁ
ତିନ୍ଦାନ୍ ଝେଲେ ମେଣ୍ଟେପିଲେ ପୁଜ୍ଜେ ଇଦ୍ତଡ଼, ଶିଷ୍ୟଡ଼ ଜିସୁଙ୍କୁ
ପାରାମାଡ଼ତଡ଼, ମାମେ ବେନ୍ ଏଡ଼ ନି ସେଙ୍ଗେ ନିସ୍ତାର ପାଣ୍ଡୁ
ତିନ୍ଦାର ମାଡ଼ିତମ୍ ?

୧୩ ଜିସୁ ଇଡ଼୍‌ଝୁଡ଼ ଶିଷ୍ୟତଃ ଇଦି ପାଡ଼୍‌ୟି ମାଡ଼ାନଙ୍କ ରଅତଣ୍ଡ,
“ମିଡ଼୍‌ଟାଉନ୍ ଲୋପେ ଆନୁର୍ ।” ଆଗେ କୁଣ୍ଡେତାଗ୍ ଏର୍ ଅସ୍ ମାନ୍ଦାନ୍
ଅର୍ଡ଼ଣ୍ଡ ନାରୁଣ୍ଡ କାଲିତଣ୍ଡ । ଅନ୍ ପେକେ ଆନୁର୍ ।

୧୪ ଅଣ୍ଡ ବେନ୍ ଲୋନ୍ ନେଜିତଣ୍ଡ, ଆ ଲୋଡ଼ତେ ମାଲିକିତିଙ୍କ
କେଲ୍‌ମୁର୍, “ଗୁରୁ କେଡ଼ତଣ୍ଡ, ବେନ୍ ବାକ୍‌ଡେତାଗେ ଅଣ୍ଡ ତାମ୍
ଶିଷ୍ୟତଃ ନିସ୍ତାର ପାଣ୍ଡୁମ୍ ମାଡ଼ିତଡ଼?”

୧୫ ଅଣ୍ଡ ମିକିଙ୍କ ପରତାଦ୍ ଅଣ୍ଡୟ୍ ଲେକେଡ଼ ସଜାମାଡ଼ତେ
ବାକେଡେ ତଅତିତଣ୍ଡ । ଆଗେ ମିଡ଼୍ ମା ମାୟ୍‌ଦିଙ୍କ ସାର୍ ବିଷୟ
ତିଆର୍ ମାଡ଼ିତିଡ଼ ।

୧୬ ଅଡ଼ ଇଡ଼୍‌ଝୁଡ଼ ଶିଷ୍ୟତଃ ଟାଉନ୍‌ତାଗ୍ ଆଡ଼ତଡ଼ନ୍ ଜିସୁ କେଡ଼ତେ
ଲେକେ ସାର୍ ଗଟି ଉଡ଼ତଡ଼ । ଆଗେ ଅଡ଼ ନିସ୍ତାର ପାଣ୍ଡୁମ୍ ମାଡ଼ତଡ଼
।

୧୭ ମୁଲୁପୁର୍ ଜିସୁ ଶିଷ୍ୟତଃ ଆ ବାକ୍‌ଡେତାଗ୍ ଆଡ଼ତଣ୍ଡ ।

୧୮ ତିନ୍ଦାଙ୍କ କୁଦ୍‌ତେ ଝେଲେ ଜିସୁ କେଡ଼ତଣ୍ଡ, ନାନେ ନିଜାମ୍
କେଡ଼ତାନ୍ ମି ଲୋପେଙ୍କ ଅର୍ଡ଼ଣ୍ଡ ନା ବିରୋଦ୍ ଆଡ଼ତଣ୍ଡ । ଅଣ୍ଡ ନା
ତଡ଼୍‌ତିନ୍ଦାଙ୍କ କୁଦ୍‌ତଣ୍ଡ ।

୧୯ ଶିଷ୍ୟତଃ ଇ ଗଟି କେଞ୍ଜି ଝେର୍ ଝେର୍ ପାତାର୍‌ମାଡ଼ତଡ଼, “ନିମେ
ନାକିଙ୍କ ଉଡ଼ି ଇ ଗଟି କେଲ୍‌ଝିଡ଼୍‌ତ ।”

୨୦ ଜିସୁ ଉତ୍ତର ଇଡ଼ତଣ୍ଡ, ମି ବାର ଜାନ୍ ଲୋପେଙ୍କ ଅର୍ଡ଼ଣ୍ଡ; ଅଣ୍ଡ
ନା ତଡ଼୍‌ଅଣ୍ଡୟ୍ ତାଲିତାଗ୍ ରୋଟି ମୁଉସ୍ ତିନ୍ଦୁତଣ୍ଡ ।

୨୧ ଶାସ୍ତ୍ରତାଗ୍ ଲେକ୍‌ତେ ଲେକାମ୍ ନାରୁଣ୍ଡ ପିଲେ ଡ଼ଲିତେ । କିନ୍ତୁ
ବେନ୍ ନାରୁଣ୍ଡ ଅନ୍ ପର ବିରୋଦ୍ ମାଡ଼ିତଣ୍ଡ, ଅନ୍ ଦଶା ବେସର୍
ବୟଙ୍କକର୍ ଆଡ଼ତେ । ଅଣ୍ଡ ଜନମ୍ ଆୟିଝେ ମାଡ଼କେ ଅନ୍ ପାକେ
ଆୟିଡ଼୍ ।

ପ୍ରବୁବୋଜ୍

(ମାଡ଼ିଡ଼ ୨୬:୨୬-୩୦; ଲୁକ ୨୨:୧୪-୨୦; ୧ କରନ୍ତ୍ରିୟ ୧୧:୨୩-
୨୫)

୨୨ ଅଡ଼୍‌ ତିନ୍ଦା ସମୟତେ ଜିସୁ ଅଣ୍ଡୟ୍ ରୁଟି ଅସ୍ ଇଶ୍ବରତିଙ୍କ
ଦନ୍ୟବାଦ୍ ଇଡ଼ଣ୍ଡ ନୁ ତାଙ୍କି ଉଝୁସ୍ ଶିଷ୍ୟତଃ ଇସ୍ କେଡ଼ତଣ୍ଡ,
“ଅୟ୍‌ମୁର୍, ତିନ୍ଦୁର୍ ଇଦି ନା ମେୟୁଲୁ ।”

୨୩ ତାନ୍ ପେକେଁ ଦ୍ରାକ୍ଷାରସ୍ ବତ୍ ମାନ୍ ସଲ୍‌ତିଙ୍କ୍ ଅସ୍
ଇଶ୍ବରତିଙ୍କ୍ ଦନ୍ୟବାଦ୍ ଇତଶ୍ଚ ନୁ ଆଦ୍ ଶିଷ୍ୟତ୍‌ଙ୍କି ଇତଶ୍ଚ । ଅଡ୍
ଆଗାକଞ୍ଚ ଉଡ୍‌ତଡ୍ ।

୨୪ ଜିସୁ କେତଶ୍ଚ, “ଇଦ୍ ନା ନେତୁର୍, ନାରୁନ୍ ପାପ୍ କ୍ଷମାତେ
ମାଈଦିଙ୍କ୍ ନାନ୍ ନା ବେନ୍ ନେତୁରୁ ତସିଦାଙ୍କ୍ ଆଦୁତାନ୍, ଆଦ୍
ଇଶ୍ବରତେ ପୁଃନେ ନିୟମ୍ ମାଡିତେ ।

୨୫ ମିକିଂଙ୍କି କେସ୍ ନେଏତୁତାନ୍, ଇଶ୍ବରତେ ରାଜ୍ୟ ପୁଃନେ
ଅଙ୍ଗୁରରସ୍ ଉନ୍ୟାନାଗାଙ୍କ୍, ନିଜାମ୍ ନାନେ ମେଣ୍ଡେ ବେସୁଙ୍କ୍ ଦ୍ରାକ୍ଷାରସ୍
ଉନନ୍ ।”

୨୬ ତାନ୍ ପେକେଁ ଜିସୁ ନୁ ତାମ୍ ଶିଷ୍ୟତ୍ ପାଟା ପାରଡ୍ ଜିତ
ମେଟେତାଗ୍ ଆଡ୍‌ତଡ୍ ।

ପିତର ଅସ୍ବିକାର ମାଡାନାଦ୍ ଜିସୁ ଆଲସାନ୍ ଗଟ୍

(ମାଡିଉ ୨୬:୩୧-୩୫; ଲୁକ ୨୨:୩୧-୩୫; ଯୋହନ୍ ୧୩:୩୬-୩୮)

୨୭ ଜିସୁ ଶିଷ୍ୟତ୍‌ଙ୍କି କେତଶ୍ଚ, ମିଡ୍ ନାକିଙ୍କ୍ ଝିଡ୍‌ସି ମିରିତିଡି
। ଇ ବିଷୟତେ ଶାସ୍ତ୍ରତାଗେ ଲେକାଆସ୍ ମିନ୍ଦେ, ନାନେ ମେଣ୍ଡା
ମେଇତାନଙ୍କ୍ ଆଞ୍ଜୁକିତାନ୍ ନୁ ମେଣ୍ଡା ଏକାମ୍ ଆଦତା ।

୨୮ ☆କିନ୍ତୁ ନାନେ ତଲ୍‌ତାଗାଙ୍କ୍ ତେଏଦ୍‌ତେ ପେକେଁ ମିଡ୍ ଆଦାନ୍
ମୁନେନ୍‌ନେ ଗାଲିଲୀତାଗ୍ ଆଦତାନ୍ ।

୨୯ ପିତର କେତଶ୍ଚ, ସାରେତଡ୍ ଝିଡ୍‌ସି ଆଡ୍‌କେ ବା ନାନେ ଝିଡ୍‌ସି
ଆନନ୍ ।

୩୦ ଜିସୁ ପିତରତିଙ୍କ୍ କେତଶ୍ଚ, ନାନ୍ ନିକିଙ୍କ୍ ସଡ୍ କେତୁତାନ୍, ନେଣ୍ଡେ
ନାର୍‌କା ରେଣ୍ଡେଦାମ୍ କର୍‌କ୍ କୁସାନ୍ ମୁନେ ନିମେ ନାକିଙ୍କି ମୁଣ୍ଡଦାମ୍ ପୁନନ୍
ଇଞ୍ଜ କେତିତିନ୍ ।

୩୧ ପିତର ମେଣ୍ଡେ କେଡ୍‌ତଶ୍ଚ, “ନିତଡ୍ ତଲ୍‌ଲାନଙ୍କ୍ ଆଡ୍‌କେମିକା
ବେସୁଙ୍କ୍ ବା ନିକିଙ୍କ୍ ପୁନନ୍ ଇଞ୍ଜ କେଲନ୍ ।” ବାଗାଡ୍ ଶିଷ୍ୟତ୍ ମିକା
ଆଲେ କେଡ୍‌ତଡ୍ ।

ଗେତସିମାନି ବଗିଚାତାଗେ ଜିସୁନ୍ ପ୍ରାର୍ତନା

(ମାଡିଉ ୨୬:୩୬-୪୬; ଲୁକ ୨୨:୩୯-୪୬)

୩୨ ତାନ୍ ପେକେ ଅଡ଼୍, ଗେଡ଼ସମାନି ପେଦେରତେ ପଡ଼ୟତାଗ
ଝାଡ଼ତଡ଼, ନୁ ଜିସୁ ଶିଷ୍ୟଡ଼କିଙ୍କ କେଡ଼ତଣ୍ଡ, ମିଡ଼୍, ଇଗେ ସେନେକ୍
କୁଦାଟ୍ । ନାନେ ପ୍ରାର୍ଥନା ମାଡ଼ାନଙ୍କ ଆଦୁତାନ ।

୩୩ ପିତର, ଯାକୁବ୍ ନୁ ଯୋହନ୍ତିଙ୍କ ତଡ଼େକ୍ ଅସ୍ ଅଣ୍ ମୁନେ
ଆଡ଼ତଣ୍ଡ । ଅଣ୍ ନାଗେ ଦୁଃକାମ୍ତେ ତିପାଲ୍ ଆଡ଼ତଣ୍ଡ,

୩୪ ଆଗାଙ୍କ ଶିଷ୍ୟଡ଼କିଙ୍କ କେଡ଼ତଣ୍ଡ, ଦୁଃକାମ୍ ନା ହୁଦୟତିଙ୍କ
ଦୁସ୍ତେ, ମିଡ଼୍, ଇଗେ କେପି ମାନୁଟୁ ।

୩୫ ଜିସୁ ଇସୁର୍ ଆବାଡ଼୍ ଆଞ୍ଜି କାପ୍ମୁଡ଼ି ନେଲ୍ ରାଲତଣ୍ଡ ନୁ ଯଦି
ସମ୍ବର ଆୟେଡ଼, ଦୁକାମ୍ ଇଞ୍ଜକନ୍ ଆଦାଙ୍କ ପ୍ରାର୍ଥନା ମାଡ଼ି କେଡ଼ତଣ୍ଡ,

୩୬ “ହୋ ନା ବାବାନି ! ନିଗାରେ ସାରେ ସମ୍ବର । ଇଦି ଉନ୍ୟାନ
ସଲେଡ଼ ଏର୍ ନାୟାଗକନ୍ ଜେକେ ଆୟମ୍ । ଆଦ୍ ଇଞ୍ଜେବା ନାୟାଦ୍
ଇଚ୍ଛା ଆୟୟ ନି ଇଚ୍ଛା ସଫଲ୍ ଆୟି ।”

୩୭ ତା ପେକେ ମାଲସ୍ ଉଡ଼ତଣ୍ଡ, ମୁଝୁଡ଼୍ ଆସ୍ ଶିଷ୍ୟଡ଼୍ ଉଞ୍ଜି
ମିନ୍ଦେଡ଼୍ । ଜିସୁ ପିତରତିଙ୍କ କେଡ଼ତଣ୍ଡ, “ଶିମୋନ, ଉଞ୍ଜିତି ? ଅଣ୍ଡୟ
ଗଣ୍ଡେ କେପି ମାନ୍ୟାନଙ୍କ ପାରିଞ୍ଡିଡ଼୍ ?”

୩୮ ଜିସୁ ଅଡ଼କିଙ୍କ ମେଣ୍ଡେ କେଡ଼ତଣ୍ଡ, “କେପି ମାନୁଟୁ ବେଲା
ପରିକ୍ଷାତାଗେ ପଡ଼େମ୍ ଆଞ୍ଡିଡ଼୍, ଆଦି ମାଲଦିଙ୍କ ପ୍ରାର୍ଥନା ମାଡ଼ାଟ୍ ।
ଆମ୍ବା ଇଚ୍ଛା, କିନ୍ତୁ ହେମନ୍ତୁଲ୍ ଦୁର୍ବଲ୍ ।”

୩୯ ଅଣ୍ ଆଗାକନ୍ ମେଣ୍ଡେ ସୁଦୁର୍ ଜେକେ ଆଞ୍ଜି ମୁନେ ଲେକେ
ପ୍ରାର୍ଥନା ମାଡ଼ତଣ୍ଡ ନୁ

୪୦ ମେଣ୍ଡେଦାମ୍ ମାଲ୍ ଝାସ୍ ଉଡ଼ତୁଣ୍ଡ, ଶିଷ୍ୟଡ଼୍ ଉୟାଡ଼ତେ ଅଡ଼୍
କଣ୍ଡା ତେର୍ତ୍ତାଙ୍କ ପାର୍ଡ଼ିଡ଼୍ ମାଡ଼ତଡ଼୍ । ଅଡ଼୍ ଅଙ୍କ ବାତେ ଉତ୍ତର ଇଡ଼ଣ୍ଡ,
ପୁନ୍ଦେ ପାରଞ୍ଡିଡ଼୍ ।

୪୧ ମୁଣ୍ଡ ଦାମ୍ ମାଲ୍ତେ ଖେଲେ ଜିସୁ ଶିଷ୍ୟଡ଼କିଙ୍କ କେଡ଼ତଣ୍ଡ, ମିଡ଼୍
ଇଞ୍ଜେ ଆଇନା ଉଞ୍ଜି ମିନ୍ଦେଡ଼୍ ? ପିନା ଆଦୁଡ଼୍ । ଉଡ଼ାଟ୍ ! ନାରୁଣ୍ଡ
ପିଲେତିଙ୍କି ନାରୁଡ଼୍ କାଲଦେ ପସ୍ତିଦାନ୍ ସମୟ ଏଞ୍ଜୁଡେ ।

୪୨ ତେଦାଟ୍, ଆନାଟି, ଉଡ଼ାଟ୍ ନାକିଙ୍କି ପସ୍ତିଦାନଣ୍ଡ ନାରୁଣ୍ଡ ଝାସ୍
ହେଞ୍ଜୁଡଣ୍ଡ ।

ଜିସୁ ଗିରଫ ଆଡ଼ଣ୍ଡ

(ମାତିତ ୨୭:୪୭-୫୭; ଲୁକ ୨୨:୪୭-୫୩; ଯୋହନ୍ ୧୮:୩-୧୨)

୪୩ ଜିସୁ ଇ ଗଟି କେତାନ୍ ଝେଲେ ତାନ୍ ବାର୍ଜାନ୍ ଶିଷ୍ୟତ୍, ଲୋପେଜେ ଯିହୁଦା ପେର୍ଦେତେ ଶିଷ୍ୟୟ୍ ଝାସ୍ ଏଞ୍ଜୁତଣ୍ଡ । ଅନ୍ ତଡ଼, ସୁରି ଟେଙ୍ଗା, ଡ଼ୁ ପଇସ୍ ପିନା ନାରୁଡ଼ ଝାସ୍ ମାତଡ଼ । ମୁକ୍ୟ ପୁରହିତତଡ଼, ଦର୍ମଗୁରୁଡ଼ ନୁ ଦର୍ମନେତାଲଡ଼ ଅଡ଼କିଂଙ୍କ ରସମାତଡ଼ ।

୪୪ ବିରଦ୍ଦେ ଯିହୁଦାଲ୍ ଜିସୁଙ୍କୁ ପସ୍ତିଦାଙ୍କ୍ ଝାଦାନ୍ ନାରୁକିଙ୍କି ଅଣ୍ଡୟ୍ ଚିନ୍ନେ ଇଦାନଙ୍କ୍ ଇଞ୍ଜି ଟିକ୍ ମାଡ଼ିମାଡ଼ତଣ୍ଡ । ଅଣ୍ଡ କେଡ଼ତଣ୍ଡ, ବେନଙ୍କ୍ ନମସ୍କାର ମାଡ଼ିତାନ୍, ଅଙ୍କେ ମିଡ଼୍ ମେହେକ ମାନ୍ଦାନଣ୍ଡ । ଅଂକିଙ୍କ୍ ଗିରଫ ମାଡ଼ି ତସ୍, ଅୟ୍ ମୁରୁ ।

୪୫ ଯିହୁଦାଲ୍ ଝାସ୍ ଝାନାଙ୍କ୍ ଜିସୁନ୍ ଗାରେ ଆଞ୍ଜି ଅଂକିଙ୍କ୍ “ଗୁରୁ,” ଇଞ୍ଜି କେସଡ଼୍ କେସଡ଼୍ ନମସ୍କାର ମାଡ଼୍ତଣ୍ଡ ।

୪୬ ଆସୁର୍ ଅଡ଼ ଜିସୁଙ୍କ୍ ଗିରଫ ମାଡ଼ି ତଃତଡ଼ ।

୪୭ କିନ୍ତୁ ଗ୍ରାରେ ନିସ୍ ମାନ୍ଦାନ୍ ଅର୍ଡ଼ଣ୍ଡ ନାରୁନ୍ ସୁରୁ ପେସ୍ତି ବାଡ଼ିୟେ ଯାଜକତେ ଦାସଙ୍କ୍ ତୁସ୍ ଅନ୍ କେଝ୍ ନାଡ଼କ୍ତଣ୍ଡ ।

୪୮ ଜିସୁ ନାରୁଡ଼କିଙ୍କି କେଡ଼ତଣ୍ଡ, “ନାନେ ବାତେ ବେଏ ମିରୁତାନ୍ ଯେ, ଟେଙ୍ଗା, ଡ଼ୁ ପୟ୍ସ ନାକିଙ୍କ୍ ପଇତାନଙ୍କ୍ ଝାଡ଼ିଡ଼ି ?

୪୯ ☆ଦିନା ଦିନା ପଇସ୍ ନାନେ ମନ୍ଦିରତାଗେ ଶିକ୍ଷା ଇସମାଡ଼ତାନ୍; ଆସୁର୍ ତ ନାକିଙ୍କି ଗିରାଫ୍ ମାଡ଼ିଝିଡ଼ି । କିନ୍ତୁ ଗ୍ରାସ୍ତେ ଗଟି ସାରେ ଆଦତା ।”

୫୦ ଆସୁର୍ ଶିଷ୍ୟତ୍ ସାରେତଡ଼୍ ଅଂକିଙ୍କ୍ ଝିଡ଼ସି ମିରିତଡ଼ ।

୫୧ ଅର୍ଡ଼ଣ୍ଡ ଲେୟଣ୍ଡ ଅଣ୍ଡୟ୍ ତାଦର୍ ମୁସି ଜିସୁନ୍ ପେକେ ଆଞ୍ଜି ମାଡ଼ତଣ୍ଡ । ଅଡ଼ ଅଂକିଙ୍କ୍ ପଇତାଙ୍କ୍ ଆଦାନ୍ ଝେଲେ,

୫୨ ଅଣ୍ଡ ତାନ୍ ଚକାସିଲେ ଏସି ଡ଼ୁଟାଲ୍ ଆସ୍ ମିରତଣ୍ଡ ।

ମହାସବାତାଗେ ଜିସୁଙ୍କୁ ବିଚାର

(ମାତିତ ୨୭:୫୭-୬୮; ଲୁକ ୨୨:୫୪-୫୫, ୬୩-୭୧; ଯୋହନ୍ ୧୮:୧୩-୧୪, ୧୯-୨୪)

☆ ୧୪:୪୯ ଲୁକ ୧୯:୪୭; ୨୧:୩୭.

୫୩ ତାନ୍ ପେକେ ଅଡ଼ ଜିସୁଙ୍କୁ ବାଡ଼ିୟ ପୁରହିତତନ୍ ଲନ୍ ଅଡ଼ତଡ଼ । ଆଗେ ମୁକ୍ୟ ପୁରହିତଡ଼, ଦର୍ମ ନେତାଲଡ଼, ନୁ ଦର୍ମ ଗୁରୁଡ଼, ଗୁଡ଼ିମାତଡ଼, ।

୫୪ ପିତର ଇସ୍ତର୍ ଯେକେ ମାଞ୍ଜ ଅଡ଼ ପେକେ ଆତଣ୍ଟୁ ନୁ ବାଡ଼ିୟେ ପୁରହିତଡ଼ ଲନ୍ କୁଦି ମାନ୍ନାଗ୍ ନେଙ୍ଗତଣ୍ଟ । ଆଗେ କେପାନଡ଼, ତଡ଼, ନିଜେତିଙ୍କ କାପାନଙ୍କ ଆଗେ କିସ୍ ଗାରେ କୁଦତଣ୍ଟ ।

୫୫ ମୁକ୍ୟ ପୁରହିତିଡ଼, ନୁ ମହାସବାତେ ସଦସ୍ୟନଡ଼, ଜିସୁଙ୍କୁ ଡଲାନଦଣ୍ଟ ଇଦାଙ୍କ ଅନ୍ ବିରୁଦ୍ଧତେ ଦଷ୍ଟ ମେକାନଙ୍କ ପସ୍ତତଡ଼, କିନ୍ତୁ ବାତେବା ଦର୍ସକଡ଼ ।

୫୬ ବେସକଡ଼, ନାରୁଡ଼ ଜିସୁନ୍ ବିରୁଦ୍ଧତେ ମିର୍ ସାକ୍ଷି ଇତଡ଼, କିନ୍ତୁ ଅଡ଼ ସାକ୍ଷି ତାମତାମ୍ ଲୋପେ କାଇଲ୍ ଆତା ।

୫୭ ତାନ୍ ପେକେ ବେସକଡ଼, ନାରୁଡ଼ ନିସ୍ ଜିସୁନ୍ ବିରୁଦ୍ଧତେ ମେଣ୍ଟ ମିର୍ ଗର୍ କେଡ଼ତଡ଼ ।

୫୮ ☆ ଅଡ଼ କେଡ଼ତଡ଼, ମାମ୍ କେଞ୍ଚତମ୍ ଅଣ୍ଟ କେଲ୍ ନୁଣ୍ଟ, “ନୁରୁଡ଼ କାଇଦେ ତିଆର୍ ମାଡ଼ତେ ମନ୍ଦିର୍ତିଙ୍କ ନାନେ ମାଣ୍ଟଲୁ ତାଗେ କାଲ୍ ପିତାନ୍, ମୁଣ୍ଟ ଦିନା ଲୋପେ ନାରୁଡ଼ ତିଆର୍ ମାଡ଼ଝାଦ୍ ମେଣ୍ଟନ୍ ମନ୍ଦିର୍ ତିଆର୍ ମାଡ଼ିତାନ୍ ।”

୫୯ ଇଡ଼ ଗଟିବା ବେନ ବେନନାଗେ କାଇଲ୍ ।

୬୦ ବାଡ଼ିୟେ ପୁରହିତ ସାରେତଡ଼ ମୁନେ ନିସ୍ ଜିସୁଙ୍କୁ ପ୍ରଶ୍ନ ମାଡ଼ତଣ୍ଟ, ନି ବିରୁଦ୍ଧତେ ଅଡ଼ ତାସ୍ ମାନ୍ନାନ୍ ଇଗଟି ବିରୁଦ୍ଧତେ ନିମେ ବାତେ କେଡାନାଦ୍ ଇଲେ ?

୬୧ କିନ୍ତୁ ଜିସୁ ବାତେ କେଲକଟ କଟମାଡ଼ତଣ୍ଟ । ବାଡ଼ିୟେ ପୁରହିତ ମେଣ୍ଟଦାମ୍ ଅଂକିଙ୍କ ପାସ୍ରିଞ୍ଚତଣ୍ଟ, ନିମେ ବାତେ ମସାହ ମହାମହିମ୍ତେ ଇଶ୍ବରତେ ମାରିନି ?

୬୨ ଜିସୁ ଉତ୍ତର ଇତଣ୍ଟ, “ହଁ ନାନେ ଅଣ୍ଟେ । ନିମେ ନାରୁଡ଼ ପିଲେତିଙ୍କ ସର୍ବ ଶକ୍ତିମାନ୍ତେ ତିୟେ ପାକେ କୁଦି ମାନ୍ନାଦ୍ ଉଡ଼ିତିଡ଼, ନୁ ଅଣ୍ଟ ସ୍ବର୍ଗତେ ମୟଲତାଗାଙ୍କ ଝାଦାନାଦ୍ ଉଡ଼ିତିଡ଼ ।”

୬୩ ବାଡ଼ିୟେ ପୁରହିତ ନିଜ୍ ସିଲେ ଇକି କେତଣ୍ଟ, ମେଣ୍ଟ ବାତେ ସାକ୍ଷି ଦରକାର୍ ଇଲେ,

୭୪ ଅଣ୍ଟି ଇଶ୍ଵରତ୍ଵିକି ଲିନ୍ଦେ ମାଡ଼ତୁଣ୍ଡ, ମିଡ଼, କେଜୁତିଡ଼ । ମିୟାଦ୍ ବାତେ ଇଚ୍ଛା ? ଅଡ଼, ତାନ୍ ବିରୁଦ୍ଧ କେଡ଼ତଡ଼, ଅଙ୍କ ଦକ୍ଷିନ୍ ତଲାନଦଣ୍ଡ ଇଦାନାଦ୍ ସାୟେ ।

୭୫ ବେସକେ ନାରୁଡ଼ ଜିସୁନ୍ ପର୍ ଉସ୍ତଡ଼ । ଅଡ଼, ଅନ୍ କଣ୍ଟାଙ୍କ ସିଲେ ତଃସ୍ ଅଂକିଙ୍କ ରେହେସ୍ ପାସ୍ରିଷ୍ଟ ତଡ଼, “ବେନ୍ ନିକିଙ୍କି ରେହେତଡ଼, କେଲ୍ମ୍ ।” କେପାନଡ଼, ଅଂକିଙ୍କ ତହସ୍ ସାପୁଡ଼ା ରେହେତଡ଼ ।

ପିତର ଜିସୁଙ୍କୁ ପୁନନ୍ ଇଞ୍ଜ କେଡ଼ତଣ୍ଡ

(ମାଡ଼ିଡ଼ ୨୭:୨୯-୩୫; ଲୁକ ୨୨:୫୭-୬୨; ଯୋହନ୍ ୧୮:୧୫-୧୮, ୨୫-୨୭)

୭୬ ପିତର ବାଡ଼ୟେ ପୁରହିଡ଼ତନ୍ ଲନ୍ତେ ଲୋପେ ମାନ୍ଦାନ୍ ଝେଲେ ବାଡ଼ୟେ ପୁରହିଡ଼ତେ ଆ ଦାସି ଆଦେ ଆର୍ ଇସ୍ ଆଡ଼ତେ

୭୭ ନୁ ପିତର କିସ୍ ଆରାନାଦ୍ ଉଡ଼ି ଅକିଙ୍କ ଲେକେଡ଼ ଉଡ଼ି କେଡ଼ତନ୍, ନିମେବା ନାଜରିତେ ଜିସୁନ୍ତଡ଼, ମାଡ଼ିଡ଼ିନି ।

୭୮ ପିତର ପୁନ୍ଝେ ଲେକେ କେଡ଼ଣ୍ଡ, ନାନେ ଅଂକିଙ୍କ ପୁନନ୍ । ନିମେ ବାତେ କେଡ଼ୁଡ଼ି ନାନେ ବୁଜେମ୍ ଆୟନ୍ । ଆଲା କେସ୍ ଅଣ୍ଟି ଲୋଡ଼ତେ ଲୋପେତେ ଆର୍ଦ୍ଦେ ପାକେ ପେଇସ୍ ଆତଣ୍ଡ । ଆସୁଟେ କର୍କ୍ କୁସ୍ତା ।

୭୯ ଆ ଦାସିଲି ଅଂକିଙ୍କ ମେଣ୍ଟ ଦାମ୍ ଉଡ଼ି ଆଗେ ନିସ୍ ମାନ୍ଦାନ୍ ନାରୁଡ଼କ୍ତିକି କେଡ଼ତେ, ଇ ନାରୁଣ୍ଡ ଅଡ଼ ଲୋପେକେ ଅର୍ଡ଼ଣ୍ଡ ।

୮୦ ପିତର ମେଣ୍ଟଦାମ୍ ପୁନ୍ଝେ ଲେକେ ମାଡ଼ତଣ୍ଡ ।

ସେନେକ୍ ମାଞ୍ଜି ଆଗେ ନିସ୍ ମାନ୍ଦାନ୍ ନାରୁଡ଼ ପିତରତିଙ୍କ କେଡ଼ତଡ଼, ନିଜାମ୍ ନିମେ ଅଡ଼, ମାନ୍ଦେତନି ଆୟ ଇଞ୍ଜ କେଡାନଙ୍କ ପାରିଞ୍ଜି । ବାତେଙ୍କକେ ନିମା ଗାଲିଲୀତେ ନାରୁନି ।

୮୧ ପିତର ଉତ୍ତର ଇଡ଼ଣ୍ଡ, ନାନେ ପ୍ରମାଣ୍ ମାଡ଼ି କେଡ଼ୁଡ଼ାନ୍, ନା ଗଟ୍ ସଡ଼ । ଇଲୁକ୍ ଇଶ୍ଵର ନାକିଙ୍କି ଦଣ୍ଡ ଇଞ୍ଜିଣ୍ଡ । ବେନନ୍ ଗଟି କେଡ଼ୁଡ଼ିଡ଼, ଅଂକିଙ୍କ ନାନେ ପୁନନ୍ ।

୮୨ ଆସୁଟେ ମୁଣ୍ଡଦାମ୍ କର୍କ୍ କୁସ୍ତା ନୁ ପିତରତିଙ୍କ ଏକେଆଡ଼ତେ; ଜିସୁ କେସ୍ ମାଡ଼ତଣ୍ଡ, କର୍କ୍ ରେଣ୍ଡଦାମ୍ କୁସାନ୍ ମୁନେ ନିମେ ନାକିଙ୍କି

ମୁଣ୍ଡଦାମ୍ ପୁନନ୍ ଇଞ୍ଜ କେତିତି । ଅଣ୍ଡ ଦୁଃକାତେ ମୁରମୁରା ଆସ୍
କେୟତଣ୍ଡ ।

୧୫

ପିଲାତନ୍ ମୁନେ ଜିସୁ

(ମାତିଉ ୨୭:୧-୨, ୧୧-୧୪; ଲୁକ ୨୩:୧-୫; ଯୋହନ୍ ୧୮:୨୮-୩୮)

୧ ବାଡ଼ିୟେ ପୁରହିତଡ଼୍ ଝିୟତେ ଝିୟଞାକେ ଦର୍ମନେତାଲଡ଼୍,
ଦର୍ମଗୁରୁଡ଼୍ ନୁ ବାଡ଼ିୟେ ମିଟିଙ୍ଗ୍‌ତେ ସଦ୍ୟନଡ଼୍ ତଡ଼୍ କେସ୍ ଅଡ଼୍‌କିଙ୍ଗ୍
ପାଡ଼୍‌ୟି ମାଡ଼୍‌ତଡ଼୍ । ଜିସୁଙ୍କୁ ଇକଲେମ୍‌ତାଗେ ତସ୍ ଆସ୍ ପିଲାତନ୍
କାଇଦେ ଇତଡ଼୍ ।

୨ ପିଲାଡ଼୍ ଜିସୁଙ୍କୁ ପାର୍‌ଞ୍ଚିତଣ୍ଡ୍, ନିମେ ବେନ୍ ଇହୁଦିଡ଼୍ ରାଜାନି ?
ଜିସୁ ଉତ୍ତର ଇତଣ୍ଡ୍, ନିମେ ତ ଆଦ୍ କେତୁତି ।

୩ ମୁକ୍ୟ ପୁରହିତଡ଼୍ ଜିସୁନ୍ ବିରୁଦ୍‌ତେ ବେସର ଗଟି କେଡ଼୍‌ତଡ଼୍ ।

୪ ଆସୁର୍ ପିଲାଡ଼୍ ମେଣ୍ଡଦାମ୍ ଜିସୁଙ୍କୁ ପାର୍‌ଞ୍ଚିତଣ୍ଡ୍, ନିମେ ବାତେ
ଉତ୍ତର ଇଞ୍ଜିନ୍ ? ନି ବିରୁଦ୍‌ତେ ଇ ସାରେ ଗଟି କେତାନାଦ୍ କେଞ୍ଜୁତିନ୍
ତ !

୫ ଜିସୁ ପଦେଣ୍ଡେ ବା ଗଟ କେଲ୍‌ଞାଙ୍ଗ୍ ପିଲାଡ଼୍ କଟ ଆତଣ୍ଡ୍ ।

ଜିସୁଙ୍କୁ ତଲାନ୍ ଦଣ୍ଡ

(ମାତିଉ ୨୭:୧୫-୨୬; ଲୁକ ୨୩:୧୩-୨୫; ଯୋହନ୍ ୧୮:୩୯-
୧୯:୧୭)

୬ ସାରେ ଏଣ୍ଟକ୍ ନିସ୍ତାର ପାଣ୍ଡୁମ୍ ସମୟତେ ନାରୁଡ଼୍ ଦାବି ଲେକାମ୍
ପିଲାଡ଼୍ ଝେରଙ୍ଗ୍ ବନ୍ଦି ନାରୁଙ୍କ୍ ମୁକ୍ତି ମାଡ଼ିସମାତଣ୍ଡ୍ ।

୭ ଆସୁର୍ ଗଲ୍‌କିନଡ଼୍ ନୁ ନାରୁଙ୍କ୍ ଆସ୍ତ୍ରକ୍‌ତେ ନାରୁଡ଼୍‌କୁ ବେସ୍‌ତୁଡ଼୍,
ବିଦ୍ରୋହିଡ଼୍ ତଡ଼୍ ବାରବ୍‌ବା ପେଦେର୍‌ତଣ୍ଡ୍ ନାରୁଣ୍ଡ୍ ରୁଜଲ୍ ଦଣ୍ଡ୍ ବଗେମ୍
ଆସ୍ ମାଡ଼୍‌ତଣ୍ଡ୍ ।

୮ ଆସୁର୍ ସାରେ ଗୁଡ଼ି ମାନ୍ଦାନ୍ ନାରୁଡ଼୍ ମୁନେଡ଼୍ ରିତି ଲେକାମ୍
ଅରଡ଼୍‌କୁ ଝିଡ଼୍‌ସିଦାଙ୍ଗ୍ ଦାବି ମାଡ଼ି କେଡ଼୍‌ତଡ଼୍,

୯ ପିଲାଡ଼୍ ଅଡ଼୍‌କିଙ୍ଗ୍ ପାର୍‌ଞ୍ଚିତଣ୍ଡ୍, ଇହୁଦିଡ଼୍ ରାଜାଙ୍କ୍ ନାନେ ମୁକ୍ତି
ମାଡ଼ିତାନ୍ ଇଞ୍ଜ ମିଡ଼୍ ଇଛା ମାଡ଼୍‌ତୁଡ଼୍ ?

୧୦ ପିଲାଟ ପୁଞ୍ଜ ମାଡ଼ତଣ୍ଡ ଯେ ମୁକ୍ୟ ପୁରହିତତଡ଼ ଇଂସା ଆସ୍
ଜିସୁଙ୍କୁ ଅନ୍ କାଇଦେ ପସ୍ତାପିତଡ଼ ।

୧୧ କିନ୍ତୁ ବାରବବାଙ୍କ ମୁକ୍ତି ମାଡ଼ାନ୍ ମାଇଦିଙ୍କ ପିଲାଟ ଗାରେ ଦାବି
ଜଣାମାଡ଼ଙ୍କ ମୁକ୍ୟ ପୁରହିତତଡ଼ ନାରୁଡ଼ଙ୍କ କେଡ଼ତଡ଼ ।

୧୨ ପିଲାଟ ନାରୁଡ଼ଙ୍କ ମେଣ୍ଟଦାମ୍ ପାର୍ ଅତଣ୍ଡ, ଆଲେକେ ମିଡ଼,
ବେନଙ୍କ ଇହୁଦିଡ଼, ରାଜାଲ୍ ଇଞ୍ଜ କେଡୁଡିଡ଼, ଅଂକିଙ୍କ ନାନେ ବାତେ
ମାଡ଼ିତାନ୍ ?

୧୩ ନାରୁଡ଼, କିଡ଼କି କେଡ଼ତଡ଼, ଅଂକିଙ୍କ କୁଶତାଗେ ତାରସ୍ତାପାଟ୍ ।

୧୪ ପିଲାଟ ପାର୍ ଅତଣ୍ଡ, କିନ୍ତୁ ଅଣ୍ଟ ବାତେ ଦୋଷ ମାଡ଼ତଣ୍ଡ ? ଅଡ଼,
ମେଣ୍ଟ ମରଆସ୍ କେଡ଼ତଡ଼, “ଅଂକିଙ୍କ କୁଶତାଗ୍ ତାରସ୍ତାପାଟ୍ ।”

୧୫ ପିଲାଟ ନାରୁଡ଼କିଂଙ୍କ ଶାନ୍ତି ମାଡ଼ାନଙ୍କ ପାଖେ ମାଡ଼ତଣ୍ଡ, ଆଦିଙ୍କ
ଅଣ୍ଟ ବାରବବାଙ୍କ ମୁକ୍ତି ମାଡ଼ିତଣ୍ଡ ନୁ ଜିସୁଙ୍କୁ କଡ଼ାନ୍ତଡ଼, ରେହେସ୍
କୁଶତାଗେ ତାରସ୍ତାନଙ୍କ ଅଡ଼, କାଇଦେ ଓଡ଼ସିତଣ୍ଡ ।

ସୈନିକିଡ଼ ଜିସୁଙ୍କୁ ପରିହାସ ମାଡ଼ତଡ଼,

(ମାଡ଼ିଉ ୨୭:୨୭-୩୧; ଯୋହନ୍ ୧୯:୨-୩)

୧୬ ସୈନିକିଡ଼ ଜିସୁଙ୍କୁ ପିଲାତନ୍ ପ୍ରାସାଦତେ ଲୋପେ ଆଡ଼ତଡ଼ ।
ଆଗେ ସୈନିକିଡ଼, ସାରେତଡ଼, ଅଣ୍ଟୟତାଗେ ଗୁଡ଼ତଡ଼ ।

୧୭ ଅଡ଼ ଜିସୁଙ୍କୁ ଅଣ୍ଟୟ ଆପେ ରଙ୍ଗତାଦ୍ ସିଲେ କେଶ୍ଟିତଡ଼, ନୁ କୟେ
ମାଡ଼େତେ କମେତେ ଅଣ୍ଟ ସହଜ୍ ତିଆର୍ ମାଡ଼ି ଅନ୍ ତାଲେତାଗେ
କେରସ୍ତିତଡ଼ ।

୧୮ ତାନ୍ପେରକେ ଜିସୁଙ୍କୁ ନମସ୍କାର ମାଡ଼ି କେଡ଼ତଡ଼, ଇହୁଦିଡ଼,
ରାଜାଲ୍ ଚିରଞ୍ଜିବି ଆଇଣ୍ଡ ।

୧୯ ଅଡ଼, ଅନ୍ ତାଲ୍ତିଙ୍କ ଡୁତେ ରେହେତଡ଼, ଅନ୍ ପର୍ ଉସତଡ଼, ନୁ
ମରମିଣ୍ଡା ଉଝୁସ୍ ପ୍ରଣାମ୍ ମାଡ଼ାନ୍ କେଡ଼ତଡ଼ ।

୨୦ ଇଲାନେ ଅଂକିଙ୍କ ପରିହାସ୍ ମାଡ଼ି ତେରେତେ ପେକେ ଆପେ
କଲର୍ତେ ସିଲେ ଟେଣ୍ଡି ଅନ୍ ନିଜର ସିଲେ କେରସ୍ତିତଡ଼ । ତାନ୍
ପେକେ ଅଂକିଙ୍କ କୁଶତାଗ୍ ତାରସ୍ତାନଙ୍କ ଅଡ଼ତଡ଼ ।

ଜିସୁ କୁଶବିଦ୍ ଆତଣ୍ଡ

(ମାଡ଼ିଉ ୨୭:୩୨-୪୪; ଲୁକ ୨୩:୨୭-୪୩; ଯୋହନ୍ ୧୯:୧୭-୨୭)

୨୧ ☆ଆର୍ଯଦାଗ୍ ଅଡ଼ ଶିମୋନ ପେଦେରେ ଅରତୁଙ୍କ ନାରୁଙ୍କୁ କାୟଲ୍‌ତଡ଼ । ଅଣ୍ଟ ନାରକନ୍ ଟାଉନ୍‌ତା ଖାସମାତଣ୍ । ଜିସୁଙ୍କୁ କୁଶ କାଞ୍ଚିପାନଙ୍କ ସେନ୍‌ୟଡ଼ ଅଂକିଙ୍କ ବାଦ୍ୟ ମାଡ଼ତଡ଼ ଇ ଶିମୋନ କୁରୁନିୟତେ ନାରୁଣ୍ଟ ମାଡ଼ତଣ୍ । ଅଙ୍କ ଇଡ଼ଡ଼ ମାର୍କ ମାଡ଼ତଡ଼ ଆଲେକଜାଣ୍ଡାର ନୁ ରୁଫସ୍ ।

୨୨ ଅଡ଼ ଜିସୁଙ୍କୁ ଗଲଗତା ପେଦେରେ ପଡ଼ିୟତାଗ୍ ଅଡ଼ତଡ଼ । ଗଲଗତାତେ ଅଡ଼ ଆଦୁଡ଼ ତାଲେଡ଼ ମୁଞ୍ଜ,

୨୩ ଆଗ୍ ଅଡ଼ ଜିସୁଙ୍କୁ ଗାବ୍‌ମାନ୍‌କାନ୍ କାଲ୍ କାଲିପି ଉନ୍‌ମାନଙ୍କ ଇଡ଼ଡ଼ । କିନ୍ତୁ ଜିସୁ ଆଦିଙ୍କ ଉନ୍‌ଣ୍ ।

୨୪ ତାନ୍ ପେରକେ ଅଡ଼ ଜିସୁଙ୍କୁ କୁଶବିଙ୍କ ମାଡ଼ତଡ଼ ନୁ ଲଟ୍ଟି ମାଡ଼ି ଅନ୍ ସିଲେ ସାର ନିଜନିଜ ଲୋପେ ବାଗମାଡ଼ି ଅଡ଼ତଡ଼ ।

୨୫ ନାର୍କୁକ୍ ନଟାତେ ଜିସୁ କୁଶବିଙ୍କ ଆତଣ୍ ।

୨୬ ଅନ୍ ସମ୍ପର୍କତେ ଅବିଯୋଗ୍ ଚିଟି ଇଲା ଲେକେ ଆସ୍ ମାଡ଼ତେ, “ଇହୁଦିଡ଼ ରାଜାଲ୍ ଇଞ୍ଜ ଲେକା ମାଡ଼ତେ ।

୨୭ ଅଡ଼ ଆଦନାଣ୍ ଇରିଡ଼ଡ଼ ଦସିଡ଼କ୍ ବା କୁଶତାଗ୍ ତାସ୍ତତଡ଼ ଅରତୁଙ୍କ ଜିସୁନ୍ ଡେବ୍ ପାକେ ନୁ ମେଣ୍ ଅର୍ଡୁଣ୍ ଅନ୍ ତିନ୍‌ପାକେ କୁଶବିଙ୍କ ମାଡ଼ତଡ଼ ।

୨୮ ଅଣ୍ ଅପରାଦିତଡ଼ ଦଶା ଆଡ଼ତେ ।” ଶାସ୍ତ୍ରତେ ଇ ବବିଷ୍ୟତ୍‌ବାଣି ଇଲାନ୍‌ନେ ସଫଲ୍ ଆଡ଼ତେ ।

୨୯ ☆ଆଲା ଆଞ୍ଜମାନ୍‌କାନ୍ ନାରୁଡ଼ ତାଲେ ତେସ୍ ଜିସୁଙ୍କୁ ଅପମାନ୍ ଇସ୍ କେଡ଼ତଡ଼, ହୋ ନିମ୍‌ତ ମନ୍‌ଦିର୍ ଉଞ୍ସୁସ୍ ମୁଣ୍ଟ ହିନାଲୋପେ ତିଆର୍ ମାଡ଼ିଦାନ୍‌ନି ।

୩୦ ଇଞ୍ଜେ କୁଶକନ୍ ଡିଗି ଖାସ୍ ନିଜେତିଙ୍କି ରକ୍ଷା ମାଡ଼ ।

୩୧ ମୁକ୍ୟ ପୁରହିଡ଼ତଡ଼ ନୁ ଦର୍ମଗୁରୁଡ଼ ଆଲେନ୍‌ନେ ଅଂକିଙ୍କ କେଞ୍ଜତେ ଲେକେ ତାମ୍‌ତାମ୍ କେତା କେତି ଆଡ଼ଡ଼ ଅଣ୍ ଖେରେ ତଡ଼କିଙ୍କି ରକ୍ଷା ମାଡ଼ ମାଡ଼ତଣ୍, କିନ୍ତୁ ଇଞ୍ଜେ ନିଜେତିଙ୍କି ରକ୍ଷା ମାଡ଼ପାରୁଣ୍ ।

୩୨ ଇଶ୍ରାୟେଲ୍‌ରେ ରାଜାଙ୍କ ମସୀହ ଇଞ୍ଜେ କୁଶକନ୍ ଡିଗି ଝାଡ଼ଣି, ଆଲେକେ ମାମ୍ ଅଙ୍କ ବିଶ୍ୱାସ ମାଡ଼ିତମ୍ ତାନ୍ ତଡ଼୍ ମାନ୍ଦାନ୍ ଇର୍ବୁଡ଼୍, ସାଙ୍ଗଡ଼୍ ଅଂକିଙ୍କ କାଝୁସ୍ କାଝୁସ୍ କେଡ଼ତଡ଼୍ ।

ଜିସୁ ତଲାନାଦ୍

(ମାଡ଼ିତ ୨୭:୪୫-୫୬; ଲୁକ ୨୩:୪୪-୪୯; ଯୋହନ୍ ୧୯:୨୮-୩୦)

୩୩ ଆଦନାଣ୍ ପାୟଲ୍‌ରେ ହଲ୍ ମୁଣ୍ଟୁ ଗୁଣ୍ଟା ସାରେ ଦେଶ୍ ଇକାଡ଼୍, ଆଡ଼ତେ ।

୩୪ ପାୟଲ୍‌ରେ ଅଲ୍ ତିନିଟାଝେଲେ ଜିସୁ ଲେଙ୍ଗଟେଣ୍ଟି କେଡ଼ତଡ଼୍, ଏଲୋହି, ଏଲୋହି, ଲାମା ଗବକ୍‌ତାନି । ହୋ ନାଆ ଇଶ୍ବର ତନି, ହୋ ନାଆ ଇଶ୍ବର ତନି, ନାକିଙ୍କ ବାଡେଙ୍କ୍ ଝିଡ଼ସି ମିନ୍ଦେନି ?

୩୫ ଅନ୍ ହି ଗଟି କେଞ୍ଜି ବେସକ୍‌ତୁ କେଡ଼ତଡ଼୍, ଅଣ୍ ଏଲିୟଙ୍କ୍ କାରଙ୍ଗୁଡ଼ଣ୍ ।

୩୬ ଅଡ଼୍ ଲୋପେଙ୍କେ ଅର୍ଡୁଣ୍ ମିରି ଆଞ୍ଜ୍ ପସ୍ବେତିଙ୍କି ପୁଲେ ଅଙ୍ଗୁର୍ ଏର୍ ମୁହୁସ୍ ଅଣ୍ଟୟ୍ ଡଡ଼୍‌ରେ ମୁନେ ତସ୍, ନୁ ଆଦ୍ ଜିସୁ ପାୟଲ୍‌ରେ ଗାର୍‌ରେ ପଇସ୍ କେଡ଼ତଡ଼୍, “ଉଡ଼ିତାନ୍, ଅଂକିଙ୍କ୍ କୁଶକନ୍ ଡିପାନଙ୍କ୍ ଏଲିୟ୍ ଝାଡୁଡ଼ଣ୍ ଇଲେ ?”

୩୭ ଜିସୁ ଆସୁଟେ ଗାଟି ଲେଙ୍ଗଦେ କେସ୍ ତଲ୍‌ତଣ୍ ।

୩୮ ମନ୍ଦର୍ ତାଗେ ଉଙ୍ଗମାଡେ ପରଦା ପରକନ୍ ମଦଲ୍ ହେଝୁନା ରେଣ୍ଟେ ଦୁଡ଼୍ ଇଙ୍ଗିଆଡେ ।

୩୯ ଅର୍ଡୁଣ୍ ସେନାପତି ଜିସୁନ୍ କୁଶଡେ ମୁନେ ନିସ୍ ଅଣ୍ଟ ବେଲା ଡଲ୍‌ତଣ୍, ଆଦ୍ ଲେକେଡ଼ ଉଡ଼୍ ମାଡ଼ିତଣ୍ । ଅଣ୍ଟ କେଡଣ୍, ଇ ନାରୁଣ୍ଟୁ ନିଜାମ୍ ଇଶ୍ବରଡେ ମାର୍ ।

୪୦ ☆ବେସକେ ନାଟା ଜେକେ ମାଞ୍ଜ୍ ଇ ସାରେ ଉଡ଼୍ ମାଡ଼ିତା । ଆଞ୍ଜିନ୍ ଲୋପେ ମାଡ଼ିତେ ମଗ୍‌ଦଲାନି ମରୀୟମ୍, ସୁଜୁରୁ ଯାକ୍‌ବ ନୁ ଯୋଶିନ୍‌ରେ ଯାୟ୍ ମରୀୟମ୍ ନୁ ଶଲୋମି ।

୪୧ ଜିସୁ ଗାଲିଲୀତାର୍ ମାନ୍ଦାନ୍ ଝେଲେ ଆଝୁ ଅଙ୍କ୍ ଅନ୍‌ପେକେ ଆଞ୍ଜ୍ ସାହାୟମ୍ ମାଡ଼ି ମାଡ଼ିତା । ତାନ୍ ତଡ଼୍ ଯିରୁଶାଲମ୍‌ରେ କନ୍ ଝାସ୍ ମାଡ଼ିତେ ପିନା ନାଟା ଆଗେ ମାଡ଼ିତା ।

ଜିସୁନ୍ ସମାଦି

(ମାତିତ ୨୭:୫୭-୬୧; ଲୁକ ୨୩:୫୦-୫୬; ଯୋହନ୍ ୧୯:୩୮-୪୨)

୪୨ ଆଦ୍ ନାଣ୍ ମୁଲୁପୁର୍ ଆରମାତିଆତେ ଯୋସେପ୍ ଝାସ୍ ହେସ୍ତତଣ୍ । ଅଣ୍ ବାଡ଼ିୟେ ମିଟିଜିତେ ସମ୍ମାନତେ ସଦସ୍ୟ ମାଡ଼ତଣ୍ ନୁ ଇଶ୍ବରତେ ରାଜ୍ୟ ଝାଦାନାଦିକି କେପମାଡ଼ତଣ୍ ।

୪୩ ଆଦ୍ ନାଣ୍ ମାଡ଼ତେ ତିଆର୍ ମାଡ଼ନ୍ ଦିନାମ୍ ବା ରମାନ୍ଦିମ୍ତେ ମୁନେଡ଼ ଦିନାମ୍ । ଆରମାତିଆତେ ଯୋସେପ୍ ଝେର୍ଝ କନ୍ ପିଲାତେ ଗାରେ ଆଞ୍ଜି ଜିସୁନ୍ ଡଲତେ ମଡ଼ ଆଦାନଙ୍କ୍ ତାଲ୍ ତଣ୍ ।

୪୪ ଜିସୁ ଆସୁର୍ ଡଲତଣ୍ ଇଞ୍ଜି କେଞ୍ଜି ପିଲାତ ଦାଦରେଲ୍ତଣ୍ । ଆଗେ ମାନ୍ ସେନାପତିକି କାଜି ଜିସୁ ଡଲି ପିନାଜେଲ୍ ଆଦୁଡ଼ କି ଇଞ୍ଜି ପାର୍ ଞ୍ଜିତଣ୍ ।

୪୫ ଆଦ୍ ଅନାଗାଙ୍କ୍ ଇଦି ବିଷୟ୍ ସାରେ କେଞ୍ଜି ପିଲାତ ଜିସୁନ୍ ଡଲତେ ମଡ଼ ଆଦାନଙ୍କ୍ ଯୋସେପ୍ତିକି ଇଡ଼ଣ୍ ।

୪୬ ଯୋସେପ୍ ଜିସୁନ୍ ମେନ୍ଦୁଲୁଡିକି କୁଶ କନ୍ ତ୍ରିପି ତାସ୍ ଅଣ୍ ସିଲେ ତାସ୍ ଜିସୁନ୍ ମେନ୍ଦୁଲୁଡିକି ଅଣ୍ ମୁସ୍ପିତଣ୍ ନୁ ମେଟେତାଗ୍ ଡେଝି ଆସମାନ୍ଦନ୍ ଅଣ୍ ଦରତାଗ୍ ଅସ୍ ଆଦ୍ ଝାଡ଼ତଣ୍ । ମେଣ୍ଟେ ଅଣ୍ ବାଡ଼ିୟାଦ୍ କାଲ୍ ଦରତିକି ମୁସିତଣ୍ ।

୪୭ ମଗ୍ଦଲାନି ମରୀୟମ୍ ନୁ ଯୋଶିତେ ଯାୟ୍ ମରୀୟମ୍ ଆଗେ ମାଞ୍ଜି ଜିସୁନ୍ ମେନ୍ଦୁଲୁ ବେଗେ ଝାଟିତଡ଼, ଉଡ଼୍ ମାଡ଼ତା ।

୧୭

ଜିସୁନ୍ ପୁନର୍ଉତାନ

(ମାତିତ ୨୮:୧-୮; ଲୁକ ୨୪:୧-୧୨; ଯୋହନ୍ ୨୦:୧-୧୦)

୧ ରମାନ୍ ଦିନାମ୍ ତେର୍ତେ ପେର୍ତକେ ମଗ୍ଦଲାନି ମରୀୟମ୍; ଯାକୁବତେ ଯାୟ୍ ମରିୟମ୍ ନୁ ଶଲୋମି ଜିସୁନ୍ ମେନ୍ଦୁଲୁଡିକି ଉସାନଙ୍କ୍ ବେସ୍କ୍ ଲେକେଡ଼ ଗାଦ୍ ମାନ୍ଦାନ୍ ନିୟ୍ ଜିନିଷ୍ ଆସି ତାଡ଼ଆ ।

୨ ରବାରନାଣ୍ ଝିୟ୍ଦାନ୍ ଝେଲେ ପଡ଼୍ ପେସ୍ମାତେ ଝେଲେ ଆଞ୍ଜୁ ସମାଦିତାଗ୍ ଆଡ଼ତା

୩ ଆରବାର୍ ଆସୁ ତାମ୍ଭାମ୍ ଲୋପେ କେତା, “ସମାଦିତାଗେ ଆ କାଲ୍‌ଦିକ୍ ମାନ୍ ମାଲ୍‌ଦିକ୍ ବେନ ତୁସ୍ ଦତ୍ତଶ୍ ?” ଆଦ୍ କାରଣ ବାଡ଼ାତାଦ୍ କାଲ୍ ମାଡ଼ତେ,

୪ କିନ୍ତୁ ଆସୁ ମାଡ଼ିକି ଉଡ଼ତା, କାଲ୍‌ଦିକ୍ ତୁସ୍ ଇସ୍ ମିନ୍ଦେଡ୍ ।

୫ ସମାଦିତେ ଦର୍ରେ ଲୋପେ ଆଜ୍ ଉଡ଼ତା ଯେ ଆଗ୍‌ଗେ ଲାଟି ପାଣ୍ଡି ତକା କେର୍‌ତେନଶ୍ ଅର୍ତ୍ତଶ୍ ଲେୟଶ୍ ସମାଦି ତିନ୍ କାଲ୍‌ଦେ ପାକେ କୁଦତଶ୍ । ଇସ୍‌ସାରେ ଉଡ଼ି ଆସୁ ଝେର୍‌ତା ।

୬ ଲେୟଶ୍ କେତଶ୍, ଝେର୍‌ମାର୍ । ନାନେ ପୁତାନ୍, ମିଡ୍‌କୁଶାଗ୍ ଡଲିମାନ୍‌ ନାଜରିତୟ ଜିସୁଙ୍କୁ ମେକୁତିଡ୍ । ଅଶ୍ ଇଗେ ଇଲାଶ୍ । ଅଶ୍ ମେଶ୍ ଜିଝେ ଆସ୍‌ମିନ୍ଦେଶ୍ । ଉଡ଼ାର୍, ଅଡ୍‌ଇପଡିୟେ ତାଗେ ଅଂକିଙ୍କ୍ ଖାଟିମାଡ଼ତଡ୍ ।

୭ ଈଞ୍ଜେ ଆଜ୍ ପିତର ନୁ ଜିସୁନ୍ ବାଗାଡ୍ ଶିଷ୍ୟଡ଼କିଙ୍କି ଇ କବର୍ ଇମୁର୍ । ଅଡ଼କିଙ୍କ୍ କେଲ୍‌ମୁର୍, ଜିସୁ ମିଇ ମୁନେ ଗାଲିଲୀତାଗ୍ ଆଦୁତଶ୍ । ଅଶ୍ କେତାନ୍ ଲେକାମ୍ ମିଡ୍‌ଅଂକିଙ୍କ୍ ଆଗ୍ ଉଡ଼ପାର୍‌ତିଡ୍ ।

୮ ନାଗାକି ସମାଦିକନ୍ ପେଇସ୍ ଝେର୍‌ସ୍ ମିରି ମିରି ଆଡ଼ତା । ଆସୁ ପିନା ଦାଦ୍‌ରେଲ୍‌ତା ଆନ୍ତେ ଆଶର୍‌ୟ ଆଡ଼ତା, ଆସୁର୍ ବେନଙ୍କ୍ ବା ଡିରିୟାଙ୍କ୍ ପାର୍‌ଖମାଡ଼ତା ।

ଜିସୁ ମଗଦଲିନି ମରିୟମ୍‌ଡିକି ତନ୍‌ଡଶ୍
(ମାଡିଡ ୨୮:୯-୧୦; ଯୋହନ୍ ୨୦:୧୧-୧୮)

୯ ଜିସୁ ରବାର୍‌ନାଶ୍ ପୁନରୁଡ଼ି ଆସ୍ ମଗଦଲାନି ମରୀୟମ୍‌ଡିକି ମୁନେନ୍ ଦର୍ଶନ ଇସ୍‌ମାଡ଼ତଶ୍ । ଇ ମରୀୟମ୍ ତଡ୍ ଅଶ୍ ସାଡ଼ଟାନ୍ ବୁଡ଼କ୍ ଝିସ୍‌ମାଡ଼ଶ୍ ।

୧୦ ମରୀୟମ୍ ଆଜ୍ ଜିସୁନ୍ ସାଙ୍ଗନଡ଼କ୍ ଇଦି ବିଷୟ କେଞ୍ଜ୍‌ପଡେ । ଅଡ଼ ଦୁକାତେ କେୟମାଡ଼ତଡ୍ ।

୧୧ ଜିସୁ ଜିଝି ଆଡଶ୍ ନୁ ଆଦ୍ ଅଂକିଙ୍କ୍ ଉଡ଼ତାନ୍, ଇଜ୍ ଇ ଗଟି ମରୀୟମ୍ କେତାଙ୍କ୍ ଅଡ଼ତାନ୍ ଗଟିକି ବିଶ୍ୱାସ୍ ମାଡ୍ ।

☆ ୧୭:୭ ମାଡିଡ ୨୭:୩୨; ମାର୍ଚ୍ଚ ୧୪:୨୮.

ଜିସୁ ଇଉଡ଼ ଶିଷ୍ୟତ୍ବକିଙ୍କି ତତ୍ତ୍ବ
(ଲୁକ ୨୪:୧୩-୩୫)

୧୭ ତାନ୍ ପରକେ ଜିସୁନ୍ ଇଉଡ଼ ଶିଷ୍ୟତ୍ବ ଅଣ୍ ନାର୍ ଦାଗ୍ ଆଦାନ୍
ଝେଲେ ଆର୍ ଦାଗ୍ ଜିସୁ ଅତ୍ବକିଙ୍କି ମେଣ୍ଟେ ଅଣ୍ ରକମ୍ ତତ୍ତ୍ବ ।

୧୩ ଅତ୍ ମାଲସ୍ ଝାସ୍ ବାଗାତତ୍ବକିଙ୍କି ଇ ଗଟି କେତତତ୍, କିନ୍ତୁ ଅତ୍
ଗଟିଙ୍କି ବେନ୍ ବିଶ୍ବାସ୍ ମାଡ଼ତ୍ ।

ଜିସୁ ଏଗାର ଜାନ୍ ଶିଷ୍ୟତ୍ବକିଙ୍କି ତତ୍ତ୍ବ
(ମାତିତ ୨୮:୧୭-୨୦; ଲୁକ ୨୪:୩୬-୪୯; ଯୋହନ୍ ୨୦:୧୯-୨୩;
ପ୍ରେରିତ ୧:୬-୮)

୧୪ ତାନ୍ପେରକେ ତାନ୍ ଏଗାର ଜାନ୍ ଶିଷ୍ୟତ୍ବ ତିୟାନଙ୍କ କୁଦି
ମାଡ଼ତତ୍ ଆସୁର୍ ଜିସୁ ଅତ୍ବକିଙ୍କି ଦର୍ଶନ ଇତଣ୍ । ଅତ୍ଝାଦ୍ ଅବିଶ୍ବାସୀ
ମାଜଦିଙ୍କି ଅକିଙ୍କି ଜିହ୍ବତେ ଉଡ଼ି ମାୟାନ୍ ନାରୁଡ଼ ଗଟି ବେଲା ବୁସା
ଆଇମାକି ଇଞ୍ଜି ଜିସୁ ଅତ୍ବକିଙ୍କି କାଇଲ୍ତଣ୍ ।

୧୫ ☆ମେଣ୍ଟେ ଅଣ୍ କେତତଣ୍, “ସମଗ୍ ଜଗତ୍ତାଗ୍ ଆଞ୍ ନାୟାଦ୍
ଇଦ୍ ସାଏଡ଼ କାବୁର୍ ସାରେତତ୍ ଗାରେ ଆଞ୍ କେଲ୍ମୁର୍ ।

୧୬ ବେନ୍ ଇଦିଙ୍କି ବିଶ୍ବାସ୍ ମାଡ଼ି ବାପ୍ତିସ୍ମ ଅଦତଣ୍, ଅଣ୍ ପରିତ୍ରାଣ
ପାୟେମ୍ ଆଦତତ୍ । ବେନ୍ ବିଶ୍ବାସ୍ ମାଡ଼ଣ୍, ଅତ୍ ଦୋଷି ଆଦତଣ୍
।

୧୭ ବିଶ୍ବାସିଡ଼ ବାକ୍ଝା ପାଡ଼ିୟି ମାଡ଼ାନଙ୍କ ଶକ୍ତି ପାୟେମ୍ ଆଦତତ୍ ।
ନା ପେଦେରତେ ଅତ୍ ବୁଡ଼ ଝିଣ୍ଡିତତ୍, ପୁଃନେ ଗଟ୍ତେ ଗଟିତିର୍ ତତ୍,

୧୮ ଅତ୍ ତାଡ଼ିକି କାଇଦେ ପୟ୍କେ କିମ୍ବା ଝିସାତିଙ୍କି ଉଡ଼କେ,
ଅତ୍ବକିଙ୍କି ବାତେ ଆୟ୍ । ଅତ୍ ରୋଗ୍ତେ ମାୟା ନାରୁଡ଼ତେ ପର୍ କାଇ
ଝାଟ୍କେ, ଅତ୍ ସୁସ୍ଥ ଆଦତତ୍ ।”

ଜିସୁ ସ୍ବର୍ଗତା ଆଡ଼ତଣ୍
(ଲୁକ ୨୪:୫୦-୫୩; ପ୍ରେରିତ ୧:୯-୧୧)

୧୯ ☆ଅତ୍ବକିଙ୍କି ଇ ସାରେ ଗଟି କେସ୍ ତେରି ପ୍ରବୁ ଜିସୁ ସ୍ବର୍ଗ
ଇଶ୍ବରତେ ତିଦେ କାଇଦେ ପାକେ କୁଦତଣ୍ ।

୨୦ ଶିଷ୍ୟତଃ ଆଞ୍ଜ ସାର୍ ଏକାମ୍ ପ୍ରଚାର ମାଡ଼ତଡ଼ । ଅଡ଼ କେତାନାଦ୍
 ସଡ଼ ପ୍ରମାଣ ମାଡ଼ାନଙ୍କ ପ୍ରତୁ ଅଡ଼ତଡ଼ ମାଞ୍ଜ ବାକ୍ସା ପାଡ଼ି ମାଡ଼ାନଙ୍କ
 ଅଡ଼କିଂଙ୍କ ଶକ୍ତି ଇଡ଼ତନ୍ । *

* ୧୭:୨୦ ମେଣ୍ଡେଅଣ୍ ପାଆନ୍ତେ ମାଡ଼େଙ୍କ୍

ପୁନାବ୍ ଆର୍ବ୍
The New Testament in the Koya language of India:
ପୁନାବ୍ ଆର୍ବ୍ (Bible)

copyright © 2020 The Word for the World International and Koya Translation Samithi, Malkangiri, Odisha

Language: (Koya)

Contributor: The Word for the World South Asia

ପୁନାବ୍ ଆର୍ବ୍
ପୁନାବ୍ ନିୟମ୍ , 2020

The New Testament in Koya Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-07

PDF generated using Haiola and XeLaTeX on 6 May 2025 from source files dated 7 May 2025

72ff5787-bb80-584b-a1a0-0acd8a2fefae